

EL SANTO EVANGELIO SEGUN SAN MATEO

*Jesucristo itenondegua reta
(Lc 3.23-38)*

¹ Tamimbeu cua tupapire pe Jesucristo itenondegua reta. Jesucristo co jae David iñemoñaeta reta pegua. Jae ramiño vi jae co Abraham iñemoñaeta reta pegua.

² Abraham iñemoñaeta Isaac, jare Isaac iñemoñaeta Jacob, jare Jacob iñemoñaeta reta Judá jare tiquei reta jare tiví reta. ³ Jare Judá umiñemoñaeta Tamar güi Fares jare Zara. Jare Fares iñemoñaeta Esrom, jare Esrom iñemoñaeta Aram. ⁴ Jare Aram iñemoñaeta Aminadab, jare Aminadab iñemoñaeta Naasón, jare Naasón iñemoñaeta Salmón. ⁵ Jare Salmón umiñemoñaeta Rahab güi Booz. Jare Booz umiñemoñaeta Rut güi Obed. Jare Obed iñemoñaeta Isaí. ⁶ Jare Isaí iñemoñaeta David. Jae co Israel pegua reta juvicha guasu.

Jare mburuvicha guasu David umiñemoñaeta Urías jembirecocue güi Salomón. ⁷ Jare Salomón iñemoñaeta Roboam, jare Roboam iñemoñaeta Abías, jare Abías iñemoñaeta Asa. ⁸ Jare Asa iñemoñaeta Josafat, jare Josafat iñemoñaeta Joram, jare Joram iñemoñaeta Uzías. ⁹ Jare Uzías iñemoñaeta Jotam, jare Jotam iñemoñaeta Acáz, jare Acáz iñemoñaeta Ezequías. ¹⁰ Jare Ezequías iñemoñaeta Manasés, jare Manasés iñemoñaeta Amón, jare Amón iñemoñaeta Josías. ¹¹ Jare Josías iñemoñaeta reta Jeconías jare tiví reta. Jare Jeconías ico yave, iví Babilonia pegua

reta umiamiri Israel pegua reta jare güiraa jeta Israel pegua reta Babilonia pe.

¹² Jare yugüiraa ma Babilonia pe yave, Jeconías iñemoña Salatiel, jare Salatiel iñemoña Zorobabel. ¹³ Jare Zorobabel iñemoña Abiud, jare Abiud iñemoña Eliaquim, jare Eliaquim iñemoña Azor. ¹⁴ Jare Azor iñemoña Sadoc, jare Sadoc iñemoña Aquim, jare Aquim iñemoña Eliud. ¹⁵ Jare Eliud iñemoña Eleazar, jare Eleazar iñemoña Matán, jare Matán iñemoña Jacob. ¹⁶ Jare Jacob iñemoña José - jae co María ime. Jare María imembi Jesús - jae co Cristo jee vae.

¹⁷ Jáeramo yaipapa catorce ñemoña Abraham güi David pe. Jae ramiño vi yaipapa catorce ñemoña David güi Jeconías pe. Echa'ã Jeconías ico yave, Israel pegua reta uyereraaca Babilonia pe. Jae ramiño vi yaipapa catorce ñemoña Jeconías güi Cristo pe.

Jesucristo oa vae regua (Lc 2.1-7)

¹⁸ Añave tamimbeu quirãi Jesucristo oa ichi güi vae regua. María José ndive umendata yave, ndei José güireco mbove, uyecuaa ipurúa oĩ. Ipurúa co Espíritu Santo imbaepuere pe. ¹⁹ Jayave José ipia pe uyemingueta jei vaerã chupe ndarau umenda jae ndive, ãrei uipota'ã uyapo opaete vae reta jovaque. Echa'ã José penti cuimbae jupi vae co jare uipota'ã umimaraca María opaete vae reta jovaque. ²⁰ Ërei cua re ipia pe uyemingueta oĩ rambueve, penti ángel yandeYa pe uyeyocui vae uyecuaa chupe ipau pe jare jei chupe:

—José. Nde co jae David iñemoñaeta reta pegua. Ndepuere nemenda María ndive ndequiye mbae reve. Echa'ã ipurúa oĩ Espíritu Santo imbaepuere pe —jei—. ²¹ Jare imembita penti cuimbae jare nembijeeta Jesús. Echa'ã jae umbiasata ivi pegua reta. Echa'ã umbaita imbaeyoa reta —jei.

²² Jare opaete cua uyeyapo, Tumpa iñee aracae umimbeu vae rupi yandeYa jei vae uyeyapo vaerã.

²³ Echa'ã jei cuarãi:

“Mase, penti cuñatai cuimbae güireco'ã etei vae ipuruata jare imembita penti cuimbae.

Jare umbijeeta reta Emanuel.”

Jucuarãi jei. (Cua tee uipota jei: “Tumpa ime yande ndive oĩ”.)

²⁴ Jayave José usareco yave, umenda María ndive ángel yandeYa pe uyeyocui vae jei chupe rami. ²⁵ Èrei José opoco'ã María re ndei imembiripi oa mbove. Jare María imembi oa ma yave, José umbijee Jesús.

2

Cuimbae yasitata re uyemboe vae reta

¹ Jesús oa ma yave tenta guasu Belén ivi Judea pegua pe, Herodes ico mburuvicha guasurã. Jare jocua ara rupi yugüeru cuimbae reta yasitata re uyemboe vae reta guarasi oẽ vae coti güi uvãe tenta guasu Jerusalén pe. ² Jare jei reta:

—¿Quiape pa ime oĩ sambiaí judío reta juvicha guasurã icota vae? Echa'ã nduecha yasitata uicuaaca oreve vae guarasi oẽ vae coti. Jáeramo ndoyu ma nuvãe numbiadora vaerã —jei reta.

³ Mburuvicha guasu Herodes cua uyandu yave, uyemipia'ã. Opaete Jerusalén pegua reta uyemipia'ã vi. ⁴ Jayave Herodes umbatica opaete sacerdote reta itenondegua reta jare mboroyocui re oporomboe vae reta, jare upirandu chupe reta quiape ra oata Cristo, Tumpa ombou vae. ⁵ Jare jae reta jei chupe:

—Oata Belén Judea pegua pe. Echa'ã Tumpa iñee aracae umimbeu vae jei cuarãi:

⁶ 'Belén Judea pegua penti tenta guasu Judea pegua icavi vae.

Echa'ã joco pe oata penti mburuvicharã.

Jae oyocuita Israel pegua reta.

Israel pegua reta chembae co.'

Jucuarãi jei —jei reta chupe.

⁷ Jayave Herodes uenica viari jocua yasitata re uyemboe vae reta, jare upirandu chupe reta quirãi yave ra uyecuaa jocua yasitata. ⁸ Jayave Herodes jei chupe reta:

—Pecua Belén pe peeca cavi jocua sambiai. Jare pevãe ma chupe yave, peyu ye cua pe pemimbeu cheve, che vi aa vaerã ambiadora —jei.

⁹ Uyandu reta ma yave mburuvicha guasu jei vae, cuimbae reta yugüiraa Jerusalén güi. Jare uecha reta ye jocua yasitata guarasi oẽ vae coti ñugüinoi yave uecha vae. Jare yasitata oo jae reta jenonde uyemboi sambiai oĩ vae iárambo. ¹⁰ Jocua yasitata uecha reta yave, cuimbae reta tuicha rupi uyerovia. ¹¹ Jare uique reta yave sambiai oĩ vae pe, uecha reta sambiai ichi ndive - jae co María jee vae. Jayave jae reta uyeatica jare umbiadora sambiai. Jayave uipea jivita reta jare umee sambiai pe

güeru reta chupe vae - oro jare mbae ipiche cavi vae reta incienso jare mirra jee vae.

¹² Jare Tumpa umimbeu cuimbae reta pe ipau pe agüiye vaerã yugüiraa ye Herodes jenta rupi. Jáeramo yugüiraa ye livi pe ñru tape rupi.

Herodes uyucaca sambiai reta

¹³ Jare cuimbae reta yugüiraa ma yave, penti ángel yandeYa pe uyeyocui vae uyecuaa José pe ipau pe jare jei chupe:

—Epüa. Eraa sambiai jare ichi pecua Egipto pe. Pepita joco pe amimbeu ye ndeve regua. Echa'ã Herodes uecacata sambiai uyucaca vaerã —jei.

¹⁴ Jayave José upüa, jare pïtu oï reve güiraa sambiai jare ichi ivi Egipto coti. ¹⁵ Jare jae reta upita Egipto pe Herodes umano regua. Jucuarãi uyapo José, uyeyapo vaerã Tumpa ñnee aracae umimbeu vae rupi yandeYa jei vae. Echa'ã jei cuarãi: “Egipto güi aeni cheRai.”

¹⁶ Jayave Herodes uicuaa jocua yasitata re uyemboe vae reta uyapo'ã co jae jei vae. Jáeramo tanta rupi pochi jare omondo sundaro reta uyuca vaerã opaete sambiai cuimbae mi retaño Belén pe jare Belén iyipi rupi ñugüinoi vae reta ndei mocui año güinoi vae. Echa'ã yasitata re uyemboe vae reta opou Herodes pe yave, Herodes upirandu cavi chupe reta quirãi yave ra uecha yasitata.

¹⁷ Jare jucuarãi uyeyapo Tumpa ñnee aracae umimbeu vae Jeremías jei vae. ¹⁸ Echa'ã jei cuarãi: “Ramá pe uyendu ñee.

Uyendu uyao ñugüinoi tuicha ipiatiti vae reta.

Raquel uyao oï imembi reta re.

Ipuere'ã etei quía umbipiacatu imembi reta umano ma ramo.”
Jucuarãi jei.

¹⁹ Ërei Herodes umano ma yave, José Egipto pe oĩ rambueve, penti ángel yandeYa pe uyeyocui vae uyecuaa José pe ipau pe. ²⁰ Jare jei chupe:

—Epũa. Eraa ye sambiaí jare ichi Israel pegua reta ivi pe. Echa'ã uipota tẽi uyucaca sambiaí vae reta umano ma —jei.

²¹ Jayave José upũa jare güiraa sambiaí jare ichi Israel pegua reta ivi pe. ²² Ërei uyandu quirãí Arquelao ico mburuvicha guasurã Judea pe. Echa'ã Arquelao Herodes tai co. Jayave José uquiye oo vaerã Judea pe. Ërei Tumpa umimbeu José pe ipau pe oo vaerã ivi Galilea pe. Jáeramo jocoti oo. ²³ Jare José oo uvãe penti tenta guasu Nazaret jee vae pe jare joco pe ico, uyeyapo vaerã Tumpa iñee aracae umimbeu vae reta jei vae. Echa'ã jei reta cuarãi: “Ïru vae reta umbijeeta penti Nazaret pegua.”

3

*Juan upurumbibautiza vae umimbeu Tumpa iñee
(Mr 1.1-8; Lc 3.1-20; Jn 1.19-28)*

¹ Jocua ara reta rupi ou Juan ñana Judea pe oĩ vae pe upurumbibautiza jare umimbeu Tumpa iñee.
² Jae jei:

—Peeya piyemingueta icavi mbae vae pepia pe oĩ vae. Echa'ã outa ma uvãe mboroyocua ara pegua —jei.

³ Tumpa iñee aracae umimbeu vae Isaías jee vae imiari Juan re. Echa'ã Isaías jei cuarãi:
“Jae iñeeãta reve jeita ñana pe:

‘Piyapicatu yandeYa japerã.

Pemisimi tape.’ ”

Jucuarãi jei.

⁴ Jare Juan jemimonde maemimba camello jee vae jaagüe pegua co, jare jumbicuaa guacapi pegua co. Jare jembíu co jae tucu jare ei ñana rupigua. ⁵ Jare jeta Jerusalén pegua reta jare Judea pegua reta jare jeta tenta iãca Jordán iyipi rupi ñugüinoi vae pegua reta yugüiraa Juan oĩ vae pe. ⁶ Jare Juan umbibautiza reta iãca Jordán pe imbaeyoa reta opa umimbeu yave. ⁷ Jare jeta fariseo reta jare saduceo reta yugüeru Juan oĩ vae pe, jae umbibautiza vaerã. Jare Juan uecha reta yave, jei chupe reta:

—Pe reta co jae mboi reta rami. ¿Quía pa umimbeu peve piyero vaerã Tumpa coti agüiye vaerã Tumpa uiporaraca peve? ⁸ Piyapo icavi vae, jucuarãi picuaaca vaerã añetete peeya co piyemingueta icavi mbae vae pepia pe oĩ vae. ⁹ Agüiye pere piyupe pepia pe: ‘Yandetenondegua co jae Abraham.’ Echa'ã che jae peve cua: Tumpa ipuere uyapo cua ita reta güi Abraham iñemoña retarã —jei Juan chupe reta—. ¹⁰ Yamijaanga penti temiti. Temiti ía icavi'ã yave, iya uyasía japo reve jare uapi. Jae ramiño vi piyapo'ã yave icavi vae, Tumpa uiporaracata peve —jei—. ¹¹ Che pumbibautiza i pe piyemingueta icavi mbae vae pepia pe oĩ vae peeya yave. Ërei cheraicue rupi outa ipuere ete chegüi vae. Jupi'ã co che amboi araa vaerã ipipasa. Jae pumbibautizata Espíritu Santo pe jare tata pe —jei—. ¹² Jae co trigo uipoo vae rami. Echa'ã trigo uipoo vae umbiveve trigo

uequi vaerã iti. Jayave uñuvatu trigo jiru pe. Ërei uapì iti tata pe. Tata Cristo uiporuta vae opa mbae vae co —jei.

Juan umbibautiza Jesús
(Mr 1.9-11; Lc 3.21-22)

¹³ Jare Jesús ou Galilea güi uvãe Jordán pe Juan oĩ vae pe, Juan pe uyembibautizaca vaerã. ¹⁴ Ërei Juan ñatëi umbibautiza Jesús. Jáeramo jei chupe:

—¿Maera pa ndipota che numbibautiza vaerã? Echa'ã icavi co nde chembibautiza vaerã —jei.

¹⁵ Jayave Jesús jei chupe:

—Icavi co nde chembibautiza vaerã añave. Echa'ã jucuarãi icavi co yayapo vaerã opaete jupì vae —jei.

Jayave Juan umbibautiza Jesús. ¹⁶ Jare Juan umbibautiza ma yave, Jesús oẽ i güi. Jare jupivoi uecha ara uyepea oĩ, jare uecha vi Tumpa iEspíritu ugüeyi jese picasu rami. ¹⁷ Jare jupivoi uyendu ñee ara güi jei:

—Cua co jae cheRai aau ete vae. Chembiyerovia ete —jei.

4

Aña guasu umingueta Jesús uyavica vaerã tẽi chupe

(Mr 1.12-13; Lc 4.1-13)

¹ Jayave Espíritu Santo güiraa Jesús ñnaa pe. Jare joco pe aña guasu umingueta uyavica vaerã tẽi chupe. ² Jare Jesús jou'ã mbae ave cuarenta ara. Jáeramo cuarenta ara uasa ma yave, iyembai.

³ Jayave aña guasu umingueta uyavica vaerã tẽi chupe.

—Nde co jae Tumpa Tai yave, ere cua ita reta pe uyeyapo vaerã mbiyaperã —jei.

⁴ Ërei Jesús jei chupe:

—Tumpa ñee pe uyecuatía oĩ cuarãi:

‘Icavi co ivi pegua reta jou vaerã mbiyape güinoi vaerã tecove.

Ërei icavi ete co uyapisaca vaerã Tumpa ñee re jare uyapo vaerã jei vae güinoi vaerã tecove opa mbae vae.’

Jucuarãi uyecuatía oĩ —jei.

⁵ Jayave ña guasu güiraa Jesús Jerusalén pe jare umbuyupi Tumpa jo iyapite re. ⁶ Jayave jei chupe:

—Nde co jae Tumpa Tai yave, ea cua güi. Echa’ã Tumpa ñee pe uyecuatía oĩ cuarãi:

‘Tumpa oyocuita ángel reta uyandareco vaerã nderé.

Ipo pe ndepisi ndeocota reta, agüiye vaerã ndepi uyererocua ita re.’

Jucuarãi uyecuatía oĩ —jei.

⁷ Jayave Jesús jei chupe:

—Tumpa ñee pe uyecuatía oĩ cuarãi: ‘Che co jae ndeYa Tumpa. Agüiye mbae iyapo ndicuaa vaerã tuicha ra chepiaguasu.’ Jucuarãi uyecuatía oĩ —jei.

⁸ Jayave ña guasu güiraa Jesús penti ivitu guasu ivate vae re jare uechaca chupe opaete mburu-vicha guasu reta iporoyocua ivi pe ñügüinoi vae reta opaete ipõra vae reve. ⁹ Jayave ña guasu jei chupe:

—Tamee ndeve opaete cua, ndiyeatica yave chembiadora vaerã.

¹⁰ Jayave Jesús jei chupe:

—Esiri chegüi, Satanás. Echa'ã Tumpa iñee pe uyecuatía oĩ cuarãi: ‘Che co jae ndeYa Tumpa. Chembiadora. Jaeño cheve iyeyocui.’ Jucuarãi uyecuatía oĩ—jei.

¹¹ Jayave aña guasu usiri Jesús güi, jare jupivoi yugüeru ángel reta ombori Jesús.

Jesús umbipi iparaviqui

(Mr 1.14-15; Lc 4.14-15)

¹² Jare Jesús uicuaa ma yave Juan uyemingueta ma co peresoriru pe, oo Galilea pe. ¹³ Oo Nazaret güi uvãe tenta guasu Capernaum pe jare joco pe ico, (Capernaum oĩ i guasu jembei pe Zabulón jare Neftalí iivi pe) ¹⁴ uyeyapo vaerã Tumpa iñee aracae umimbeu vae Isaías jei vae. Echa'ã jae jei cuarãi:

¹⁵ “Zabulón iivi jare Neftalí iivi, i guasu jembei pe, Jordán jovaicho pe, Galilea judío mbae vae reta pegua.

¹⁶ Pĩtumimbi pe yugüireco vae reta uecha ma tembipe tuicha vae.

Mano iguarasã pe yugüireco vae reta pe uyecuaa tembipe.”

Jucuarãi jei.

¹⁷ Jayave Jesús umbipi umimbeu Tumpa iñee. Jae jei:

—Peeya piyemingueta icavi mbae vae pepia pe oĩ vae. Echa'ã outa ma uvãe mboroyocua ara pegua—jei.

Jesús ueni irundi cuimbae pira uipisi vae reta

(Mr 1.16-20; Lc 5.1-11)

¹⁸ Jare uguata rambueve Galilea pe i guasu jembei rupi, Jesús uecha Simón - jae co Pedro

jee vae - jare Simón t̄iv̄i Andrés jee vae. Jae reta omombo ñugüinoi p̄isa i guasu pe, pira uip̄isi vaerã. Echa'ã jae reta pira uip̄isi vae reta co. ¹⁹Jare Jesús jei chupe reta:

—Peyu cherupíe, jare che chembaepuere pe pemboeta ñru vae reta güirovia vaerã cheré.

²⁰Jayave jae reta ueya voi ip̄isa, jare yugüiraa jae jupíe.

²¹Jesús oo catu ye joco güi, jare uecha Zebedeo tai reta. Penti jee Jacobo jare t̄iv̄i jee Juan. Uyap̄icatu ñugüinoi p̄isa reta chalana pe tu ndive. Jayave Jesús ueni. ²²Jayave jae reta ueya voi chalana jare tu, jare yugüiraa jae jupíe.

*Jesús ombœ jeta vae
(Lc 6.17-19)*

²³Jare Jesús oo opaete Galilea rupi, jare oporombœ judío reta itupaopao rupi. Umimbeu ñee icavi vae Tumpa iporoyocua pegua, jare umbigüera imbaerasi vae reta ipotave mbaerasi güi. ²⁴Jare opaete iv̄i Siria pegua reta uyandu Jesús uyapo vae regua. Jare ñru vae reta güeru jae oĩ vae pe imbaerasi vae reta. Amocue vae uiporara ete jasi vae, jare aña oya amocue vae re, jare amocue vae imbiquere, jare amocue vae ipuere mbae omi vae. Jayave Jesús umbigüera reta. ²⁵Jare yugüiraa Jesús jaicue jeta vae Galilea güi, jare iv̄i Decápolis jee vae güi, jare Jerusalén güi, jare Judea güi, jare iãca Jordán jovaicho güi.

5

*Iv̄itu guasu re Jesús jei vae
(Lc 6.20-23)*

¹Jare Jesús jeta vae reta uecha yave, uyupi penti ivitu guasu re. Joco pe uguapi oĩ, jare jemimboe reta yugüeru jae oĩ vae pe. ²Jayave Jesús umbipi omboe reta. ³Jei chupe reta:

—Tuyerovia icoi Tumpa ueca vae reta. Echa'ã Tumpa umeeta chupe reta yugüireco vaerã mboroyocua ara pegua pe —jei—. ⁴Tuyerovia ipiatiti vae reta. Echa'ã Tumpa umbipiacatuta reta —jei—. ⁵Tuyerovia uñemimichi vae reta. Echa'ã Tumpa umeeta chupe reta ivi imbaerã —jei—. ⁶Tuyerovia iquirëi jupi vae uyapo vae reta. Echa'ã Tumpa umbujupita reta —jei—. ⁷Tuyerovia ñru vae reta uiparareco vae reta. Echa'ã Tumpa uipararecota reta —jei—. ⁸Tuyerovia ipia iquia mbae vae reta. Echa'ã uechata reta Tumpa —jei—. ⁹Tuyerovia ñru vae reta umbipiacatu vae reta. Echa'ã Tumpa jeita chupe reta: ‘Pe co jae cherai reta’ —jeita, jei—. ¹⁰Tuyerovia jupi vae uyapo ramo ñru vae reta icavi mbae vae uyapo chupe vae reta. Echa'ã Tumpa umeeta chupe reta yugüireco vaerã mboroyocua ara pegua pe —jei—.

¹¹Ñru vae reta jeita icavi mbae vae peve jare uyapota icavi mbae vae peve. Ipotave icavi mbae vae jeita pecoti iyapu reve, pe reta cherau ramo. Ñrei piyeroviaño peĩ —jei—. ¹²Piyerovia ete. Echa'ã Tumpa güinoi ara pe mbae icavi ete vae pembaerã. Echa'ã jae reta itenondegua reta uyapo cua nunga icavi mbae vae Tumpa ñnee aracae umimbeu vae reta pe —jei—.

Yuqui rami vae
(Mr 9.50; Lc 14.34-35)

¹³ Pe reta co jae yuqui rami cua ivi pe. Ërei yuqui jembochi'ã ma yave, ¿quirãita ra jembochi ye? Icavi'ã ma mbaerã. Icavi co yamombo vaerã jare ñapĩro jese vaerã —jei—.

Mechero rami vae

¹⁴ Pe reta co jae penti mechero ivi pegua reta pe tembipe umee vae rami. Yayapo yave tenta guasu penti ivitu re, yandepuere'ã etei ñañomi. Opaete vae ipuere uecha —jei—. ¹⁵ Jae ramiño vi mechero yamiendi yave, ndarau ñañono yapepo uyembovapo oĩ vae igüi pe. Ñañono co mechero jenda pe, opaete o pe ñugüinoi vae reta güinoi vaerã tembipe —jei—. ¹⁶ Mechero umee yandeve tembipe. Jae ramiño vi pe reta pico cavi ñru vae reta jovaque, jae reta uicuaa vaerã pe reta piyapo co icavi vae. Echa'ã jucuarãi yave, umbiadorata reta peRu ara pe oĩ vae —jei—.

Jesús jare mboroyocui

¹⁷ Aramoi pe reta pepia pe piyemingueta che ayu co ambai vaerã Moisés iporoyocui jare Tumpa iñee aracae umimbeu vae reta jei vae. Ërei jucuarãi'ã co. Che ayu ayapo vaerã, ayu'ã co ambai vaerã —jei—. ¹⁸ Añete che jae peve, ara jare ivi uasa regua ndarau uyembai penti cuatía michi ete vae yepe Moisés iporoyocui güi ndei opaete uyeyapo mbove —jei—. ¹⁹ Ime yave quía penti mboroyocui michi vae uyapo'ã jare umimbeu ñru vae reta pe agüiye vaerã uyapo vae, ñru vae reta jeita jae co taicuegua vae mboroyocui ara pegua pe. Ërei ime yave quía uyapo jare umimbeu ñru vae reta pe uyapo vaerã vae, ñru vae reta jeita jae

co tenondegua vae mboroyocua ara pegua pe — jei—. ²⁰ Echa'ã che jae peve cua: Jupi vae pe reta piyapo vae jupi ete'ã yave jupi vae mboroyocui re oporombœ vae reta jare fariseo reta uyapo vae gũi, ndarau etei pico mboroyocua ara pegua pe — jei—.

Jesús iporombœ mbochi regua
(Lc 12.57-59)

²¹ Piyandu ma quirãi Moisés jei yandetenondegua reta pe cuarãi: 'Agũiye epuruyuca. Echa'ã upuruyuca vae uñeãacata co.' Jucuarãi jei —jei—. ²² Ërei che jae peve, ime yave quía pochĩ tivĩ pe vae, uñeãacata co. Jare ime yave quía tivĩ gũirĩro vae, judío reta itenondegua reta uãata. Jare ime yave quía tivĩ pe: 'Nembiquere', jei vae, tata guasu pe uiporarata —jei—. ²³ Jáeramo nderu yave penti ofrenda uñemeearenda pe, jare joco pe nemandúa yave quirãi nderivĩ pochĩ ndeve mbae re, ²⁴ eeya joco pe jocua ofrenda uñemeearenda jovai. Ecu rani iyeyapĩcatu nderivĩ ndive. Jayave taicue rupi ndepuereta neme jocua ofrenda Tumpa pe — jei—.

²⁵ Iyeyapĩcatu imambae uipota uñeapo nderé mbae re vae ndive jae ndive ndeo rambueve tape rupi mburuvicha oĩ vae coti. Echa'ã ndiyeyapĩcatu'ã yave, uñeapota nderé mburuvicha pe, jare mburuvicha nemondota peresorĩru iyandarecoa pe jare peresorĩru iyandarecoa neñonota peresorĩru pe —jei—. ²⁶ Añete che jae ndeve, ndarau etei neñ peresorĩru gũi ndei opaete ndepía nembiepi mbove —jei—.

Jesús iporombœ menda re uyuvanga vae regua

²⁷ Piyandu ma quirãi Moisés jei yandetenondegua reta pe cuarã: ‘Agüiye iyuvanga menda re.’ Jucuarãi jei —jei—. ²⁸ Ërei che jae peve, ime yave quía umae cuña re uipota reve vae, uyuvanga ma menda re ipia pe —jei—. ²⁹ Jare nderesa ndeacata cotigua uyapoca yave mbaeyoa ndeve, enoë emombo ndiyugüi. Icavi co penti nderesa ucañi vaerã ndegüi, tata guasu pe opaete nderete reve Tumpa nemondo vaerã tēi güi —jei—. ³⁰ Jae ramiño vi ndepo ndeacata cotigua uyapoca yave mbaeyoa ndeve, iyasia emombo ndiyugüi. Icavi co penti ndepo ucañi vaerã ndegüi, tata guasu pe opaete nderete reve Tumpa nemondo vaerã tēi güi —jei—.

*Jesús iporomboe omombo jembireco vae regua
(Mt 19.1-10; Mr 10.1-12; Lc 16.18)*

³¹ Aracae Moisés jei vi cuarã: ‘Jembireco omombo vae tumee chupe tupapire umimbeu vaerã pipe omombo ma vae co.’ Jucuarãi jei —jei—. ³² Ërei che jae peve, penti cuimbae ipuere omombo jembireco, cuña aguasa uyapo yave. Ërei cuña uyapo'ã yave aguasa jare cuimbae omombo yave jembireco, jocua cuña uyuvanga co menda re umenda yave ñru cuimbae ndive. Jae ramiño vi jocua cuimbae cuña ndive umenda vae uyuvanga co menda re —jei—.

Jesús iporomboe Tumpa jee re jei vae

³³ Piyandu ma quirãi Moisés jei yandetenondegua reta pe cuarã: ‘Agüiye ere: YandeYa jee re ayapota, ndepurumbitavi vaerã. Echa'ã ndere yave: YandeYa jee re ayapota, iyapo.’ Jucuarãi jei

—jei—. ³⁴ Ërei che jae peve, agüiye ere jucuarãi. Agüiye ere: ‘Ara jee re ayapota.’ Echa'ã ara Tumpa iguapia co. ³⁵ Agüiye vi ere: ‘Ivi jee re ayapota.’ Echa'ã ivi Tumpa ipi jenda co. Agüiye vi ere: ‘Jerusalén jee re ayapota.’ Echa'ã Jerusalén Mburuvicha Guasu mbaepuere güinoi vae jenta guasu co. ³⁶ Agüiye vi ere: ‘Cheãca jee re ayapota.’ Echa'ã ndepuere'ã ndiyapo ndea tĩ ani jũ —jei—. ³⁷ Ërei ndipota yave ndere: ‘Ayapota’, ere: ‘Ayapota.’ Jae ramiño vi ndipota yave ndere: ‘Ndarau ayapo’, ere: ‘Ndarau ayapo.’ Echa'ã jeta cua güi ndere yave, ndiyapota icavi mbae vae —jei—.

*Jesús iporomboe uyeepi vae regua
(Lc 6.27-31)*

³⁸ Piyandu ma quirãi Moisés aracae jei cuarãi: ‘Ime yave quía ñru vae jesa urucumegua vae, ñru vae reta turucumegua vi jae jesa. Jae ramiño vi ime yave quía ñru vae jã omopẽ vae, ñru vae reta tomopẽ vi jae jã.’ Jucuarãi jei —jei—. ³⁹ Ërei che jae peve, emaeño ñru vae re uyapo vaerã ndeve icavi mbae vae. Ime yave quía ocua nderovaique re vae, erova ipuere vaerã ocua ye jovaicho re. ⁴⁰ Jae ramiño vi ime yave quía uñeapo nderé ndecamisa upĩro vaerã ndegüi vae, emaeño jese upĩro vaerã ndegüi ndeasoya vi —jei—. ⁴¹ Jae ramiño vi ime yave quía ndeocui nderaa vaerã jivita penti kilómetro, eraa chupe mocui kilómetro rupi —jei—. ⁴² Jae ramiño vi ime yave quía uyerure ndeve mbae re vae, emee chupe, jare ime yave quía mbae uiporu ndeve vae, iporuca chupe —jei—.

Peau perovaicho reta
(Lc 6.27-36)

⁴³ Piyandu ma quirãi Moisés aracae jei cuarãi: ‘Eau neĩru jare emitarẽi nderovaicho.’ Jucuarãi jei —jei—. ⁴⁴ Èrei che jae peve, peau perovaicho reta. Piyerure Tumpa pe umivendise vaerã uyepipeyu peré vae reta. Piyapo icavi vae pemitarẽi vae reta pe. Piyerure Tumpa pe icavi mbae vae uyapo peve vae reta re —jei—. ⁴⁵ Jucuarãi piyapo yave, picota peRu ara pe oĩ vae tai retarã. Echa'ã peRu umee guarasi icavi mbae vae uyapo vae reta jare icavi vae uyapo vae reta pe, opaete vae güinoi vaerã tembipe. Jae ramiño vi umee ama jupi vae reta jare jupi mbae vae reta pe, opaete vae güinoi vaerã i —jei—. ⁴⁶ Echa'ã peau yave perau vae retaño, jocua mbaeti etei co mbae icavi vae. Jáeramo Tumpa ndarau umee peve mbae jocua jeco pegua. Echa'ã mburuvicha peguarã ocovara vae reta vi uyapo jucuarãi —jei—. ⁴⁷ Jae ramiño vi pembisaluda picuãva reve yave perivi retaño, jocua mbaeti etei co mbae icavi vae. Echa'ã up-urugüirovia mbae vae reta vi uyapo jucuarãi —jei—. ⁴⁸ Jáeramo jecuaeño piyapo icavi vae. Echa'ã peRu ara pe oĩ vae jecuaeño uyapo icavi vae —jei—.

6

Quirãi neme vaerã mbae iparavete vae reta pe

¹ Jupi vae piyapo yave, agüiye piyapo opaete vae jovaque jae reta uecha vaeraño. Echa'ã piyapo

yave opaete vae jovaque, peRu ara pe oĩ vae ndarau umee peve mbae jocua jupi vae piyapo vae jeco pegua —jei—.

² Jáeramo neme mbae iparavete vae reta pe yave, agüiye iyapo upurumbitavi vae reta uyapo rami. Echa'ã jae reta omondo jenonde judío reta itupao reta pe jare calle rupi uyemimbi vae, ĩru vae reta icavi uyemingueta jese vaerã umee mbae iparavete vae reta pe yave. Añete che jae peve, jocua upurumbitavi vae reta güinoita'ã imbaerã jucuarã iyapo ramo —jei—. ³ Ĕrei nde neme mbae iparavete vae reta pe yave, agüiye tuicuaa ndepo ndeaso cotigua ndepo ndeacata uyapo vae, ⁴ agüiye vaerã quía ye uicuaa nde ndiyapo vae regua. Ĕrei ndeRu uicuaata nde ndiyapo viari vae jare umeeta ndeve mbae opaete vae jovaque —jei—.

Jesús oporomboe yerure re
(Lc 11.1-4)

⁵ Jare ndiyerure Tumpa pe yave, agüiye iyapo upurumbitavi vae reta uyapo rami. Echa'ã jae reta uyerure Tumpa pe yave, uipota quía reta uecha vaerã. Jáeramo uyemboi judío reta itupao reta pe jare calle uyerea pe uyerure Tumpa pe yave. Añete che jae peve, jocua upurumbitavi vae reta güinoita'ã imbaerã jucuarã iyapo ramo —jei—. ⁶ Ĕrei nde ndiyerure Tumpa pe yave, ique ndero pe jare iyuquenda onque. Jayave iyerure ndeRu pe quía reta uicuaa mbae reve. Jare ndeRu uicuaata nde ndiyapo viari vae jare umeeta ndeve mbae opaete vae jovaque —jei—.

7 Ērei piyerure Tumpa pe yave, agüiye iyapo upurugüirovia mbae vae reta uyapo rami. Echa'ã jae reta jecuaeño umbiaicuerecuere jei penti vaeño. Echa'ã ipia pe uyemingueta tēi Tumpa uyapısacata jese reta jucuarãi uyapo yave —jei— . 8 Jáeramo agüiye piyapo jae reta uyapo rami. Echa'ã peRu uicuaa mbae uata peve vae ndei piyerure chupe jese mbove —jei—. 9 Jáeramo piyerure Tumpa pe cuarãi:

‘OreRu ara pe neĩ vae, tuyembıadoraca nderee.

10 Tou ndeproyocua.

Tuyeyapo nde ndere vae cua ivı pe ara pe uyeyapo oĩ rami.

11 Emeे oreve opa ara oreremiurã.

12 Embıasa oreve orembaeyoa reta, ore numbıasa ipotave iyoa orecoti vae pe rami.

13 Jare agüiye emaeño añã guasu re uyapoca vaerã oreve mbaeyoa.

Orerepi añã guasu güi.

Echa'ã nembae co mboroyocua.

Nde neni opaete mbaepuere.

Opaete vae nembıadorata jaeño mai pegua.

Amén.’

Jucuarãi piyerure —jei—.

14 Echa'ã pe reta pembıasa yave iyoa pecoti vae reta, peRu ara pe oĩ vae umbiasata vi peve pembaeıyoa reta —jei—. 15 Ērei pembıasa'ã yave iyoa pecoti vae reta, peRu ndarau vi umbıasa peve pembaeıyoa reta —jei—.

Tembıu güi uyecuacu vae reta

16 Piyecuacu tembıu güi yave, agüiye piyapo upurumbıtavi vae reta uyapo rami. Echa'ã jae

reta uyecuacu tembú güi yave, uyecuaa ipiatiti, ñru vae reta uicuaa vaerã uyecuacu co ñugüinoi tembú güi. Añete che jae peve, jae reta güinoita'ã imbaerã jucuarã uyapo ramo —jei—. ¹⁷ Ërei nde tembú güi ndiyecuacu yave, iyapicatu ndea jare iyovae, ¹⁸ agüiye vaerã ñru vae reta uicuaa ndiyecuacu co neĩ tembú güi. Jaeño ndeRu uicuaata ndiyecuacu co neĩ tembú güi vae. NdeRu uicuaata nde ndiyapo viari vae jare umeeta ndeve mbae opaete vae jovaque —jei—.

Piñuvatu mbaembae icavi vae piyupeguarã ara pe

(Lc 12.32-34)

¹⁹ Agüiye piñuvatu cua ivi pe jeta mbaembae icavi vae piyupeguarã. Echa'ã cua ivi pe cupii reta urucumegua mbaembae jare ñru mbaembae iyuquiri urucumegua, jare imonda vae reta uique viari mbaembae oñomi vaerã —jei—. ²⁰ Piñuvatu mbaembae icavi vae piyupeguarã ara pe. Echa'ã joco pe ndarau cupii reta urucumegua vaerã mbaembae jare ndarau mbae iyuquiri, jare ndarau imonda vae reta uique viari mbaembae oñomi vaerã —jei—. ²¹ Echa'ã piñuvatu yave mbaembae icavi vae piyupeguarã ivi pe, jecuaeño pepia pe piyeminguetata ivi pegua re. Ërei piñuvatu yave mbaembae icavi vae piyupeguarã ara pe, jecuaeño pepia pe piyeminguetata ara pegua re —jei—.

Tembipe yanderete pegua

(Lc 11.34-36)

²² Tembipe uique yanderete pe yanderesa rupi. Icavi yave nderesa, nderete tineeta tembipe

pe. ²³ Ĕrei icavi'ã yave nderesa, nderete tineeta pĩtumimbi pe. Nderete tineeta tẽi tembipe pe. Ĕrei tinee yave pĩtumimbi pe, pĩtumimbi ete co —jei—.

Mocui patrón

(Lc 16.13)

²⁴ Penti uyeyocui vae uipota yave uyeyocui mocui patrón pe, umitarẽita penti patrón jare uauta ĩru vae, ani uparaviqui cavita penti patrón pe jare güĩrĩrota ĩru vae. Pepuere'ã piyeyocui Tumpa pe corepoti peau reve —jei—.

Agüiye piyemipia'ã mbaembae re

(Lc 12.22-31)

²⁵ Jáeramo che jae peve, agüiye piyemipia'ã mbae re. Agüiye piyemipia'ã perembiurã vae re. Jae ramiño vi agüiye piyemipia'ã peremimonderã vae re. Ndarau pepuere pico cavi jecuaeño piyemipia'ã yave perembiurã vae re jare peremimonderã vae re —jei—. ²⁶ Pemae güira reta re. Jae reta umaeti'ã jare umbaeviro'ã. Uñuvatu'ã vi avati avatío pe. Ĕrei peRu ara pe oĩ vae umĩngaru reta. Jare Tumpa perau ete güira reta güi —jei—. ²⁷ Aramoi piyemipia'ã pipota tẽi pepucu ramo. Ĕrei ndarau etei pepuere piyembicucuaa pepucu ete vaerã —jei—.

²⁸ ¿Maera pa piyemipia'ã peremimonderã vae re? Pemae mbaepoti reta re, quirãi ucuacuaa reta. Uparaviqui'ã reta. Umaepova'ã reta vi. ²⁹ Ĕrei che jae peve, mbaepoti reta ipõra ete Salomón jemimonde ipõra vae güi. ³⁰ Tumpa omopõra ñana, yepe tẽi penti ara ñana oĩ co pe jare piareve pe ocai. Jáeramo Tumpa umeeta co peve peremimonderã.

Michi ete co pepurugüirovia —jei—. ³¹ Agüiye piyemipia'ã mbae re. Agüiye piyemipia'ã perembiurã vae re. Jae ramiño vi agüiye piyemipia'ã peremimonderã vae re —jei—. ³² Echa'ã opaete ivi pegua reta uyemipia'ã cua mbaembae re. Jare peRu ara pe oĩ vae uicuaa icavi co penoi vaerã opaete cua mbaembae —jei—. ³³ Èrei icavi co pipota ete vaerã Tumpa iporoyocua jare pipota vaerã piyapo jupi vae Tumpa jupi vae uyapo rami. Jucuarãi yave, Tumpa umeeta peve opaete cua mbaembae —jei—. ³⁴ Jáeramo agüiye piyemipia'ã piareve peguarã vae re. Echa'ã piareve pe uyeyapo yeta mbae pemipia'ã vaerã. Opa ara uyeyapo mbaembae pemipia'ã vaerã —jei—.

7

Agüiye piñera ñru vae re (Lc 6.37-38, 41-42)

¹ Agüiye piñera ñru vae re, agüiye vaerã ñru vae iñera peré. ² Echa'ã piñera yave ñru vae re, ñru vae iñerata vi peré. Jae ramiño vi icavi vae piyapo yave ñru vae pe, ñru vae uyapota vi icavi vae peve. Jae ramiño vi icavi mbae vae piyapo yave ñru vae pe, ñru vae uyapota vi icavi mbae vae peve —jei—. ³ Agüiye emae iti michi vae neñru jesa pe oĩ vae re, ime yave neno iiti tuicha vae nderesa pe —jei—. ⁴ Ndarau ndepuere ndere neñru pe: 'Cherivi, taequi nderesa güi jocua iti michi vae.' Echa'ã nde neno iiti tuicha vae nderesa pe —jei—. ⁵ Nde co jae upurumbitavi vae. Eequi rani iiti tuicha vae nderesa güi. Jayave netae cavita ndepuere vaerã ndeequi iiti michi vae neñru jesa güi —jei—.

⁶ Agüiye pemee mbae uñeñono tee Tumpa peguarã vae yimba reta pe. Jae ramiño vi agüiye piñono ita ipõra vae reta cuchi reta ñugüinoi vae rupi. Echa'ã jucuarãi piyapo yave, upĩrota jese reta jare aramoi uyerovata pesuu vaerã —jei—.

Yerure regua
(Lc 11.9-13; 6.31)

⁷ Piyerure Tumpa pe mbae re, jare Tumpa umeeta peve. Peeca, jare pevãeta. Pembopu onque, jare onque uyepeata peve —jei—. ⁸ Echa'ã piyerure yave Tumpa pe mbae re, Tumpa umeeta peve. Jare peeca yave mbae, pevãeta. Jare pembopu yave onque, uyepeata peve —jei—. ⁹ Nde nenoï yave penti nderai, nderai uyerure yave ndeve mbiyape re, ndarau nemee chupe penti ita mbiyape ipepica pe —jei—. ¹⁰ Jae ramiño vi nderai uyerure yave ndeve pira re, ndarau nemee chupe penti mboi pira ipepica pe —jei—. ¹¹ Yepe tẽi pe reta jecuaeño piyapo icavi mbae vae, ãrei pemee co mbaembae icavi vae pesambiai reta pe. Jáeramo peRu ara pe oï vae iquirẽi umee mbaembae icavi vae uyerure chupe jese vae reta pe —jei—.

¹² Jáeramo piyapo ñru vae reta pe pipota ñru vae reta uyapo vaerã peve vae rami. Echa'ã cua co jae mboroyocui jei vae jare Tumpa ñnee aracae umimbeu vae reta jei vae —jei—.

Onque ipi-rai vae
(Lc 13.24)

¹³ Pique onque ipi-rai vae rupi. Echa'ã onque ipiguasu vae rupi uique vae reta uguata tape ipiguasu vae rupi, ãrei yugüiraa cañitei pe. Jare

jeta vae uique jocua onque ipiguasu vae rupi — jei—. ¹⁴ Echa'ã onque ipi-rai vae rupi uique vae reta uguata tape ipi-rai vae rupi, ãrei yugüiraa tecove opa mbae vae güinoi vae reta ñugüinoi vae pe. Jare mbovĩño uvãe jocua onque ipi-rai vae — jei—.

Ía icavi vae jare ía icavi mbae vae
(Lc 6.43-45)

¹⁵ Amocue upurumbitavi vae reta jeita: ‘Che co jae Tumpa iñee umimbeu vae.’ Agüiye perovia. Jae reta jei peve uipota co umimbeu peve Tumpa iñee, ãrei uipota uyapo icavi mbae vae peve — jei—. ¹⁶ Picuaata jae reta upurumbitavi vae reta co icavi mbae vae uyapo ramo. Yaequi'ã uva penti yai jãti vae güi. Jae ramiño vi yaequi'ã i va penti yai jãti vae güi — jei—. ¹⁷ Penti temiti icavi vae umee ía icavi vae. Jae ramiño vi penti temiti icavi mbae vae umee ía icavi mbae vae — jei—. ¹⁸ Penti temiti icavi vae umee'ã ía icavi mbae vae. Jae ramiño vi penti temiti icavi mbae vae umee'ã ía icavi vae — jei—. ¹⁹ Temiti ía icavi'ã yave, iya uyasia jare uapi — jei—. ²⁰ Jáeramo picuaata jae reta upurumbitavi vae reta co icavi mbae vae uyapo ramo — jei—.

Pucuaa'ã etei
(Lc 13.25-27)

²¹ Jeta vae jeita cheve: ‘CheYa, cheYa.’ Ërei amocue jucuarãi jei vae ndarau yugüireco mboroyocua ara pegua pe. Echa'ã jaeño cheRu ara pe oĩ vae jei vae uyapo vae reta yugüirecota joco pe — jei—. ²² Jeta vae jeita cheve jocua ara: ‘CheYa, cheYa, ore numimbeu Tumpa iñee nderee pe. Jae ramiño vi nderee pe numbisiri aña reta

oya jese vae reta güi. Jae ramiño vi nderee pe nduyapo jeta miacañi reta.' Jucuarãi jeita —jei—. ²³ Ërei che jaeta chupe reta: 'Che pucuaa'ã etei. Pesiri chegüi. Echa'ã pe reta piyapo icavi mbae vae.' Jucuarãi jaeta —jei—.

Tenta iguapica
(Lc 6.46-49)

²⁴ Jáeramo ime yave quía uyapisaca cheré vae, jae uyapo yave che jae chupe uyapo vaerã vae, jae co penti cuimbae iyaracuaa vae jentarã uyapo vae rami. Echa'ã cuimbae iyaracuaa vae oñono jenta iguapicarã itape re —jei—. ²⁵ Jayave tuicha oqui jare jeta i usiri tenta coti. Tanta vi ivitu tenta re. I jare ivitu umbiyaparata tēi tenta. Ërei uyapara'ã. Echa'ã iguapica oí penti itape re —jei—.

²⁶ Ërei ime yave quía uyapisaca cheré vae, uyapo'ã yave che jae chupe uyapo vaerã vae, jae co penti cuimbae iyaracuaa mbae vae jentarã uyapo vae rami. Echa'ã cuimbae iyaracuaa mbae vae uyapo jentarã ivicuíti re —jei—. ²⁷ Jayave tuicha oqui jare jeta i usiri tenta coti. Tanta vi ivitu tenta re. I jare ivitu umbiyapara. Opa uyembai jocua tenta —jei.

²⁸ Jare Jesús opaete cua jei ma yave, opaete uyapisaca jese vae reta ipiacañi iporomboe re. ²⁹ Echa'ã omboe reta mbaepuere güinoi vae rami. Jucuarãi'ã oporomboe mboroyocui re oporomboe vae reta.

8

Jesús umbigüera cuimbae ipire ocui vae
(Mr 1.40-45; Lc 5.12-16)

¹ Jare Jesús ugüeyi ma ivitu guasu güi yave, jeta yugüiraa jaicue. ² Jayave ou Jesús oĩ vae pe penti cuimbae ipire ocui vae. Uyeatica Jesús jovai.

—CheYa, ndipota yave, ndepuere chembigüera —jei chupe.

³ Jayave Jesús oñono ipo jese.

—Aipota. Ecuera —jei chupe.

Jare jupivoiño cuimbae ucuera imbaerasi güi. Ocui'ã ma ipire. ⁴ Jayave Jesús jei chupe:

—Agüiye emimbeu quía pe. Ecu iyeechaca sacerdote pe, jare emee ofrenda Moisés peocui rami, tenta guasu pegua reta uicuaa vaerã ndecuera ma co —jei.

Jesús umbigüera sundaro reta juvicha jembiocui (Lc 7.1-10)

⁵ Jare Jesús oo uvãe yave Capernaum pe, ou jae oĩ vae pe penti sundaro reta juvicha uyerure vaerã chupe mbae re. ⁶ Jae jei Jesús pe:

—CheYa, cherembiocui imbaerasi oĩ cherenta pe. Ipuere'ã omi. Jasi ete oĩ chupe —jei.

⁷ Jayave Jesús jei chupe:

—Taa tambigüera.

⁸ Ërei sundaro reta juvicha jei chupe:

—CheYa, agüiye ecua cherenta pe. Echa'ã mbae'ã co che. Ndepuere ndere cua güiño cherembiocui ucuera vaerã jare ucuera co —jei—. ⁹ Echa'ã ime mburuvicha mbaepuere güinoi cheré vae reta. Jae ramiño vi che anoĩ mbaepuere sundaro reta re. Che jae penti sundaro pe: 'Ecu', jare jae oo. Jae ramiño vi che jae ñru sundaro pe: 'Eyu', jare jae ou. Jae ramiño vi che jae cherembiocui pe: 'Iyapo cua', jare jae uyapo —jei.

¹⁰ Jare Jesús cua uyandu yave, ipiacañi sundaro reta juvicha re, jare jei yugüiraa jaicue vae reta pe:

—Añete che jae peve, avãe'ã cua nunga mburugüirovia tuicha vae Israel pegua reta ipite pe.

¹¹ Jare che jae peve, jeta vae yugüeruta guarasi oẽ vae coti güi jare guarasi uique vae coti güi jare uguapita reta Abraham jare Isaac jare Jacob ndive mboroyocua ara pegua pe —jei—. ¹² Ërei mboroyocua pe yugüirecota tõi vae reta uyemombocata oca pe pítumimbi oĩ vae pe. Joco pe uyaota reta jare jãi umbiquiririuta —jei.

¹³ Jayave Jesús jei sundaro reta juvicha pe:

—Ndepuere ndeo. Ayapo ma ndipota ayapo vaerã vae nderovia cheré ramo —jei.

Jare jocua ora pe etei sundaro reta juvicha jembiocui ucuera.

Jesús umbigüera Pedro jaicho

(Mr 1.29-31; Lc 4.38-39)

¹⁴ Jare Jesús uique Pedro jenta pe yave, uecha Pedro jaicho jacu oĩ jupa pe. ¹⁵ Jayave Jesús uipisi ipo pe jare jacu upita voi chugüi. Jayave cuña upña jare umee mbae jou reta vaerã.

Jesús umbigüera jeta imbaerasi vae reta

(Mr 1.32-34; Lc 4.40-41)

¹⁶ Jare guarasi uique ma yave, tenta guasu pegua reta güeru Jesús pe jeta aña oya jese vae reta. Jayave Jesús oyocui aña reta usiri vaerã opaete oya jese vae reta güi, jare umbigüera opaete imbaerasi vae reta. ¹⁷ Jucuarãi uyapo Jesús uyeyapo vaerã Tumpa iñee aracae umimbeu vae Isaías jei vae. Echa'ã jae jei cuarãi: “Jae etei güiraa yandegüi yanembaerasi reta.”

Jesús jupíe uipota yugüiraa vae reta
(Lc 9.57-62)

¹⁸ Jare jeta yugüeru Jesús oĩ vae pe. Jare Jesús uecha yave, jei jemimboe reta pe yugüiraa vaerã ì guasu jovaicho pe. ¹⁹ Jare penti mboroyocui re oporomboe vae ou Jesús oĩ vae pe jare jei chupe:

—Oporomboe vae, taa nderupíe opaete que rupi ndeo vae rupi.

²⁰ Jayave Jesús jei chupe:

—Aguara reta güinoi icua reta, jare güira reta güinoi jaiti reta. Ërei che cuimbaerã ayeyapo vae mbaeti cherenta —jei.

²¹ Jare ìru jemimboe jei Jesús pe:

—CheYa, emaeño rani cheré aa vaerã aico cheru re umano regua.

²² Ërei Jesús jei chupe:

—Eyu cherupíe. Tecove opa mbae vae güinoi mbae vae reta toñoti umano vae reta —jei.

Jesús umiquĩi ivitu jare ì guasu
(Mr 4.35-41; Lc 8.22-25)

²³ Jayave Jesús uyupi chalana pe jare jemimboe reta vi uyupi pipe. ²⁴ Jare ou ivitu tanta uyepeyu, jare ì uyembiaparoaroa uique chalana pe, jare umitínee seri ma. Ërei Jesús oque oĩ. ²⁵ Jayave Jesús jemimboe reta yugüiraa omomba. Jei reta chupe:

—OreYa, orerepi. Ñamanota ma.

²⁶ Jayave Jesús jei chupe reta:

—¿Maera pa pequiye? Michi ete co pepu-rugüirovia —jei.

Jayave upüa jare uñeengata ivitu jare ì guasu pe. Jare opaete voi quĩi ngatu upita. ²⁷ Jare Jesús jemimboe reta ipiacañi jare jei:

—¿Mbae nunga cuimbae pa cua? Ivitu jare i guasu uyapo jae oyocui vae.

Mocui cuimbae aña oya jese vae reta

(Mr 5.1-20; Lc 8.26-39)

²⁸ Jayave yugüiraa uvãe i guasu jovaicho pe, gadareno reta ivi pe. Jare yugüeru teögüerirurenda güi oovãiti Jesús mocui cuimbae aña oya jese vae reta. Pochi reta. Jáeramo mbaeti quía ipuere uguata jocua tape rupi. ²⁹ Jare jae reta iñeeãta reve jei:

—¿Maera pa ndeyu oremambeco, Jesús? Nde co jae Tumpa Tai. ¿Ndeyu pa ndiporaraca oreve añave? Taicue rupi ramo co ndiporaracata tẽi oreve —jei reta.

³⁰ Jare mbiri catu jeta cuchi reta ucaru ñugüinoi.

³¹ Jare aña reta uyerure Jesús pe:

—Cua cuimbae reta güi orembisiri yave, emaeño oreré ndoo vaerã ndoya cuchi reta re.

³² Jayave Jesús jei chupe reta:

—Pecua.

Jare yugüiraa ma yave cuimbae reta güi, aña reta yugüiraa oya cuchi reta re. Jayave opaete cuchi reta tanta osi ivia rupi oa i guasu pe, jare joco pe opa ipitupa reta.

³³ Jayave cuchi iyandarecoa reta opa osi, jare yugüiraa tenta guasu pe, jare umimbeu joco pegua reta pe opaete uyeyapo vae regua. Umimbeu vi chupe reta mbae aña oyase jese vae reta pe uyeyapo vae. ³⁴ Jayave opaete joco pegua reta yugüeru oovãiti Jesús. Jare uecha yave, umiñera oo ye vaerã jae reta ivi güi.

9

*Jesús umbigüera cuimbae ipuere mbae omi vae
(Mr 2.1-12; Lc 5.17-26)*

¹ Jare Jesús uyupi ye penti chalana pe jare oo ye i guasu jovaicho pe. Jayave oo uvãe jenta guasu pe. ² Jayave amocue vae güeru penti cuimbae imbaerasi vae. Cua cuimbae ipuere mbae omi vae. Jupa pe oĩ. Jesús cua uecha yave, uicuaa jae reta güirovia co jese, jare jei cuimbae ipuere mbae omi vae pe:

—Iyerovia, cherivi. Nembaeyoa reta uyembai ma —jei.

³ Jayave amocue mboroyocui re oporomboe vae reta ipia pe uyemingueta: “Cua cuimbae jei icavi mbae vae Tumpa coti.”

⁴ Ërei Jesús uicuaa jae reta ipiayemingueta, jare jei chupe reta:

—¿Maera pa penoi pepia pe yemingueta icavi mbae vae reta? ⁵ Chepuere jae cua cuimbae pe: ‘Nembaeyoa reta uyembai ma.’ Jae ramiño vi chepuere jae chupe: ‘Epũa eguata.’ ¿Mbae nunga pa yavai jae vaerã? —jei—. ⁶ Ërei aipota picuaa vaerã cua: Che cuimbaerã ayeyapo vae chepuere ambiasa quía pe imbaeyoa reta cua ivi pe aĩ ram-bueve —jei.

Jayave jei cuimbae ipuere mbae omi vae pe:

—Epũa evoi nderupa, jare ecua nerenta pe.

⁷ Jayave cuimbae upũa, jare oẽ oo jenta coti.

⁸ Ërei jeta joco pe ñugüinoi vae reta uecha yave, uquiye jare umbiadora reta Tumpa, mbaepuere tuicha vae umee Jesús pe ramo.

Jesús ueni Mateo
(Mr 2.13-17; Lc 5.27-32)

⁹ Jare Jesús joco güi oo yave, uecha penti cuim-bae Mateo jee vae uguapi oĩ mburuvicha peguarã ocovara ñugüinoi vae pe, jare jei chupe:

—Eyu cherupíe.

Jayave Mateo upũa, jare oo jae jupíe.

¹⁰ Jare Jesús ucaru oĩ rambueve Mateo jenta pe, jeta mburuvicha peguarã ocovara vae reta jare teco icavi mbae vae uyapo vae reta yugüeru ucaru vaerã Jesús jare jemimboe reta ndive. ¹¹ Jare fariseo reta cua uecha yave, jei Jesús jemimboe reta pe:

—¿Maera pa ucaru pemboe vae ocovara vae reta jare teco icavi mbae vae uyapo vae reta ndive?

¹² Ërei Jesús cua uyandu yave, jei chupe reta:

—Icove catu vae reta ueca'ã upurupiano vae. Imbaerasi vae retaño ueca —jei—. ¹³ Pecua piyemboe mbae uipota jei cua: 'Aipota pepuruparareco vaerã, aipota'ã maemimba uyeyucacue reta pemee cheve vaerãño.' Echa'ã che ayu aeca vaerã iyoa vae reta. Ayu'ã aeca vaerã jupí vae reta —jei.

Maera Jesús jemimboe reta uyecuacu'ã tembú güi

(Mr 2.18-22; Lc 5.33-39)

¹⁴ Jayave yugüeru Juan jemimboe reta Jesús oĩ vae pe jare upirandu chupe:

—¿Maera pa ore jare fariseo reta nduyecuacu tembú güi, ërei nderemimboe reta uyecuacu'ã tembú güi?

¹⁵ Jayave Jesús jei chupe reta:

—Umendata vae pe ñugüinoi vae reta ndarau etei uyecuacu tembíu güi, umendata vae jae reta ndive oĩ rambueve. Ërei outa uvãe ara umendata vae uyereraaca vaerã chugüi reta. Jayave ramo uyecuacuta tembíu güi —jei—.

¹⁶ Icavi'ã yamboya vaerã temimonde indechi vae maemboyaa ipiaú vae pe. Echa'ã jucuarã yayapo yave, maemboyaa ipiaú vae umiãta temimonde indechi vae, jare temimonde jeiete osoro —jei—. ¹⁷ Jae ramiño vi icavi'ã yambiru vaerã vino ipiaú vae vino jiru guacapi indechi vae pe. Echa'ã jucuarã yayapo yave, vino omondoro jiru, jare vino uyepiyere, jare jiru icavi'ã ma. Jáeramo yambiru vino ipiaú vae jiru ipiaú vae pe. Echa'ã jucuarã yayapo yave, jiru osoro'ã jare vino uyepiyere'ã —jei.

*Jairo tayi jare cuña Jesús jemimonde uyaviqui vae
(Mr 5.21-43; Lc 8.40-56)*

¹⁸ Jare Jesús cua jei chupe reta rambueve, ou Jesús oĩ vae pe uvãe penti mburuvicha. Jae uyeatica Jesús jovai jare jei:

—Cherayi umanota ma oĩ. Ërei yaa iñono ndepo jese embigüera, agüiye vaerã umano —jei.

¹⁹ Jayave Jesús jare jemimboe reta yugüiraa mburuvicha jupíe.

²⁰ Jare penti cuña doce año ma uiporara tugüiguasu vae oya Jesús re icupe coti jare uyaviqui jemimonde jembei. ²¹ Echa'ã jae jei ma iyupe ipia pe: “Yepe tēi jemimondeño tayaviqui, acuerata co.” ²² Ërei Jesús uyerova, jare uecha yave, jei chupe:

—Cherindi, ndepiacatu. Ndecuera ma nderovia cheré ramo.

Jare jupivoiño cuña ucuera.

²³ Jare Jesús uique mburuvicha jo pe yave, uecha uyemimbi vae reta umiñee ma jemimbi reta teõgüe güiraa oñoti vaerã jare jeta joco pe yati ñugüinoi vae reta umbiapu ñugüinoi. ²⁴ Jayave jei chupe reta:

—Pecua oca pe. Cua cuñatai umano'ã co. Oqueño co oĩ—jei.

Ërei joco pe ñugüinoi vae reta oyoyai Jesús. ²⁵ Jayave Jesús omoë opaete vae oca pe. Jayave uique ye o pe jare uipisi cuñatai ipo pe, jare cuñatai upũa voi. ²⁶ Jare opaete jocua ivi pegua reta pe jerãcua quirãi Jesús uyapo cua miacañi.

Mocui cuimbae jesa mbae vae reta

²⁷ Jare Jesús joco güi oo yave, mocui cuimbae jesa mbae vae reta yugüiraa jaicue, jare iñeeãta reve jei chupe:

—Nde co jae David iñemoñaã reta pegua. Oreparareco.

²⁸ Jare Jesús uique ma yave o pe, cuimbae jesa mbae vae reta vi uique jaicue. Jayave Jesús upirandu chupe reta:

—¿Perovia pa chepuere co ayapo cua peve?

—Ndugüirovia, oreYa—jei reta.

²⁹ Jayave Jesús uyaviqui jae reta jesa, jare jei chupe reta:

—Perovia ramo, pemaë.

³⁰ Jare mocui reve ipuere umae. Jayave Jesús jei chupe reta:

—Agüiye pemimbeu quía pe ave.

³¹ Ërei jae reta yugüiraa ma yave, umimbeu jeta jocua ivi pegua reta pe Jesús uyapo chupe reta vae.

Iupa vae umbipi uyemingueta

³² Jare jae reta yugüiraa ma yave, ñru vae reta güeru Jesús oĩ vae pe penti cuimbae iupa vae, añã oya jese vae. ³³ Jayave Jesús umbisiri añã chugüi jare iupa vae umbipi uyemingueta. Jare jeta vae reta ipiacañi jare jei reta:

—Yaecha'ãi cua nunga miacañi Israel pe.

³⁴ Ërei fariseo reta jei:

—Añã guasu imbaepuere pe umbisiri añã reta oya jese vae reta güi.

Jeta co yaaviro vaerã

³⁵ Jare Jesús oo opaete tenta guasu reta jare tenta guasu-rai reta rupi, jare oporomboe judío reta itupaopao pe. Umimbeu ñee icavi vae Tumpa iporoyocua pegua, jare umbigüera imbaerasi vae reta ipotave mbaerasi güi. ³⁶ Ërei uecha yave jeta vae, uiparareco umae jese reta. Echa'ã jae reta uyemipia'ã jare ipiatiti. Ovecha mbaeti iyandarecoa güinoi vae reta rami co. ³⁷ Jayave Jesús jei jemimboe reta pe:

—Jeta ete co yaaviro vaerã. Ërei mbovi ete co umbaeviro vae reta. ³⁸ Jáeramo pe reta piyerure yandeYa pe omondo vaerã uparaviqui vae reta umbaeviro reta vaerã —jei.

10

*Jesús jemimondo reta jee
(Mr 3.13-19; Lc 6.12-16)*

¹ Penti ara Jesús umbati jocua doce jemimboe reta, jare umee chupe reta mbaepuere umbisiri vaerã aña reta oya jese vae reta güi jare umbigüera vaerã imbaerasi vae reta ipotave mbaerasi güi. ² Cua co jae jocua doce Jesús jemimondo reta jee: Simón (Pedro jee vae), jare Simón tiví Andrés jee vae, jare Zebedeo tai reta Jacobo jare Juan jee vae, ³ Felipe, Bartolomé, Tomás, Mateo ocovara vae, Alfeo tai Jacobo jee vae, Tadeo, ⁴ Simón (jae co Zelote pe ueni vae), jare Judas Iscariote (cua cuimbae umee Jesús jovaicho reta pe).

Jesús omondo jocua doce jemimboe reta
(Mr 6.7-13; Lc 9.1-6)

⁵ Jare ndei omondo reta mbove, Jesús oyocui cua doce reve.

—Agüiye pecua judío mbae vae reta ñugüinoi vae pe. Agüiye pecua Samaritano jenta guasu reta pe —jei—. ⁶ Pecua Israel pegua reta ñugüinoi vae pe. Echa'ã jae reta ovecha ucañi vae reta rami co —jei—. ⁷ Jare peguata rambueve, pemimbeu ñru vae reta pe cuarã: 'Mboroyocua ara pegua outa ma uvãe' —jei—. ⁸ Pembigüera imbaerasi vae reta. Pembigüera ipire ocui vae reta. Pembijecove ye umanocue vae reta. Pembisiri aña reta oya jese vae reta güi. Che amee ma peve cua mbaepuere jepi mbae reve. Jáeramo agüiye pecovara mbae quía pe piyapota chupe vae re —jei—. ⁹ Agüiye peraa oro jare corepoti. ¹⁰ Agüiye vi peraa peu-rupucu, jare agüiye peraa mocui camisa. Peraa jaeño penti pepopoca jare pepipasa pemonde vae. Echa'ã icavi co ñru vae reta umbiepi vaerã up-araviqui vae pe —jei—.

¹¹ Jare peo yave penti tenta guasu pe ani penti tenta guasu-rai pe, pepirandu quía ra pepuere perovia catu joco pe. Jayave pico joco pe peo ye regua —jei—. ¹² Jare pevãe yave penti tenta pe, pere: ‘Tumpa tumee peve mbiacatu.’ ¹³ Jare pepuere yave perovia catu joco pe yugüireco vae reta, Tumpa umeeta chupe reta mbiacatu. Ërei pepuere'ã yave perovia catu, pe retaño penoita mbiacatu —jei—. ¹⁴ Jare ime yave tenta pegua reta ani tenta guasu pegua reta uipota'ã pepita vaerã joco pe jare uipota'ã uyapisaca peré vae, pecuaño joco güi, jare pemitimo ivicuii pepi güi —jei—. ¹⁵ Añete co jae peve, Tumpa uãa yave ivi pegua reta, jocua tenta guasu pegua reta tanta uiporarata Sodoma jare Gomorra pegua reta güi —jei—.

Uiporarata co

¹⁶ Mase, pomondo icavi mbae vae uyapo vae reta ipite rupi. Pe reta ovecha reta rami co. Jae reta co yaguapïta reta rami. Jáeramo pearacuaa catu mboi iyaracuaa catu rami. Jae ramiño vi agüiye piyapo icavi mbae vae picasu uyapo'ã icavi mbae vae rami —jei—. ¹⁷ Piñemoa ngatu. Echa'ã ñru vae reta pereraata mburuvicha reta yati vae pe, uñeapo vaerã peré. Jare penupata judío reta itupao reta pe —jei—. ¹⁸ Jare piyereraacata mburuvicha reta jare mburuvicha guasu reta jovai chereco pegua, pepuere vaerã chemimbeu chupe reta jare judío mbae vae reta pe —jei—. ¹⁹ Ërei jae reta pemee yave, agüiye piyemipia'ã mbae pereta mburuvicha reta pe vae re. Echa'ã Espíritu Santo uicuaacata peve jocua ora pe etei

mbae pere vaerã —jei—. ²⁰ Echa'ã peRu iEspíritu pembedorita piyemingueta vaerã, pe retaiño'ã co piyeminguetata —jei—.

²¹ Jare penti cuimbae umeeta tivi uyeyucaca vaerã. Jae ramiño vi penti cuimbae umeeta tai uyeyucaca vaerã. Jare sambiaí reta oyovaichota tu jare ichi ndive, jare uyucacata —jei—. ²² Jare piñemitarẽicata opaete vae pe chereco pegua. Ërei jõsata oo uvãe iyapi pe vae uyembiasacata co —jei—. ²³ Ërei penti tenta guasu pe uyapo reta icavi mbae vae peve yave, pesi ñru tenta guasu pe. Añete che jae peve, ndarau peo opaete Israel pegua reta jenta guasu pe ndei che cuimbaerã ayeyapo vae ayu ye mbove —jei—.

²⁴ Penti uyemboe oĩ vae uicuaa ete'ã oporombõe vae uicuaa vae rami. Jae ramiño vi penti uyeyocui vae imbaepuere tuicha'ã ete ipatrón imbaepuere rami —jei—. ²⁵ Icavi co penti uyemboe oĩ vae uyemboe cavi vaerã oporombõe vae uicuaa vae re. Jae ramiño vi icavi co penti uyeyocui vae uiporu cavi vaerã mbaepuere ipatrón umee chupe vae. Che co jae peYa, jare ñru vae reta chembijee Beelzebú. Jáeramo pembijeeta Beelzebú tai reta. Echa'ã pe reta piyeyocui cheve —jei—.

Pequiye Tumpa güi
(Lc 12.2-7)

²⁶ Ërei agüiye pequiye chugüi reta. Ime yave mbae uyeyasoi vae, uyeechacañotai co. Jare ime yave mbae uñeñomi vae, uyecuaañotai co —jei—. ²⁷ Pĩtumimbi pe che jae peve vae re piyemingueta tembipe pe. Jare che jae viari peve vae pemimbeu

opaete vae pe —jei—. ²⁸ Agüiye pequiye upuruyuca vae reta güi. Echa'ã pereteño ipuere uyuca. Ipuere'ã uyuca perecove. Pequiye Tumpa güi. Echa'ã jae ipuere omondo quía jete jare jecove tata guasu pe —jei—. ²⁹ Picuaa co quirãi umaemee vae reta umee mocui güira-rai mbovi ete corepoti re. Ërei mbaeti penti yepe umano oa ivi pe peRu uicuaa'ã reve —jei—. ³⁰ Tumpa uicuaa mbovi pea penoi peãca re vae —jei—. ³¹ Jáeramo agüiye pequiye. Echa'ã Tumpa perau ete jeta güira-rai reta güi —jei—.

*Ïru vae reta jovaque uyecuaaca vae
(Lc 12.8-9)*

³² Ime yave quía Ïru vae reta jovaque jei yave: ‘Che co jae Jesús jemimboe’, che jaeta cheRu ara pe oï vae jovaque: ‘Cua co jae cheremimboe’ —jaeta, jei Jesús—. ³³ Ërei ime yave quía Ïru vae reta jovaque checuacu vae, che vi aicuacuta cheRu ara pe oï vae jovaque —jei—.

*Ayu uyembiyao vaerã uyugüi ivi pegua reta
(Lc 12.51-53; 14.26-27)*

³⁴ Aramoi pepia pe piyemingueta che ayu co amee vaerã mbiacatu ivi pegua reta pe. Ërei jucuarãi'ã co. Che ayu uyembiyao vaerã uyugüi ivi pegua reta, mbaeti güinoi vaerã mbiacatu —jei—. ³⁵ Ayu penti cuimbae oyovaicho vaerã tu ndive, jare cuñatai oyovaicho vaerã ichi ndive, jare cuña oyovaicho vaerã imesi ndive —jei—. ³⁶ Jare cuimbae jenta pegua reta oyovaichota jae ndive —jei—. ³⁷ Ime yave quía uau ete tu jare ichi chegüi vae, ndarau ipuere ico cheremimboerã. Jae ramiño vi

ime yave quía uau ete isambiai reta chegüi vae, ndarau ipuere ico cheremimboerã —jei—. ³⁸ Jare ime yave quía ovoi'ã icurusu oo vaerã cherupíe vae, ndarau ipuere ico cheremimboerã —jei—. ³⁹ Uipotã uñuvatu jecove vae ndarau ipuere. Ërei umeeta jecove chereco pegua vae uñuvatuta co —jei—.

Ambijecoviata co chupe
(Mr 9.41)

⁴⁰ Ime yave quía uyapo icavi vae peve, cheve uyapo icavi vae. Jare jocua cheve uyapo icavi vae, uyapo vi icavi vae chembou vae pe —jei—. ⁴¹ Ime yave quía icavi vae uyapo penti Tumpa iñee umimbeu vae pe Tumpa iñee umimbeu ramo, Tumpa umeeta chupe iñee umimbeu vae pe umeeta vae. Jae ramiño vi ime yave quía icavi vae uyapo penti jupi vae uyapo vae pe jupi vae uyapo ramo, Tumpa umeeta chupe jupi vae uyapo vae pe umeeta vae —jei—. ⁴² Añete che jae peve, ime yave quía umeeta penti vaso i roïsa vae yepe penti sambiaï jou vaerã vae, uyapo yave jucuarãï jae co cheremimboe ramo, ambijecoviata co chupe —jei—.

11

Juan ombou vae reta
(Lc 7.18-35)

¹ Jare Jesús opa ma oyocui yave jocua doce jemimboe reta, jae etei oo joco güi oporomboe vaerã jare umimbeu vaerã Tumpa iñee Israel pegua tenta guasu reta pe.

² Jare Juan peresoriru pe oĩ rambueve, uicuaa Cristo uyapo oĩ vae regua. Jayave ombou mocui jemimboe reta Jesús oĩ vae pe ³ jei vaerã chupe:

—¿Nde pa co jae Cristo outa vae? ani ¿nuãrota pa ñru vae ou vaerã?

⁴ Jayave Jesús jei chupe reta:

—Pecua ye pemimbeu Juan pe piyandu jare peecha vae regua. ⁵ Jesa mbae vae reta umae ma. Ìpuere mbae uguata vae reta uguata ma. Ìpire ocui vae reta ucuera ma. Ìyapisa mbae vae reta uyandu ma. Umanocue vae reta icove ye ma. Ìparavete vae reta uyapisaca ñee icavi vae re — jei—. ⁶ Jare Tumpa umivendiseta jecuae güirovia cheré vae reta — jei.

⁷ Jare yugüiraa ye yave Juan ombou vae reta, Jesús umbipi umingueta joco pe ñugüinoi vae reta Juan re. Jei chupe reta:

—¿Quía re pa co peo ñuu pe pemae? Jae ipirãta mbae vae'ã co tacuarãsi omi ivitu uipeyu yave vae rami — jei—. ⁸ ¿Quía re pa co peo pemae? Jae omonde'ã temimonde ipõra vae. Mase, temimonde ipõra vae omonde vae reta yugüireco mburuvicha guasu reta jenta pe — jei—. ⁹ ¿Quía re pa co peo pemae? ¿Peo ra pemae vaerã penti Tumpa ñee umimbeu vae re? Añete che jae peve, Tumpa umee chupe uyapo vaerã jeta ete ñru Tumpa ñee umimbeu vae reta uyapo vae güi — jei—. ¹⁰ Tumpa ñee uyecuatía oĩ jese cuarãi:

‘Mase’ — jei Tumpa —, ‘che amondota chiñee güiraata vae nderenonde, uyapicatu vaerã nderaperã.’

Jucuarãi uyecuatía oĩ — jei—. ¹¹ Añete che jae peve, Tumpa umee Juan upurumbibautizase vae

pe uyapo vaerã jeta ete ñru Tumpa iñee umimbeu vae reta uyapo vae güi. Ërei taicuegua vae ara pegua mboroyocua pegua uyembutuichaca eteta Juan güi —jei—. ¹² Juan upurumbibautizase vae umbipì Tumpa iporoyocua regua umimbeu güive, opaete vae uipota uique jocua mboroyocua ara pegua pe —jei—. ¹³ Echa'ã opaete Tumpa iñee aracae umimbeu vae reta uicuatía vae jare mboroyocui vi uicuaaca Tumpa iporoyocua regua ndei Juan ou mbove —jei—. ¹⁴ Jare pipota yave perovia, jae co Elías. Echa'ã Tumpa iñee aracae umimbeu vae jei outa co Elías —jei—. ¹⁵ Uipota uyandu vae tuyapisaca cua re —jei—.

¹⁶ Tamimbeu peve mbae ndive amboyovaque añave yugüireco vae reta. Jae reta co sambiaì plaza pe uguapì ñugüinoi vae reta rami. Jae reta jei uyupe cuarãi: ¹⁷ 'Nduyemimbi ma peve, ërei pe reta pepirae'ã. Orepitatiti perovaque, ërei pe reta piyao'ã.' Jucuarãi jei —jei—. ¹⁸ Echa'ã Juan ou, jare jae uyecuacu tembú jare vino güi. Jáeramo uicuaa vae reta jei ña oya co Juan re —jei—. ¹⁹ Che cuimbaerã ayeyapo vae ayu, jare che ayecuacu'ã tembú jare vino güi. Jáeramo checuaa vae reta jei cuarãi: 'Mase, jae jou jeta tembú jare vino. Jae co mburuvicha peguarã ocovara vae reta jare teco icavi mbae vae uyapo vae reta iamigo.' Jucuarãi jei —jei—. Ërei opaete iyaracuaa vae reta uicuaaca aracuaa icavi co —jei—.

*Tenta guasu pegua uiporarata vae reta
(Lc 10.13-15)*

²⁰ Jayave Jesús umbipì uñeengata jocua tenta guasu jeta miacañi uyapo pipe vae reta pe. Echa'ã

jocua tenta guasu pegua reta ueya'ã iyemingueta icavi mbae vae ipia pe oĩ vae. Jae jei:

²¹ —Corazín pegua reta uiporarata co. Betsaida pegua reta uiporarata co. Echa'ã jeta miacañi reta ayapo ipite pe chembaepuere pe. Jucuarãi ayapo yave mona Tiro jare Sidón pe, joco pegua reta uey-ata tẽi aracae ma iyemingueta icavi mbae vae ipia pe oĩ vae. Omondeta tẽi temimonde jaimbe vae jare oñonota tẽi tanimbu iñãca re uicuaaca vaerã ipiatiti co —jei—. ²² Ërei che jae peve, Tumpa uãa yave ivi pegua reta, Corazín jare Betsaida pegua reta tanta uiporarata Tiro jare Sidón pegua reta güi —jei—. ²³ Jare Capernaum pegua reta ipia pe uyemingueta tẽi icavi co yugüireco vaerã Tumpa ndive. Ërei Tumpa omondota reta yugüireco vaerã cañitei pe. Echa'ã jeta miacañi reta ayapo ipite pe chembaepuere pe. Jucuarãi ayapo yave mona Sodoma pe, Sodoma ndarau tẽi uyembai —jei—. ²⁴ Ërei che jae peve, Tumpa uãa yave ivi pegua reta, Capernaum pegua reta tanta uiporarata Sodoma pegua reta güi —jei.

Peyu checoti peputuu vaerã

(Lc 10.21-22)

²⁵ Jayave Jesús jei:

—CheRu, nde co jae ara pegua reta jare ivi pegua reta iYa. Ameer yasurupai ndeve quirãi nde nemaño'ã cua ivi pegua iyaracuaa vae reta re uicuaa vaerã cua mbaembae, ãrei ndicuaaca sambiaí rami vae reta pe. ²⁶ Icavi co, cheRu. Echa'ã icavi co ndeve ndiyapo vaerã jucuarãi —jei.

²⁷ Jayave jei vi:

—CheRu umee ma cheve opaete. Mbaeti quía uicuaa cavi cheregua, jaeño cheRu. Jae ramiño vi mbaeti quía uicuaa cavi cheRu regua, jaeño che jare che aicuaaca chupe vae reta —jei—.

²⁸ Opaete piyemipia'ã jare pepiatiti pico vae reta peyu checoti. Che tambuputuu perecove —jei—. ²⁹ Piñemĩru che ndive jare piyemboe che aipota pomboe jese vae re. Echa'ã che añemimichi. Ayembutuicha'ã etei. Jucuarãi piyapo yave, perecove uputuuta —jei—. ³⁰ Echa'ã piñemĩru yave che ndive, ndarau piyemipia'ã jare ndarau pepiatiti —jei.

12

*Jesús jemimboe reta uipoo trigo mbutuu ara pe
(Mr 2.23-28; Lc 6.1-5)*

¹ Mbutuu ara pe Jesús oo co rupi jemimboe reta ndive. Jesús jemimboe reta iyembaí jare umbipi uipoo trigo jare jou. ² Èrei fariseo reta uecha yave, jei Jesús pe:

—Mase, nderemimboe reta uyapo ñugüinoi agüiyeta tēi uyapo mbutuu ara pe vae.

³ Jayave Jesús jei chupe reta:

—¿Pemingueta'ã pa David uyapocue vae regua, jae jare jae ndive ñugüinoi vae reta iyembaí yave?

⁴ David uique Tumpa jo pe jare jou mbiyape Tumpa jo pe uñeño tee vae reta. Agüiyeta tēi co David jare jae ndive ñugüinoi vae reta jou jocua mbiyape. Jaeño sacerdote reta ipuere jou —jei—. ⁵ Jare ¿pemingueta'ã etei pa mboroyocui pe quirã mbutuu ara pe sacerdote Tumpa jo pe ñugüinoi vae reta uyapo agüiyeta tēi quía uyapo

mbutuu ara pe vae? Ërei Tumpa umbijeco'ã reta —jei—. ⁶ Ërei che jae peve, che cua pe aĩ vae ayembutuichaca ete Tumpa jo güi —jei—. ⁷ Ërei picuaa'ã mbae uipota jei cua Tumpa iñee pe uye-cuatía oĩ vae: 'Aipota pepuruparareco vaerã' —jei Tumpa—, 'aipota'ã maemimba uyeyucacue reta pemee cheve vaerãño.' Jucuarãi uyecuatía oĩ. Echa'ã picuaa yave mona, ndarau tēi pembijeco mbaeti teco güinoi vae reta —jei—. ⁸ Echa'ã che cuimbaerã ayeyapo vae chepuere jae mbae icavi uyeyapo vaerã mbutuu ara pe —jei.

Cuimbae ipo jovaicho tipa vae
(Mr 3.1-6; Lc 6.6-11)

⁹ Jare Jesús oo joco güi uique judío reta itupao pe. ¹⁰ Jare joco pe oĩ penti cuimbae ipo jovaicho tipa vae. Jare joco pe ñugüinoi vae reta upirandu Jesús pe:

—¿Icavi pa yambigüera vaerã quía mbutuu ara pe? ¿Mbae pa jei mboroyocui cua re? —jei reta.

Echa'ã jae reta uipota tēi umbijeco Jesús.

¹¹ Jayave Jesús jei chupe reta:

—Penti cuimbae güinoi yave penti ovecha, jare ovecha oa yave ivicua pe mbutuu ara pe, cuimbae uipisi voita güinoẽ ivicua güi. ¹² Ërei penti cuimbae jepi ete penti ovecha güi. Jáeramo jupi co yayapo vaerã icavi vae mbutuu ara pe —jei.

¹³ Jayave jei cuimbae pe:

—Eupi ndepo.

Jayave cuimbae ipo uupi, jare ucuera voi. Oy-ovaque ma ipo jovaicho ipo icavi vae ndive. ¹⁴ Jayave fariseo reta oẽ judío reta itupao güi, jare uyemboemboe quirã ra uyucacata Jesús.

Cherembiocui aiparavo vae

15 Ërei Jesús cua uicuaa yave, oo joco güi. Jare jeta vae reta yugüiraa jaicue, jare Jesús umbigüera opaete imbaerasi vae reta. 16 Jare Jesús oyocui reta agüiye vaerã umimbeu quía co jae vae.

17 Cua uyapo, uyeyapo vaerã Tumpa iñee aracae umimbeu vae Isaías jei vae. Echa'ã jae jei cuarãi:

18 “Mase, jae co cherembiocui aiparavo vae” —jei Tumpa—.

“Aau ete. Ayerovia tuicha jese.

Ameeta chupe cheEspíritu, jare jae uãata judío mbae vae reta.

19 Ndarau uyeaca quía ndive. Ndarau vi quía uyandu iñee calle rupi.

20 Ndarau uaquio tacuarãsi uyeca vae.

Ndarau vi ombove mechero michi ete jendi oĩ vae, ndei upurumiamiri upuruãa vaerã mbove.

21 Jare jae jee re judío mbae vae reta güiroviata.” Jucuarãi jei.

Jei reta icavi mbae vae Espiritu Santo coti
(Mr 3.20-30; Lc 11.14-23; 12.10)

22 Jayave amocue vae güeru Jesús oĩ vae pe penti cuimbae aña oya jese vae. Cuimbae jesa mbae vae jare iupa vi. Jare Jesús umbigüera. Cuimbae umae ma jare uyemingueta ma. 23 Jare opaete joco pe ñugüinoi vae reta ipiacañi jare jei:

—¿Cua ra co jae David iñemoñaeta pegua?

24 Ërei fariseo reta cua uyandu yave, jei reta:

—Aña guasu Beelzebú imbaepuere pe umbisiri aña reta oya jese vae reta güi.

25 Jesús uicuaa fariseo reta ipiayemingueta jare jei chupe reta:

—Penti tenta guasu pegua reta oyovaicho uyupii yave, opata co jocua tenta guasu. Jae ramiño vi penti tenta pegua reta oyovaicho uyupii yave, opata co jocua tenta —jei—. ²⁶ Jare Satanás umbisiri yave Satanás oya jese vae reta güi, imbaepuere uyembiyao ma co. Jáeramo ndarau etei ma oĩ iporoyocuia —jei—. ²⁷ Ërei che ambisiri yave aña reta oya jese vae reta güi Beelzebú imbaepuere pe, ¿quía imbaepuere pe ra umbisiri aña reta oya jese vae reta güi perentarã reta? Pepuere pepirandu chupe reta jese —jei—. ²⁸ Ërei che ambisiri aña reta oya jese vae reta güi Tumpa iEspíritu imbaepuere pe. Jáeramo pepuere picuaa ou ma co uvãe peve Tumpa iporoyocuia —jei—.

²⁹ Ime yave quía uipota uique cuimbae ipirãta vae jenta pe upiõro vaerã imbaembae chugüi vae, uipocuata rani cuimbae ipirãta vae. Jayave ramo ipuereta upiõro imbaembae chugüi —jei—.

³⁰ Ime yave quía uipota'ã ico cheĩrurã vae, oyovaicho co che ndive. Jae ramiño vi ime yave quía chembori'ã vae, uyapo co icavi mbae vae checoti —jei—. ³¹ Jáeramo che jae peve, opaete ivi pegua reta imbaeyoa reta jare opaete iñee icavi mbae Tumpa coti vae Tumpa ipuere umbai. Ërei Tumpa ndarau etei umbiasa jei icavi mbae vae Espiritu Santo coti vae pe —jei—. ³² Jare ime yave quía jei icavi mbae vae che cuimbaerã ayeyapo vae coti vae, Tumpa umbiasata chupe. Ërei ime yave quía jei icavi mbae vae Espiritu Santo coti vae, Tumpa ndarau etei umbiasa chupe, añave jare ara reta outa vae pe —jei—.

Ía icavi vae jare ía icavi mbae vae
(Lc 6.43-45)

³³ Penoi yave temiti icavi vae, penoita vi ía icavi vae. Jae ramiño vi penoi yave temiti icavi mbae vae, penoita vi ía icavi mbae vae. Echa'ã peecha yave temiti ía, picuaata icavi ra temiti —jei—. ³⁴ Pe reta co jae mboi pochi vae reta rami. Echa'ã pe reta piyapo icavi mbae vae. Jáeramo pepuere'ã etei pere icavi vae. Echa'ã penti penti uyemingueta ipia pe güinoi vae rupi —jei—. ³⁵ Quía nunga jecocavi vae güinoi icavi vae ipia pe. Jáeramo jei icavi vae. Jae ramiño vi quía nunga jecopochi vae güinoi icavi mbae vae ipia pe. Jáeramo jei icavi mbae vae. ³⁶ Ërei che jae peve, jocua ara Tumpa upuruãa yave, jae umbijecota ivi pegua reta opaete ñee icavi mbae vae regua re —jei—. ³⁷ Echa'ã Tumpa jeita icavi vae co piyapo, icavi vae pere yave. Jae ramiño vi Tumpa jeita icavi mbae vae co piyapo, icavi mbae vae pere yave —jei.

Uipota reta uecha miacañi
(Mr 8.12; Lc 11.29-32)

³⁸ Jayave amocue mboroyocui re oporomboe vae reta jare fariseo reta jei Jesús pe:

—Oporomboe vae, nduipota ndiyapo vaerã mbae ndicuaaca vaerã oreve quía co nde.

³⁹ Jayave Jesús jei chupe reta:

—Añave yugüireco vae reta icavi mbae vae uyapo vae reta co. Upurugüirovia'ã. Jáeramo uipota ayapo vaerã miacañi chupe reta. Ërei jaeño uyeyapota mbae Tumpa iñee aracae umimbeu vae Jonás pe uyeyapo vae rami, jae reta uicuaa vaerã quía co che —jei—. ⁴⁰ Echa'ã Jonás upita

mbapɪ ara jare mbapɪ piare jocua pira guasu jie pe. Jae ramiño vi che cuimbaerã ayeyapo vae apitata mbapɪ ara jare mbapɪ piare ivigüi pe — jei—. ⁴¹ Tumpa upuruãa yave, Nínive pegua reta upũata umbijeco vaerã añave yugüireco vae reta. Echa'ã jae reta ueya iyemingueta icavi mbae vae ipia pe oĩ vae, Jonás umimbeu chupe reta yave Tumpa iñee. Ërei chembaepuere tuicha ete co Jonás imbaepuere güi — jei—. ⁴² Tumpa upuruãa yave, jocua cuña mburuvicha guasu ico sur coti vae upũata umbijeco vaerã añave yugüireco vae reta. Echa'ã jae ou mbiri ete güi uyapisaca vaerã Salomón iyaracuaa catu vae re. Ërei che chearacuaa catu ete Salomón güi — jei—.

*Aña usiri jare ou ye vae
(Lc 11.24-26)*

⁴³ Penti aña usiri ma yave oya jese vae güi, uguata ñana rupi ueca quiape ico vaerã. Ërei ipuere'ã yave uvãe quiape ico vaerã, ⁴⁴ jei iyupe: Taa ye jocua chero ayu chugüi vae pe — jei, jei —. Echa'ã yandepuere yamijaanga penti o jocua cuimbae aña usiri ma chugüi vae re. Aña ou ye uvãe yave jocua o pe, uecha ipo'ã. O iya utupei ma jare uyapicatu — jei—. ⁴⁵ Jayave oo ye aña güeru siete aña icavi mbae ete chugüi vae reta jocua o pe. Jayave ocho reve uique o pe, joco pe yugüireco vaerã. Tenonde yave, penti aña oya jese yave, jocua cuimbae uiporara. Ërei taicue rupi ocho aña reta oya jese. Jáeramo tanta uiporara. Jae ramiño vi uyeyapota añave yugüireco vae icavi mbae vae uyapo vae reta pe — jei.

Jesús ichi jare tiví reta
(Mr 3.31-35; Lc 8.19-21)

⁴⁶ Jare Jesús uyemingueta rambueve joco pe ñugüinoi vae reta pe, Jesús ichi jare tiví reta yugüeru uvãe jae oĩ vae pe, jare oca pe ñugüinoi. Jae reta uipota uyemingueta Jesús ndive. ⁴⁷ Jayave penti joco pe oĩ vae jei Jesús pe:

—¡Aipo! Ndesi jare nderiví reta oca pe ñugüinoi. Uipota uyemingueta nde ndive —jei.

⁴⁸ Ërei Jesús jei chupe:

—¿Quía nunga pa co jae chesi jare cheriví reta?

⁴⁹ Jayave uupi ipo jemimboe reta coti, jare jei:

—Cua nunga reta co jae chesi jare cheriví reta.

⁵⁰ Echa'ã opaete cheRu ara pe oĩ vae jei vae uyapo vae reta co jae cheriví jare cherindi jare chesi —jei.

13

Jesús umijaanga umaeti vae
(Mr 4.1-9; Lc 8.4-8)

¹ Jocua ara Jesús oẽ tenta güi oo uguapí i guasu jembei pe. ² Jare jeta vae uyembati Jesús oĩ vae pe. Jáeramo Jesús uyupi penti chalana i guasu pe oĩ vae pe, jare uguapí pipe. Jare yati vae reta uyemboi ñugüinoi i guasu jembei pe. ³ Jare Jesús omboe reta jeta mbaembae re umijaanga reve. Jei chupe reta:

—Penti cuimbae oo umaeti vaerã. ⁴ Umaeti yave, umiai temiti, jare amocue oa tape rupi. Jayave yugüeru güira reta opa jou —jei—. ⁵ Ìru temiti oa mbovĩño ivi itape iárambo oĩ vae pe. Cua imambae oẽ, jeta'ã ivi chupe ramo —jei—.

⁶ Ërei guarasi jasi yave, ipiru. Jare japo quipe'ã oĩ ramo, utini —jei—. ⁷ Ìru temiti oa ñanapite pe.

Ñana ucuacuaa yave, opa uyuca temiti. ⁸ Jare ñru temiti oa ivicavi pe. Cua reta ucuacuaa cavi jare ía. Amocue jeta ete jái, jare ñru jeta catu jái, jare ñru mbovño jái —jei—. ⁹ Uipota uyandu vae tuyapisaca cua re —jei.

*Maera Jesús oporomboe umijaanga reve
(Mr 4.10-12; Lc 8.9-10)*

¹⁰ Jayave Jesús jemimboe reta yugüeru upirandu chupe:

—¿Maera pa nemingueta reta nemijaanga reve?

¹¹ Jayave Jesús jei chupe reta:

—Amimbeu ma peve mboroyocua ara pegua regua. Cua uyecuaa'ã ñru vae reta pe —jei—. ¹² Echa'ã güinoi vae pe uñemiñruta, jeta güinoi vaerã. Ërei mbaeti güinoi vae güi mbovi ete güinoi vae uyeequita —jei—. ¹³ Jáeramo amingueta reta amijaanga reve, agüiye vaerã uicuaa cavi, yepe tēi uecha, jare agüiye vaerã uicuaa, yepe tēi uyandu —jei—. ¹⁴ Jare uyeyapo chupe reta Tumpa ñnee aracae umimbeu vae Isaías jei vae. Echa'ã jae jei cuarãi:

‘Piyandu tēita, ãrei ndarau picuaa.

Peecha tēita, ãrei ndarau picuaa cavi.

¹⁵ Echa'ã cua reta ipiatanta,

jare iyapisa pe uyandu tēi,

jare usapimiño,

agüiye vaerã uecha jesa pe,

jare agüiye vaerã uyandu iyapisa pe,

jare agüiye vaerã uicuaa ipia pe,

jare agüiye vaerã uyerova checoti.

Echa'ã uyerova checoti yave, ambaita tēi imbaeyoa reta' —jei Tumpa.

Jucuarãi jei Isaías —jei—.

¹⁶ Ërei Tumpa pemivendise ma. Echa'ã pe reta peecha peresa pe, jare piyapisaca peapisa pe —jei—. ¹⁷ Añete che jae peve, jeta Tumpa iñee aracae umimbeu vae reta jare jupi vae reta uipota tẽi uecha pe reta peecha ma vae, ãrei uecha'ã. Jae ramiño vi jae reta uipota tẽi uyandu pe reta piyandu ma vae, ãrei uyandu'ã —jei—.

*Umaeti vae uyemijaanga jese vae
(Mr 4.13-20; Lc 8.11-15)*

¹⁸ Amimbeu ma peve amijaanga reve cuimbae umaeti vae. Jáeramo piyapisaca ye jese —jei—. ¹⁹ Ime yave quía uyapisaca Tumpa iporoyocua re vae, uicuaa cavi'ã yave uyandu vae, ou voi jocua icavi mbae vae jare umiacañi Tumpa iñee güi. Amijaanga cua nunga re temiti tape rupi oa vae —jei—. ²⁰ Jae ramiño vi jocua temiti uñeñoti mboviño ivi itape iárambo oĩ vae pe vae uyemijaanga ñru vae reta Tumpa iñee uyandu vae re. Jupivoiño uyerovia reta, jare uipota cua ñee —jei—. ²¹ Ërei cua reta jocua temiti japo quipe'ã oĩ vae rami co. Jáeramo imambae icueri reta. Mbae-susere uyeyapo chupe reta ani ñru vae reta uyapo icavi mbae vae chupe reta Tumpa iñee uicuaa ramo. Jare jupivoiño uipota'ã ma uyapisaca reta Tumpa iñee re —jei—. ²² Jae ramiño vi jocua temiti uñeñoti ñanapite pe vae uyemijaanga ñru vae reta Tumpa iñee uyandu vae re. Ërei jae reta umbipi uyemipia'ã ivi pe mbaembae uyeyapo vae re, jare uyembitavi, uipota icocatu ramo. Jare opaete cua umiacañi reta Tumpa iñee güi. Jáeramo jae reta jocua temiti ia'ã vae rami co —jei—. ²³ Ërei jocua

temiti uñeñoti ivicavi pe vae uyemijaanga ñru vae reta Tumpa ñnee uyandu vae re. Cua reta uicuaa cavi Tumpa ñnee. Amocue vae jocua temiti jeta ete jãi vae rami co. Ñru vae reta jocua temiti jeta catu jãi vae rami co. Jare ñru vae reta jocua temiti mbovĩño jãi vae rami co —jei.

Trigo jare trigo-raanga

²⁴ Jesús imiari ye yati vae reta pe umijaanga reve. Jei chupe reta:

—Mboroyocua ara pegua penti cuimbae temiti icavi vae ico pe oñoti vae rami co. ²⁵ Ërei opaete vae oque rambueve, cuimbae jovaicho ou oñoti trigo-raanga trigo ipite rupi, jare oo ye —jei—. ²⁶ Trigo ucuacuaa jare ía. Ërei ucuacuaa vi trigo-raanga trigo ipite rupi —jei—. ²⁷ Jáeramo co iya jembiocui reta yugüeru ipatrón pe jei chupe: ‘Patrón, ¿niñoti’ã pa trigo icavi vae ndeco pe? ¿Maera pa ucuacuaa trigo-raanga?’ —jei reta, jei—. ²⁸ Jayave ipatrón jei chupe reta: ‘Penti cherovaicho oñoti.’ Jayave jembiocui reta jei chupe: ‘¿Ndipota pa ndoo vaerã nduequi trigo-raanga?’ ²⁹ Ërei ipatrón jei: ‘Agüiye peequi. Echa’ã peequi yave trigo-raanga, aramoi peequita vi trigo trigo-raanga ndive’ —jei, jei—. ³⁰ ‘Tucuacuaa pãve mocui reve trigo yaipoo regua. Jare yaipoo yave, jaeta uipoo vae reta pe: Pembati rani trigo-raanga piyocua peapi vaerã. Ërei pembati trigo jiru pe’ —jei, jei.

Mostaza jãicue

(Mr 4.30-32; Lc 13.18-19)

³¹ Jesús imiari ye yati vae reta pe umijaanga reve. Jei chupe reta:

—Mboroyocua ara pegua penti mostaza jāicue cuimbae güiraa oñoti ico pe vae rami co. ³² Cua jāicue michi-rai ete opaete ñru temiti reta jāicue güi. Ërei ucuacuaa ma yave, tuicha ete opaete ñru temiti penti año peguaño ucuacuaa vae reta güi. Uyeyapo penti ivira. Jáeramo güira reta ipuere uyapo jaitirã jāca reta re —jei.

*Levadura
(Lc 13.20-21)*

³³ Jesús imiari ye yati vae reta pe umijaanga reve. Jei chupe reta:

—Mboroyocua ara pegua levadura rami co. Cuña umbiyea levadura jeta catu harina ndive, levadura uñemiai vaerã opaete masa rupi —jei.

*Maera Jesús oporomboe umijaanga reve
(Mr 4.33-34)*

³⁴ Opaete cua jei Jesús yati vae reta pe umijaanga reve. Jare jecuaeño imiari chupe reta umijaanga reve, ³⁵ uyeyapo vaerã Tumpa iñee aracae umimbeu vae jei vae. Echa'ã jei cuarãi: “Chemiarita amijaanga reve. Amimbeuta ivi uyeyapo güive uyecuaa mbae vae.” Jucuarãi jei.

Mbae trigo jare trigo-raanga uyemijaanga jese vae

³⁶ Jayave Jesús omondo ye yati vae reta, jare uique o pe. Jare Jesús jemimboe reta yugüeru jei chupe:

—Nemimbeu ma oreve nemijaanga reve jocua co trigo-raanga ucuacuaa pipe vae. Emimbeu oreve mbae uipota jei vae.

³⁷ Jayave Jesús jei chupe reta:

—Temitì icavi vae oñoti vae uyemijaanga che cuimbaerã ayeyapo vae re. ³⁸ Jocua co uyemijaanga opaete ivi re. Trigo icavi vae uyemijaanga Tumpa iporoyocua pegua reta re. Ërei trigo-raanga uyemijaanga icavi mbae vae uyapo vae reta re —jei—. ³⁹ Jocua co iya jovaicho trigo-raanga oñoti vae uyemijaanga aña guasu re. Mbaepoo uyemijaanga cua ara reta iyapi re. Umbaepoo vae reta uyemijaanga ángel reta re —jei—. ⁴⁰ Jocua trigo-raanga uyembatìca jare ocai tata pe. Jae ramiño vi jucuarãita uyeyapo cua ara reta iyapi pe —jei—. ⁴¹ Che cuimbaerã ayeyapo vae abouta ángel cheve uyeyocui vae reta, jare jae reta umbatìta opaete iyoa vae reta jare icavi mbae vae uyapo vae reta, omombo reta vaerã cheporoyocua güi —jei—. ⁴² Jare omombota reta tata guasu pe. Joco pe uyaota reta jare jãi umbiquiririuta —jei—. ⁴³ Jayave jupi vae reta uyecuaata Tu iporoyocua pe guarasi jembipe rami. Uipota uyandu vae tuyapisaca cua re —jei—.

Corepoti uñeñoti vae

⁴⁴ Mboroyocua ara pegua corepoti uñeñoti vae rami co. Echa'ã penti cuimbae uvãe yave jocua corepoti uñeñoti vae, oñomi ye, jare uyerovia reve oo umee corepoti re opaete imbaembae ogua vaerã jocua co —jei—.

Ita ipõra vae

⁴⁵ Mboroyocua ara pegua penti umaemee vae ita ipõra vae reta ueca vae rami co —jei—. ⁴⁶ Uvãe yave penti ita ipõra vae jepi ete vae, oo umee

corepoti re opaete imbaembae ogua vaerã jocua ita ipõra vae —jei—.

Pisa jare jevae i rupigua reta

⁴⁷ Mboroyocua ara pegua penti pisa rami co. Echa'ã cuimbae reta omombo pisa i guasu pe omboa vaerã ipotave jevae i rupigua reta —jei—. ⁴⁸ Jare pisa tinee ma yave, cuimbae reta güeru i guasu jembei pe. Jayave uguapi joco pe jare umbati umbiru jevae i rupigua icavi vae reta jiru pe, ãrei omombo jevae i rupigua icavi mbae vae reta —jei—. ⁴⁹ Jae ramiño vi jucuarãita uyeyapo cua ara reta iyapi pe. Ángel reta yugüeruta jare umbatita icavi mbae vae uyapo vae reta omombo vaerã jupi vae reta ipite güi —jei—. ⁵⁰ Jare omombota reta tata guasu pe. Joco pe uyaota reta jare jãi umbiquirirũta —jei.

Mbaembae ipiau vae jare indechi vae

⁵¹ Jayave Jesús upirandu chupe reta:

—¿Picuaa cavi ma pa opaete cua?

—Nduicuaa cavi ma, oreYa —jei reta chupe.

⁵² Jayave Jesús jei chupe reta:

—Penti mboroyocui re oporomboe vae mboroyocua ara pegua re uyemboe vae, penti tenta iya rami co. Echa'ã tenta iya umee jenta pegua reta pe mbaembae ipiau vae jare mbaembae indechi vae jo pe uñuvatu vae güi —jei.

Jesús Nazaret pe

(Mr 6.1-6; Lc 4.16-30)

⁵³ Jare Jesús opa ma yave cua jei umijaanga reve, oo ye joco güi. ⁵⁴ Jare oo uvãe yave livi pe,

oporomboe judío reta itupao pe, jare uyapisaca jese vae reta ipiacañi jare jei.

—¿Quíape ra uyemboe cua cuimbae iyaracuaa catu vaerã? ¿Quía ra umee chupe mbaepuere cua miacañi reta uyapo vaerã? ⁵⁵ Jae co carpintero tai. Jae co María imembi. Jae co Jacobo, José, Simón jare Judas tiquei —jei reta—. ⁵⁶ Jare opaete jindi reta yugüireco yandepite pe. Jáeramo ¿quirã ra ipuere uyapo opaete cua? —jei reta.

⁵⁷ Jáeramo jae reta pochi Jesús pe. Jayave Jesús jei chupe reta:

—Opaete vae uipiu penti Tumpa iñee umimbeu vae. Jaeño jentaigua reta jare jenta pegua reta uipiu'ã reta —jei.

⁵⁸ Jare joco pe ipuere'ã uyapo jeta miacañi reta jae reta güirovia'ã jese ramo.

14

Juan imano

(Mr 6.14-29; Lc 9.7-9)

¹ Jare jocua ara reta pe mburuvicha guasu Herodes uyandu Jesús regua. ² Jare jei jembiocui reta pe:

—Jae co Juan upurumbibautizase vae. Icove ye ma ou umanocue vae reta ipite güi. Jáeramo uyapo cua miacañi reta —jei.

³ Echa'ã ndei Juan umano mbove, Herodes uipisica Juan, jare oñonoca peresoriru pe, Herodías jei ramo. Herodías co jae Herodes tivi Felipe jee vae jembireco. ⁴ Echa'ã tenonde yave Juan jei Herodes pe: “Icavi'ã nemenda vaerã nderivi jembireco ndive.” ⁵ Jáeramo Herodes uipota tēi

uyucaca Juan. Ërei uquiye tenta guasu pegua reta güi. Echa'ã jae reta güirovia Juan co jae penti Tumpa iñee umimbeu vae.

⁶ Ërei Herodes uyembíara yave oa vae regua, Herodías imembi cuña ou upírae ipite pe jare umbíyerovia Herodes. ⁷ Jayave Herodes jei Tumpa jee re umeeta co cuñatai pe ipotave mbae ueca chupe vae. ⁸ Jayave cuñatai jei Herodes pe:

—Emee cheve cua pe Juan upurumbíabautizase vae iñáca penti plato pe.

Echa'ã cuñatai ichi umimbeu ma chupe jucuarãi jei vaerã.

⁹ Jayave mburuvicha guasu ipiatiti. Ërei Tumpa jee re jei chupe ramo, jare ñru vae reta uyandu ramo, omondo sundaro Juan iñáca güeru vaerã umee chupe. ¹⁰ Jayave oo sundaro peresoríru pe uñácasía Juan. ¹¹ Jayave güeru iñácacue penti plato pe, jare umee cuñatai pe. Jayave cuñatai güíraa umee ichi pe. ¹² Jare Juan jemimboe reta yugüeru güíraa jetecue jare oñoti. Jayave yugüíraa umimbeu Jesús pe.

Jesús umíngaru cinco mil cuimbae reta
(Mr 6.30-44; Lc 9.10-17; Jn 6.1-14)

¹³ Jare Jesús cua uyandu yave, oo penti chalana pe quíi ngatu vae pe. Ërei jeta vae uicuaa yave, yugüíraa iví rupiño tenta guasu reta güi Jesús oo vae pe. ¹⁴ Jesús ugüeyí yave chalana güi, uecha jeta vae, jare uiparareco reta. Jayave umbígüera imbaerasí vae joco pe ñugüinoi vae reta.

¹⁵ Caaru ma yave, Jesús jemimboe reta yugüeru jei chupe:

—Mbaeti quiave ico cua rupi, jare caaru ma oĩ. Emondo cua jeta vae, ogua vaerã jembaliurã tenta tenta rupi —jei reta.

¹⁶ Ërei Jesús jei chupe reta:

—Agüiye tuyugüiraa. Pe reta pemee tucaru — jei.

¹⁷ —Jaeño ime cua pe nonoi pandepo mbiyape jare mocui pira —jei reta chupe.

¹⁸ —Peru cheve cua pe —jei.

¹⁹ Jayave Jesús oyocui jocua jeta vae reta uguapi vaerã capiichape re. Jayave uipisi jocua pandepo mbiyape jare mocui pira, jare umae ara coti, jare umee yasurupai Tumpa pe. Jayave upisãa mbiyape, jare umee jemimboe reta pe, jae reta umee vaerã yati vae reta pe. ²⁰ Opareve ucaru, jare iyangapii reta. Jayave Jesús jemimboe reta umbati tembiu uñepisãacue jembire vae, jare umitinee doce canasta. ²¹ Jare ucaru vae reta güi cuimbae retaño uyepapa cinco mil rupi. Uyepapa'ã cuña reta jare sambiaí reta.

Jesús uguata i iárambo

(Mr 6.45-52; Jn 6.16-21)

²² Jare jupivoiño Jesús oyocui jemimboe reta uyupi vaerã chalana pe, jare yugüiraa vaerã jenonde i guasu jovaicho pe, jae omondo rambueve uyembati vae reta. ²³ Jare opa omondo yave, Jesús uyupi ivitu guasu re uyerure vaerã Tumpa pe. Jare pĩtu ma yave, jaeño Jesús joco pe oĩ. ²⁴ Ërei chalana oo ma uvãe i guasu mbitte pe. Yavai Jesús jemimboe reta uruguata vaerã. Echa'ã tuicha i uyembiaparoaroa jare ivitu tanta oovãiti.

²⁵ Jare cõeta ma yave, Jesús uguata oo i iárambo

güiraa uepiti. ²⁶ Jare Jesús jemimboe reta uecha yave uguata ou i iárambo rupi, uquiye. Jei reta:

—Penti mbae iäcuae co.
Usapícai reta uquiye güi.

²⁷ Ërei jupivoiño Jesús ombou iñee chupe reta.

—Piñemiatangātu. Che co. Agüiye pequiye —jiei.

²⁸ Jayave Pedro jei chupe:

—CheYa, jae co nde yave, cheocui aguata vaerã aa i iárambo rupi ndecoti.

²⁹ —Eyu —jiei Jesús chupe.

Jayave Pedro ugüeyi chalana güi, jare umbipi uguata i iárambo oo vaerã Jesús coti. ³⁰ Ërei uecha yave quirã i vitu tanta chupe, Pedro uquiye. Jayave umbipi uique i pe, jare iñeeãta reve jei:

—CheYa, cherepi.

³¹ Jupivoiño Jesús uupi ipo jare uipisi Pedro. Jayave jei chupe:

—Michi ete ndepurugüirovia. ¿Maera pa nderovia'ã cheré? —jiei.

³² Jare uyupi reta yave chalana pe, upita ivitu.

³³ Jare chalana pe ñugüinoi vae reta umbiadora Jesús. Jei reta:

—Añete co, nde co jae Tumpa Tai.

Jesús umbigüera Genesaret pegua imbaerasi vae reta

(Mr 6.53-56)

³⁴ Jare i guasu uasa reta yave, yugüiraa uvãe ivi Genesaret pe. ³⁵ Jare joco pegua reta uicuaa jae co Jesús. Jáeramo jae reta yugüiraa opaete jocua ivi rupi, jare güeru Jesús oĩ vae pe imbaerasi vae reta.

³⁶ Jare güeru vae reta uyerure Jesús pe umaño imbaerasi vae reta uyaviqui vaerã jemimonde

jembeï yepe. Jare opaete jemimonde uyaviqui vae reta ucuera.

15

Yandepia umingua vae

(Mr 7.1-23)

¹ Jayave fariseo reta jare mboroyocui re oporomboe vae reta yugüeru Jerusalén güi Jesús oĩ vae pe jare jei chupe:

²—¿Maera pa nderemimboe reta uyapo'ã yandetenondegua reta iporomboe? ¿Maera pa ucaru reta uyepoe mbae reve? —jei reta.

³Jayave Jesús jei chupe reta:

—¿Maera pa pe reta piyavi Tumpa iporoyocui piyapo vaerã yandetenondegua reta iporoyocui?

⁴ Tumpa oporoyocui cuarãi: 'Ipiu nderu jare ndesi.' Jare oporoyocui vi cuarãi: 'Jei icavi mbae vae tu ani ichi coti vae uyeyucacata co.' Jucuarãi oporoyocui Tumpa —jei—. ⁵ Ërei pe reta pere cuarãi: 'Penti vae ipuere jei tu jare ichi pe umeeta tẽi chupe reta ombori vaerã vae umee ma Tumpa pe.' Jucuarãi pere —jei—. ⁶ Jare jucuarãi ombori'ã tu jare ichi. Jucuarãi pe reta pemombo Tumpa iporoyocui piyugüi piyapo vaerã yandetenondegua reta iporoyocui —jei—. ⁷ Pe reta co jae upurumbitavi vae reta. Añete yepe Isaías imiari peré. Echa'ã jae jei cuarãi:

⁸'Cua reta chepiu iyuru peño' —jei Tumpa—.

'Ërei ipia pe chepiu'ã etei.

⁹ Chembiaadora-raangaiño.

Oporomboe cuimbae iporoyocui re.

Che jucuarãi'ã aporoyocui' —jei Tumpa.

Jucuarãi jei Isaías —jei.

¹⁰ Jare Jesús ueni opaete joco pe ñugüinoi vae reta.

—Piyapisaca cua re, picuaa cavi vaerã —jei—.

¹¹ Ipotave mbae peu vae ipuere'ã umingüia pepia. Jupi mbae vae pere vae, jocua umingüia pepia —jei.

¹² Jayave Jesús jemimboe reta yugüeru jei chupe:

—¿Ndicuaa pa fariseo reta pochi co ndeve jocua ndere chupe reta vae re?

¹³ Jayave Jesús jei chupe reta:

—Opaete temiti reta cheRu ara pe oĩ vae oñoti'ã vae uyeequita co. ¹⁴ Pemaño jese reta. Echa'ã jae reta jesa mbae vae reta uechaca ñugüinoi tape ñru jesa mbae vae reta pe vae rami co. Jare jesa mbae vae uechaca yave tape ñru jesa mbae vae pe, mocui reve uasavita ivicua pe —jei.

¹⁵ Jayave Pedro jei Jesús pe:

—Emimbeu oreve mbae uipota jei cua nemijaanga reve ndere vae.

¹⁶ Jayave Jesús jei chupe reta:

—¿Pe retave pa picuaa cavi'ã? ¹⁷ Picuaa cavi cua: Ipotave mbae peu vae oo perie pe, jare pemombo —jei—. ¹⁸ Ërei jupi mbae vae pere vae, jocua umingüia pepia. Echa'ã pere vae ou pepia güi —jei—. ¹⁹ Echa'ã pepia güi oẽ opaete icavi mbae vae: pepia pe piyemingueta icavi mbae vae, pepuruyuca, piyuvanga menda re, piyapo aguasa, pemonda, peapu ñru vae reta re, icavi mbae vae pere ñru vae reta coti —jei—. ²⁰ Cua reta umingüia pepia. Ërei pecaru yave piyepoe mbae reve, jocua umingüia'ã pepia —jei.

*Cuña Canaán pegua ipurugüirovia
(Mr 7.24-30)*

²¹ Jayave Jesús oo ye joco güi Tiro jare Sidón iyipi rupi. ²² Jare penti cuña ivi Canaán pegua joco pe ico. Jae ou Jesús oĩ vae pe jare ñneeãta reve jei chupe:

—CheYa, cheparareco. Nde co jae David ñnemoñaeta reta pegua. Chemembĩ cuña uiporara oĩ. Echa'ã penti aña oya ma jese —jei.

²³ Ërei Jesús jei'ã mbae chupe. Jayave Jesús jemimboe reta yugüeru jei chupe:

—Emondo ye jocua cuña. Echa'ã ñneeãta ou yanderaicue.

²⁴ Jayave Jesús jei:

—Tumpa chembou Israel pegua reta peño. Jae reta ovecha ucañi vae reta ramĩ co —jei.

²⁵ Jayave cuña ou uyeatica Jesús jovai, jare jei chupe:

—Carai, chembori.

²⁶ Ërei Jesús jei chupe:

—Icavi'ã yaequi vaerã tembíu sambiaĩ reta güi, ñamee vaerã yimba-raĩ reta pe —jei.

²⁷ —Añete tẽi co, carai —jei cuña Jesús pe—. Ërei yimba-raĩ reta jou tembíu usururucue iya imesa güi oa vae —jei.

²⁸ Jayave Jesús jei chupe:

—Cuña, tuicha co ndepurugüirovia. Tuyeyapo ndeve nde ndipota rupi —jei.

Jare jupivoiño cuña imembĩ ucuera.

Jesús umbigüera jeta vae

²⁹ Jayave Jesús oo joco güi uvãe i guasu Galilea pe oĩ vae pe. Jayave uyupi penti ivitu guasu re, jare

uguapi joco pe. ³⁰ Jare jeta vae yugüeru jae oĩ vae pe. Jae reta güeru icõcho vae reta, jare ipo jovaicho mbae vae reta, jare jesa mbae vae reta, jare iupa vae reta, jare jeta ñru imbaerasi vae reta oñono Jesús jovai. Jayave Jesús umbigüera reta. ³¹ Jáeramo joco pe yati vae reta ipiacañi. Echa'ã uyandu iupa vae reta uyemingueta, jare uecha ipo jovaicho mbae vae reta ucuera, jare icõcho vae reta uguata cavi, jare jesa mbae vae reta umae. Jare opaete vae umbiadora Israel pegua reta iTumpa.

Jesús umingaru cuatro mil cuimbae reta
(Mr 8.1-10)

³² Jayave Jesús ueni jemimboe reta jare jei chupe reta:

—Aiparareco cua yati vae reta. Echa'ã mbapi ara ma ñugüinoi che ndive, jare mbaeti mbae güinoi jou vaerã. Ndarau amondo ye reta ucaru mbae reve, agüiye vaerã ipitu tape rupi —jei.

³³ Jayave Jesús jemimboe reta upirandu chupe:

—¿Quirãita pa yandepuere ñamee mbiyape cua jeta vae reta pe cua mbaeti quiave ico vae pe, jae reta ucaru cavi vaerã?

³⁴ Jayave Jesús upirandu chupe reta:

—¿Mbovi pa mbiyape penoi?

—Ime nonoi siete, jare mbovi pira —jei reta.

³⁵ Jayave Jesús oyocui yati vae reta uguapi vaerã ivi pe. ³⁶ Jayave uipisi jocua siete mbiyape jare mbovi pira, jare umee yasurupai Tumpa pe. Jayave upisãa mbiyape jare pira, jare umee jemimboe reta pe, jae reta umee vaerã yati vae reta pe.

³⁷ Opareve ucaru, jare iyangapii reta. Jayave Jesús jemimboe reta umbati tembúu uñepisãacue jembire

vae, jare umitinee siete canasta. ³⁸ Jare ucaru vae reta güi cuimbae retaño uyepapa cuatro mil rupi. Uyepapa'ã cuña reta jare sambiaí reta.

³⁹ Jayave Jesús omondo ye yatí vae reta. Jayave uyupi chalana pe, jare oo uvãe iví Magdala pe.

16

Uipota reta uecha miacañi

(Mr 8.11-13; Lc 12.54-56)

¹ Jare fariseo reta jare saduceo reta yugüeru Jesús oí vae pe, jare jei chupe uechaca vaerã chupe reta miacañi ara güi. Echa'ã jae reta uipota uicuaa uyapota ra miacañi chupe reta. ² Ërei Jesús jei chupe reta:

—Amo pe pítuta ma yave pe reta pere: ‘Ara cavita co curiye. Echa'ã píta co amapítu reta.’

³ Jae ramiño vi amo pe neimbove yave pere: ‘Ara pochita co cua ara. Echa'ã píta co amapítu reta jare ara uyasoi oí’ —pere, jei—. Pe reta co jae upurumbitaví vae reta. Echa'ã ara re pemae yave, picuaa mbae uyeyapota vae. Ërei picuaa'ã etei mbae añave uyeyapo oí vae —jei—. ⁴ Añave yugüireco vae reta icavi mbae vae uyapo vae reta co. Upurugüirovia'ã. Jáeramo uipota ayapo vaerã miacañi chupe reta. Ërei jaeño uyeyapota mbae Tumpa iñee aracae umimbeu vae Jonás pe uyeyapo vae rami, jae reta uicuaa vaerã quía co che —jei.

Jayave Jesús oo ye chugüi reta.

Fariseo reta ilevadura

(Mr 8.14-21)

⁵ Jesús jare jemimboe reta uyupi chalana pe yugüiraa i guasu jovaicho coti. Jare i guasu jovaicho pe yugüiraa ma uvãe yave ramo, Jesús jemimboe reta uicuaa ñacañi co güeru vaerã mbiyape. ⁶ Jare Jesús jei chupe reta:

—Piñemoa ngatu fariseo reta jare saduceo reta ilevadura güi.

⁷ Jayave jemimboe reta jei uyupe:

—Cua jei, yaru'ã mbiyape ramo.

⁸ Jesús uicuaa chugüi mbae jei reta vae, jare jei chupe reta:

—Michi ete co pepurugüirovia. ¿Maera pa piyemingueta mbiyape peru mbae vae re? —jei—. ⁹ ¿Ndeño pa picuaa cavi? ¿Pemandua'ã pa? Cue yave apisãa pandepo mbiyape ucaru vaerã cinco mil vae reta. Tembú jembirecue pembati yave, ¿mbovi canasta pa pemitinee? —jei—. ¹⁰ Jare siete mbiyape apisãa vi, ucaru vaerã cuatro mil vae reta? Tembú jembirecue pembati yave, ¿mbovi canasta pa pemitinee? —jei—. ¹¹ ¿Maera pa picuaa'ã che jae peve vae? Che jae peve piñemoa ngatu vaerã fariseo reta jare saduceo reta ilevadura güi. Jae'ã peve mbiyape re —jei.

¹² Jayave ramo jemimboe reta uicuaa Jesús jei'ã co chupe reta uñemoa ngatu vaerã mbiyape ilevadura güi. Jaeño uipota jei chupe reta uñemoa ngatu vaerã fariseo reta jare saduceo reta iporomboe güi.

*Pedro jei Jesús co jae Cristo, Tumpa ombou vae
(Mr 8.27-30; Lc 9.18-21)*

¹³ Jare Jesús coiño ma oo uvãe tenta guasu Ceesarea Filipino güi. Jayave upirandu jemimboe reta pe:

—¿Quía pa co che cuimbaerã ayeyapo vae ñru vae reta pe?

¹⁴ Jayave jae reta jei chupe:

—Amocue vae jei nde co jae Juan upurumbibautizase vae, jare ñru vae reta jei nde co jae Elías, jare ñru vae reta jei nde co jae Jeremías ani ñru Tumpa iñee aracae umimbeu vae —jei reta.

¹⁵ Jayave Jesús upirandu chupe reta:

—Ñrei ¿quía pa co che peve?

¹⁶ Jayave Simón Pedro jei chupe:

—Nde co jae Cristo, Tumpa ombou vae. Nde co jae Tumpa jecuaeño ico vae Tai —jei.

¹⁷ Jayave Jesús jei Pedro pe:

—Simón, nde co jae Jonás tai. Tumpa nemivendise ma. Echa'ã cheRu ara pe oñ vae uicuaaca ndeve cua. Mbaeti quía ye uicuaaca ndeve —jei—. ¹⁸ Jare che jae ndeve, nde co jae Pedro. (Pedro uipota jei: “ita”.) Jare che etei amimirātata aiparavo vae reta, ipirāta vaerã penti tenta ita tuicha vae iárambo oñ vae ipirāta rami. Jáeramo cañitei ndarau ipuere jese reta —jei—.

¹⁹ Jare ameeta ndeve mboroyocua ara pegua illave reta. Jare ime yave mbae ivi pe niñapītita vae, Tumpa vi uñapītita ara pe. Jae ramiño vi ime yave mbae ivi pe ndiyorata vae, Tumpa vi oyorata ara pe —jei.

²⁰ Jayave Jesús oyocui jemimboe reta agüiye vaerã umimbeu quía pe jae co Cristo, Tumpa ombou vae.

*Jesús umimbeu umanota co
(Mr 8.31–9.1; Lc 9.22-27)*

²¹ Jare jocua ara reta güive Jesús umimbeu jemimboe reta pe quirãi jae oota co Jerusalén pe, jare quirãi tenta guasu pegua reta itenondegua reta jare sacerdote reta itenondegua reta jare mboroyocui re oporomböe vae reta uiporaracata co chupe, jare quirãi jae uyeyucacata, jare quirãi mbapi ara rupi icove yeta ou umanocue vae reta ipite güi.

²² Jayave Pedro güiraa Jesús ñru reta ipite güi, jare umbipi umbieta chupe. Jei:

—Tumpa tanembori, cheYa. Agüiye etei tuyeyapo ndeve cua —jehi.

²³ Ërei Jesús uyerova jare jehi Pedro pe:

—Esiri chegüi, Satanás. Ndipota chembiavai. Echa'ã nde ndiyemingueta neñ ivi pegua reta uyemingueta rami, ndiyemingueta'ã Tumpa uyemingueta rami —jehi.

²⁴ Jayave Jesús jehi jemimboe reta pe:

—Ime yave quía uipota oo cherupíe vae, tiñacañi iyugüi, tovoi icurusu, jare too cherupíe —jehi—.

²⁵ Uipota uñuvatu jecove vae ndarau ipuere. Ërei umeeta jecove chereco pegua vae uñuvatuta co —jehi—. ²⁶ ¿Mbae ra uminganata quía, umingana yave opaete ivi pegua, ãrei ipuere'ã yave uñuvatu jecove? ¿Mbovi ra umbiepita quía ogua ye vaerã jecove? —jehi—. ²⁷ Echa'ã che cuimbaerã ayeyapo vae ayu yeta cheRu imbaepuere reve ángel cheve uyeyocui vae reta ndive. Jare jayave ameeta opaete vae pe penti penti uyapo vae rupi —jehi— . ²⁸ Añete che jae peve, ndei amocue cua pe

ñugüinoi vae reta umano mbove, cherechata che cuimbaerã ayeyapo vae cheporoyocua pe —jei.

17

Jesús uyembiambie

(Mr 9.2-13; Lc 9.28-36)

¹ Seis ara ma uasa yave, Jesús güiraa Pedro, Jacobo jare Juan - jae co Jacobo tiví - ñru reta ipite güi penti ivítu guasu ivate vae re. ² Jare joco pe uyembiambie jae reta jovai. Jova jembipe guarasi jembipe rami, jare jemimonde tí asi jare uvera. ³ Jare uyecuaa chupe reta Moisés jare Elías uyemingueta ñugüinoi Jesús ndive. ⁴ Jayave Pedro jei Jesús pe:

—OreYa, icavi co ñaã vaerã cua pe. Nde ndipota yave, turuyapo cua pe mbapí guarasía ñanaroquí pegua, penti nembraerã, penti Moisés peguarã jare penti Elías peguarã —jei.

⁵ Pedro uyemingueta oĩ rambueve, amapítu jembipe vae umiguarasía reta, jare amapítu güi uyendu ñee.

—Cua co jae cheRai aau ete vae. Chembiyerovia ete. Piyapisaca jese —jei.

⁶ Jare Jesús jemimboe reta cua uyandu yave, oa iví re. Echa'ã uquiye ete reta. ⁷ Jayave Jesús ou oñono ipo jese reta jare jei:

—Pepña. Agüiye pequiye.

⁸ Jare umae reta ye yave, uecha'ã ma quía jae reta ndive, jaño Jesús.

⁹ Jare ivítu guasu güi ugüeyi yugüeru rambueve, Jesús oyocui reta:

—Agüiye pemimbeu quía pe cua peecha vae, ndei che cuimbaerã ayeyapo vae aicove ye ayu umanocue vae reta ipite güi mbove.

¹⁰ Jayave jemimboe reta upirandu chupe:

—¿Maera pa jei mboroyocui re oporomboe vae reta Elías rani co outa?

¹¹ —Añete Elías rani co outa —jei Jesús—, jare opaete uyapicatuta. ¹² Ërei che jae peve, Elías ou ma co, jare Israel pegua reta uicuaa'ã. Jáeramo uyapo reta chupe jae reta uipota vae. Jae ramiño vi jae reta uiporacata cheve —jei.

¹³ Jayave Jesús jemimboe reta uicuaa jae imiari oĩ chupe reta Juan upurumbibautizase vae re.

Jesús umbigüera cunumi aña oya jese vae

(Mr 9.14-29; Lc 9.37-43)

¹⁴ Jare yugüeru uvãe yave jeta ñugüinoi vae pe, penti cuimbae ou oovãiti Jesús. Uyeatica jae jovai, jare jei chupe:

¹⁵ —CheYa, iparareco cherai. Echa'ã imbaerasi iñãca pe jare uiporara oĩ. Jeta vese ma oa tata pe. Oa vi i pe —jei—. ¹⁶ Aru nderemimboe reta pe umbigüera vaerã tẽi, ãrei jae reta ipuere'ã —jei.

¹⁷ Jayave Jesús jei joco pe ñugüinoi vae reta pe:

—Yavai pe reta cua ivi pe pico vae pepu-rugüirovia vaerã. ¿Quirãi regua ra apitata pe reta ndive? ¿Quirãi regua ra arupiatata peve? Peru cheve cua pe jocua cunumi —jei.

¹⁸ Jayave Jesús uñeengata aña pe, jare aña usiri cunumi güi. Jare jupivoiño cunumi ucuera.

¹⁹ Jayave Jesús jemimboe reta yugüeru Jesús oĩ vae pe upirandu chupe, jae retaño jae ndive ñugüinoi yave:

—¿Maera pa ore orepuere'ã numbisiri aña?

²⁰ —Pepurugüirovia'ã ramo —jei Jesús chupe reta —. Añete che jae peve, aramoi pepurugüirovia michi ete penti mostaza jāicue michi-rai vae rami. Ërei jocua nunga mburugüirovia penoi yave, pepuereta pere cua ivitu guasu pe: 'Ecuca cua güi epita joco pe', jare oota co. Ndarau mbae yavai peve —jei—. ²¹ Ërei ndarau pepuere pembisiri cua nunga aña, jaeño piyerure yave Tumpa pe piyecucu reve tembü güi —jei.

Jesús umimbeu ye umanota co

(Mr 9.30-32; Lc 9.44-45)

²² Jare Galilea pe ñugüinoi rambueve, Jesús jei jemimboe reta pe:

—Che cuimbaerã ayeyapo vae penti vae chemeeta ñru vae reta pe. ²³ Jae reta cheyucata. Ërei amano ma yave, mbapi ara rupi aicove yeta ayu umanocue vae reta ipite güi —jei.

Jayave jemimboe reta ipiatiti tuicha.

Mburuvicha ocovara vae

²⁴ Jare Capernaum pe yugüiraa uvãe yave, mburuvicha peguarã ocovara vae reta yugüeru upirandu Pedro pe:

—¿Umbiepi pa pemboe vae mburuvicha ocovara vae?

²⁵ —Umbiepi —jei Pedro chupe reta.

Jare uique yave tenta pe, Jesús jei Simón Pedro pe:

—Simón, mburuvicha ivi pegua reta ocovara ñru vae reta pe. ¿Ocovara reta vi pa tai reta pe ani ñru

vae reta peño? ¿Mbae pa ndepia pe ndiyemingueta cua re? —jei.

²⁶ —Ïru vae reta peño —jei Pedro.

Jayave Jesús jei chupe:

—Jáeramo tai reta umbiepi'ã chupe reta. ²⁷ Ërei agüiye vaerã yayapo icavi mbae vae echa chupe reta, ecua epindapo i guasu pe. Ipea jocua pira tenonde ndipisi vae iyuru. Joco pe nevãeta penti corepoti. Eraa emee mburuvicha peguarã ocovara vae reta pe cheve peguarã jare ndeve peguarã —jei.

18

Tenondegua vae

(Mr 9.33-37; Lc 9.46-48)

¹ Jayave jemimboe reta yugüeru jei Jesús pe — ¿Quía pa co jae tenondegua vae mboroyocua ara pegua pe?

² Jayave Jesús ueni penti sambiaí, jare oñono jae reta ipite pe.

³ —Añete che jae peve, piyero va'ã yave Tumpa coti jare piyeyapo'ã yave sambiaí reta rami, ndarau pique mboroyocua ara pegua pe —jei—. ⁴ Ime yave quía uñemimichi cua sambiaí rami vae, jae icota tenondeguarã mboroyocua ara pegua pe —jei—. ⁵ Jare ime yave quía uyapo icavi vae cua nunga sambiaí pe cheree pe vae, cheve co uyapo icavi vae —jei—.

Mbaeyoa uyapoca vae

(Mr 9.42-48; Lc 17.1-2)

⁶ Ime cheré güirovia vae reta. Ime yave quía penti cua nunga pe mbaeyoa uyapoca vae, icavita

tēi co ñru vae reta uñapĩti vaerã iyayu re penti ita tuicha vae umbaesu pĩpe vae, omombo vaerã i tipi pe i guasu pe jae ipitupa vaerã —jei—. ⁷ Amocue ivi pegua reta uiporara ñru vae reta uyapoca chupe reta mbaeyoa ramo. Jecuaeño amocue vae reta uyapoca mbaeyoa ñru vae reta pe. Ërei jocua mbaeyoa uyapoca vae reta uiporarata vi co —jei—

⁸ Jáeramo ndepo jovaicho ani ndepi jovaicho uyapoca yave mbaeyoa ndeve, iyasia emombo ndiyugüi. Icavi co tecove opa mbae vae neni vaerã ndepo jovaicho mbae reve ani ndepi jovaicho mbae reve, tata guasu opa mbae vae pe mocui ndepo reve ani mocui ndepi reve Tumpa nemondo vaerã tēi güi —jei—. ⁹ Jae ramiño vi nderesa jovaicho uyapoca yave mbaeyoa ndeve, eequi emombo ndiyugüi. Icavi co tecove opa mbae vae neni vaerã nderesa jovaicho mbae reve, tata guasu pe mocui nderesa reve Tumpa nemondo vaerã tēi güi —jei—.

Ovecha ucañi vae
(Lc 15.3-7)

¹⁰ Agüiye perĩro penti upurugüirovia vae. Che jae peve, ara pe ángel uyandareco cua nunga sambiaí reta re vae reta jecuaeño ñugüinoi cheRu ara pe oĩ vae jovai —jei—. ¹¹ Echa'ã che cuimbaerã ayeyapo vae ayu ambiasa vaerã ucañi Tumpa güi vae reta —jei—.

¹² Pepia pe piyemingueta cua re. Ime yave penti cuimbae cien ovecha güinoi vae, penti ovecha ucañi yave, cuimbae ueya jocua noventa y nueve ovecha reta oo ivitu guasu rupi ueca ucañi vae —jei—. ¹³ Jare uvãe chupe yave, añete che jae peve,

uyerovia tuicha jocua ovecha re noventa y nueve ovecha ucañi mbae vae reta re güi. ¹⁴ Jae ramiño vi peRu ara pe oĩ vae uipota'ã cua upurugüirovia vae reta güi penti ave ucañitei vaerã —jei—.

Nderivi iyoa yave ndecoti
(Lc 17.3-4)

¹⁵ Jare nderivi iyoa yave ndecoti, ecua emimbeu chupe uyapo vae regua quía uicuaa mbae reve. Jare nderivi uyapisaca nderé yave, ndiyeyapicatuta jae ndive —jei—. ¹⁶ Ërei uipota'ã yave uyapisaca nderé, eraa nderupie penti ani mocui neĩrurã, ĩru vae reta uicuaa vaerã mocui ani mbapi vae rupi mbae pere vae —jei—. ¹⁷ Jare uipota'ã yave uyapisaca jese reta, emimbeu upurugüirovia vae reta pe. Ërei nderivi uipota'ã yave uyapisaca upurugüirovia vae reta re, emae jese penti upurugüirovia mbae vae rami ani mburuvicha peguarã ocovara vae rami —jei—. ¹⁸ Añete che jae peve, ime yave mbae ivi pe piñapĩtita vae, Tumpa vi uñapĩtita ara pe. Jae ramiño vi ime yave mbae ivi pe piyorata vae, Tumpa vi oyorata ara pe —jei—.

¹⁹ Jare che jae ye peve, mocui vae ivi pegua omboyovaque iyemingueta jei yave: ‘Yayerure Tumpa pe jocua re’, cheRu ara pe oĩ vae uyapota chupe reta uyerure chupe jese vae —jei—. ²⁰ Echa'ã mocui ani mbapi vae uyembati yave cheree re, jae reta ipite pe che aĩta —jei—.

²¹ Jayave Pedro ou jei Jesús pe:

—CheYa, cherivi iyoa yave checoti jeta vese, ¿mbovi vese pa ambiasata chupe? ¿Siete vese pa? —jei.

²² Jayave Jesús jei Pedro pe:

—Che jae ndeve, embiasa chupe setenta vese siete, mbaeti siete veseño.

Mocui cuimbae ipía vae reta

²³ Echa'ã mboroyocua ara pegua penti mburuvicha guasu jembiocui reta pe ipía uipota ocovara vae rami co —jei—. ²⁴ Mburuvicha guasu umbipi ocovara chupe reta yave, ou uyemboi jae jovai penti jembiocui jeta ete corepoti re ipía chupe vae —jei—. ²⁵ Jocua jembiocui ipuere'ã umbiepi. Jáeramo mburuvicha guasu oyocui uñemee vaerã corepoti re jembiocui jare jembireco jare isambiai reta, jare opaete imbaembae, jembiocui ipuere vaerã umbiepi chupe —jei—. ²⁶ Jayave jembiocui uyeatica mburuvicha guasu jovai, jare jei chupe: 'Agüiye ndepochi cheve. Ndepiaguasu cheve yave, ambiepita ndeve opaete' —jei, jei—. ²⁷ Jayave mburuvicha guasu uiparareco jocua jembiocui jare oyora. Umbai chupe ipía —jei—.

²⁸ Ërei jocua uyeyocui vae oẽ mburuvicha guasu oĩ vae güi jare uvãe ñru uyeyocui vae mbovi corepoti re ipía chupe vae. Jayave uipisi uyasiombiri jare jei chupe: 'Embiepi cheve ndepía.' ²⁹ Jayave jocua ñru uyeyocui vae uyeatica jae jovai, jare uyerure chupe: 'Agüiye ndepochi cheve. Ndepiaguasu cheve yave, ambiepita ndeve opaete' —jei, jei—. ³⁰ Ërei uipota'ã ipiaguasu chupe. Umiingueca peresoriru pe opaete ipía umbiepi regua —jei—. ³¹ Jare ñru uyeyocui vae reta uicuaa yave uyeyapo vae, ipiatiti, jare yugüiraa umimbeu mburuvicha guasu pe opaete uyeyapo vae regua —jei—. ³² Jayave mburuvicha guasu

ueni jocua jembiocui, jare jei chupe: ‘Nde co jae cherembiocui icavi mbae vae. Che ambai ndeve opaete ndepía, nde ndiyerure cheve jese ramo’ — jei, jei—. ³³ ‘¿Maera pa ndiparareco'ã nderapicha, che nduparareco rami?’ — jei, jei—. ³⁴ Jayave mburuvicha guasu pochi jembiocui pe, jare oyocui peresoriru iyandarecoa reta uiporaraca vaerã chupe opaete ipía umbiepi regua — jei—.

³⁵ Jae ramiño vi cheRu ara pe oĩ vae uyapota jucuarãi peve, pembiasa'ã yave opaete pepia reve perivi iyoa pecoti vae pe — jei.

19

*¿Jupi pa cuimbae omombo vaerã jembireco?
(Mr 10.1-12; Lc 16.18)*

¹ Jare Jesús opaete cua jei ma yave, oo Galilea güi Judea pe Jordán jovaicho pe. ² Jare jeta vae yugüiraa jaicue. Jayave Jesús umbigüera imbaerasi vae joco pe ñugüinoi vae reta. ³ Yugüeru vi fariseo reta Jesús oĩ vae pe. Jae reta uipota tẽi uyavica chupe. Jáeramo upirandu reta chupe:

—¿Jupi pa cuimbae omombo vaerã jembireco ipotave mbae jeco pegua?

⁴ Jayave Jesús jei chupe reta:

—¿Pemingueta'ã pa Tumpa iñee pe quirãi Tumpa uyapo ramo yave, uyapo cuimbae jare cuña? — jei—. ⁵ Jare Tumpa jei cuarãi: ‘Jáeramo cuimbae usirita tu jare ichi güi, jare oota ico vaerã jembireco ndive. Jare mocui vae uyeyapota penti ramiño.’ Jucuarãi jei Tumpa — jei—. ⁶ Jáeramo mbaeti ma mocui rami. Yugüireco penti ramiño. Jáeramo agüye quía tumbisiri Tumpa umĩru vae reta — jei.

⁷ Jayave fariseo reta jei chupe:

—¿Maera pa Moisés oyocui cuimbae uicuatía vaerã tupapire jembireco omombo vaerã?

⁸ —Moisés umaño peré pemombo vaerã pem-bireco pepiatanta ramo —jei Jesús—. Ërei Tumpa uyapo ramo yave, jucuarã'ã —jei—. ⁹ Jare che jae peve, penti cuimbae ipuere omombo jembireco, cuña aguasa uyapo yave. Ërei cuña uyapo'ã yave aguasa, jare cuimbae omombo yave jembireco, jocua cuimbae uyuvanga co menda re umenda yave ñru cuña ndive. Jae ramiño vi ñru cuimbae umenda yave jocua cuña uyemomboca vae ndive, jae vi uyuvanga menda re —jei.

¹⁰ Jayave Jesús jemimboe reta jei chupe:

—Jucuarãi yaveño cuimbae ipuere omombo jembireco, icavi'ã cuimbae umenda vaerã.

¹¹ Ërei Jesús jei chupe reta:

—Amocue vaeño ipuere uicuaa cua che jae peve vae. Jocua Tumpa umee uicuaa vaerã vae reta peño ipuere uicuaa —jei—. ¹² Echa'ã amocue vae ichi güi oa güive yugüireco eunucorã reta. Jare amocue vae yugüireco eunucorã reta ñru vae reta uapiavo reta ramo. Jare amocue vae yugüireco eunucorã reta rami mboroyocuia ara pegua jeco pegua. Ime yave quía ipuere uicuaa cua, tuicuaa —jei.

*Jesús uyerure Tumpa pe sambiaí reta re
(Mr 10.13-16; Lc 18.15-17)*

¹³ Jare amocue vae güeru Jesús oí vae pe sambiaí reta, Jesús oñoño vaerã ipo jese reta jare uyerure vaerã Tumpa pe jese reta. Ërei jemimboe reta uñeengata güeru vae reta pe. ¹⁴ Ërei Jesús jei:

—Pemaño sambiai reta re yugüeru vaerã checoti. Echa'ã cua nunga uyeyocui Tumpa pe mboroyocua ara pegua pe —jei.

¹⁵ Jayave oñono ipo jese reta. Jayave oo joco güi.

Cuimbae icocatu vae
(*Mr 10.17-31; Lc 18.18-30*)

¹⁶ Jare penti cuimbae ou jei Jesús pe:

—Oporomboe vae, nde ndepiacavi co. ¿Mbae nunga mbae icavi vae pa ayapota anoi vaerã tecove opa mbae vae? —jei.

¹⁷ Jayave Jesús jei chupe:

—¿Maera pa ndere cheve chepiacavi vae co? Mbaeti quía ipiacavi, jaño co Tumpa. Ërei ndipota yave neni tecove opa mbae vae, iyapo mboroyocui reta —jei.

¹⁸ —¿Mbae nunga reta pa? —jei Jesús pe.

Jayave Jesús jei chupe:

—‘Agüiye epuruyuca. Agüiye iyuvanga menda re. Agüiye nemonda. Agüiye ndapu ñru vae reta re. ¹⁹ Ipiu nderu jare ndesi. Jare eau nderapicha nde ndiyerau rami’ —jei.

²⁰ Jayave cuimbae jei Jesús pe:

—Ayavi'ã penti ave cua mboroyocui reta chemichi güive. ¿Mbae ye pa uata cheve ayapo vaerã? —jei.

²¹ Jayave Jesús jei chupe:

—Ndipota yave ndiyapo opaete icavi ndiyapo vaerã vae, ecua emee opaete mbaembae neni vae corepoti re, jare emee ndecorepoti iparavete vae reta pe, jare ndicocatuta ara pe. Jayave eyu cherupíe —jei.

22 Ërei cua uyandu yave, cuimbae oo ipiatiti reve. Echa'ã jeta mbaembae güinoi.

23 Jayave Jesús jei jemimboe reta pe:

—Añete che jae peve, yavai ete co icocatu vae uique vaerã mboroyocua ara pegua pe. 24 Che jae ye peve, yavai ete icocatu vae uique vaerã Tumpa iporoyocua pe, maemimba camello jee vae yuu jesacua rupi uasa vaerã güi —jei.

25 Jesús jemimboe reta cua uyandu yave, ipiacañi jare jei:

—Jucuarãi yave, ¿quía pa ipuere uyembiasaca?

26 Jayave Jesús umae jese reta jare jei:

—Ivi pegua reta ipuere'ã uyembiasa. Ërei Tumpa ipuere umbiasa reta. Echa'ã Tumpa ipuere uyapo opaete mbaembae —jei.

27 Jayave Pedro jei chupe:

—Mase, ore opaete mbaembae ndueya, ndoyu vaerã nde ndive. ¿Mbae pa nonoita ore?

28 Jayave Jesús jei jemimboe reta pe:

—Añete che jae peve, che cuimbaerã ayeyapo vae aguapita cheguapia pe ayembiaadoraca vaerã, opaete uyeyapicatu yave. Jae ramiño vi pe reta che ndive peyu vae peguapita doce guapia pe, jare peãata doce ati Israel pegua reta —jei—. 29 Jare ime yave quía ueya jenta, ani tiqei reta, ani tivi reta, ani jindi reta, ani tu, ani ichi, ani jembireco, ani isambiai reta, ani iivi reta chereco pegua vae, cien rupi jecoviata co chupe, jare güinoita imbaerã tecove opa mbae vae —jei—. 30 Ërei Tumpa umbitaicuenta uyembutuicha vae reta, jare umitenondeta uñemimichi vae reta —jei—.

20

Co pe uparaviqui vae reta

¹ Echa'ã mboroyocua ara pegua penti co iya rami co. Co iya oẽ neimbove asi ueca quía ipuere uparaviqui vaerã ico pe —jei—. ² Upirandu amocue vae pe uparaviquita ra chupe umbiepi yave chupe reta penti denario ara rupi. (Penti denario co penti ara mbaraviqui jepi pegua.) Jare jae reta jei uparaviquita co chupe. Jayave co iya omondo reta ico pe —jei—. ³ Jayave co iya oẽ ye guarasi ivate catu mi yave, jare uecha ñru vae reta uyemboi ñugüinoi plaza pe. Mbaeti co jae reta iparaviqui. ⁴ Jayave co iya jei chupe reta: 'Pe reta vi pecua peparaviqui checo pe. Tambiepi peve jupi co ambiepi peve vaerã vae' —jei, jei—. Jayave jae reta yugüiraa co pe —jei—. ⁵ Jayave co iya oẽ ye guarasi ara mbite ma oĩ yave, jare omondo ñru vae reta ico pe uparaviqui vaerã. Jae ramiño vi oẽ ye mbapi ora ma caaru yave, jare omondo ye ñru vae reta ico pe uparaviqui vaerã —jei—. ⁶ Jare co iya oẽ ye caaru ete yave, jare uecha ñru vae reta uyemboi ñugüinoi mbaeti iparaviqui ramo. Jayave jei chupe reta: '¿Maera pa peĩ cua pe opaete ara peparaviqui mbae reve?' —jei, jei—. ⁷ 'Mbaeti quía oremimbaraviquica ramo' —jei reta, jei—. Jayave co iya jei chupe reta: 'Pe reta vi pecua peparaviqui checo pe. Tambiepi peve jupi ambiepi peve vaerã vae' —jei, jei—.

⁸ Guarasi uique ma yave, co iya jei jembiocui pe: 'Eeni uparaviqui vae reta embiepi chupe reta. Embiepi rani taicue rupi umbiepi uparaviqui vae reta pe, jare taicue rupi embiepi tenonde yave

umbipi uparaviqui vae reta pe' —jei, jei—. ⁹ Jare co güi yugüeru ye yave caaru ete umbipi uparaviqui vae reta, co iya jembiocui umee penti penti pe penti denario —jei—. ¹⁰ Jare neimbove asi umbipi uparaviqui vae reta co güi yugüeru yave, ipia pe uyemingueta tēi co iya jembiocui umbiepita co chupe reta jeta caaru ete umbipi uparaviqui vae reta pe umbiepi vae güi. Ērei co iya jembiocui umbiepi vi chupe reta penti denario ĩru reta pe rami —jei—. ¹¹ Jayave penti denarioño güinoi yave, iñeenguru co iya pe —jei—. ¹² Jae reta jei chupe: 'Cua taicue rupi umbipi uparaviqui vae reta penti oraño uparaviqui. Ērei nde nembiepi chupe reta penti denario oreve nembiepi rami, yepe tēi ore nduparaviqui tanta guarasi jasi reve' —jei reta, jei—. ¹³ Ērei co iya jei penti vae pe: 'Cheamigo, ayapo'ã etei icavi mbae vae ndeve. Echa'ã nde ndere cheve ndeparaviquita checo pe che ambiepi ndeve yave penti denario' —jei, jei—. ¹⁴ 'Ecu eraa cua neminganacue. Aipota ambiepi taicue rupi umbipi uparaviqui vae pe penti denario ndeve ambiepi rami' —jei, jei—. ¹⁵ 'Echa'ã jupi co che ayapo vaerã aipota vae chembaembae ndive. Agüiye neacatãa cua ĩru vae re che ayapo icavi vae chupe ramo' —jei, jei—.

¹⁶ Jae ramiño vi Tumpa umbitaicuetu uyembu-tuicha vae reta, jare umitenondeta uñemimichi vae reta —jei.

*Jesús umimbeu ye umanota co
(Mr 10.32-34; Lc 18.31-34)*

¹⁷ Jare Jesús Jerusalén coti oo rambueve, ueni jocua doce jemimboe reta ĩru reta ipite güi, jare jei chupe reta:

¹⁸ —Mase, yaa co ñaĩ Jerusalén pe. Jare che cuimbaerã ayeyapo vae penti vae chemeeta sacerdote reta itenondegua reta jare mboroyocui re oporombocue vae reta pe. Jae reta jeita amano vaerã, ¹⁹ jare chemeeta judío mbae vae reta pe. Jae reta cheyoyaita, chenupata chicote pe, jare checututa curusu re. Ërei mbapĩ ara rupi aicove yeta ayu umanocue vae reta ipite güi —jei.

Jacobo jare Juan uipota vae

(Mr 10.35-45)

²⁰ Cua jaicue rupi ou Jesús oĩ vae pe Zebedeo jembireco imembĩ reta Jacobo jare Juan ndive. Cuña uyeatica Jesús jovai jare jei chupe uipota uyapo vaerã mbae chupe. ²¹ Jayave Jesús upirandu cuña pe:

—¿Mbae pa ndipota?

—Emaeño cua mocui chemembĩ re uguapĩ vaerã ndeyipĩ pe ndeporoyocua pe, penti ndeacata coti jare ĩru ndeaso coti —jei cuña chupe.

²² Ërei Jesús jei Jacobo jare Juan pe:

—Picuaa'ã mbae re piyerure vae. ¿Pepuereta pa piporara che aiporarata vae rami? ¿Pepuereta pa piyembĩbautizaca che ayembĩbautizacata vae rami? —jei.

—Orepuereta co —jei reta.

²³ —Añete pe reta piporarata che aiporarata vae rami, jare pe reta piyembĩbautizacata che ayembĩbautizacata vae rami —jei Jesús chupe reta —. Ërei chepuere'ã jae peve peguapĩ vaerã cheyipĩ

pe, penti cheacata coti jare ñru cheaso coti. Echa'ã cheRu umicuatĩro ma joco pe uguapĩta vae reta peguarã —jei.

²⁴ Jare ñru diez Jesús jemimboe reta cua uyandu yave, pochi reta Jacobo jare Juan pe. ²⁵ Jayave Jesús ueni reta.

—Picuaa cavi co cua —jei chupe reta—. Mburuvicha ivi pegua reta oporoyocui, jare mbaepuere güinoi vae reta jei ñru reta pe mbae uyapo vaerã —jei—. ²⁶ Ërei pe reta agüiye piyapo jucuarã —jei—. Ime yave penti pepite pe oĩ vae uipota mbaepuere güinoi vae, tuyeyocui ñru reta pe —jei—. ²⁷ Jare ime yave penti pepite pe oĩ vae uipota tenondeguarã ico vae, tuyeyocui ñru reta pe —jei—. ²⁸ Echa'ã che cuimbaerã ayeyapo vae ayu ayeyocui vaerã ñru vae reta pe. Ayu'ã ñru vae reta uyeyocui cheve vaerã. Ayu amano vaerã, jeta vae aepi vaerã —jei.

Mocui cuimbae jesa mbae vae

(Mr 10.46-52; Lc 18.35-43)

²⁹ Jare yugüiraa yave tenta guasu Jericó güi, jeta vae yugüiraa Jesús jaicue. ³⁰ Jare mocui cuimbae jesa mbae vae uguapi ñugüinoi joco pe tape jembei pe. Jare uicuaa reta Jesús uasa oo oĩ yave, iñeeãta reve jei reta:

—OreYa, reparareco. Nde co jae David iñemoñaeta pegua.

³¹ Jeta joco pe ñugüinoi vae reta uñeengata chupe reta. Uipota tẽi umiquĩ. Ërei jae reta jeiete iñeeãta reve jei:

—OreYa, reparareco. Nde co jae David iñemoñaeta pegua.

³² Jayave Jesús uyemboi, jare uenica cuimbae jesa mbae vae reta.

—¿Mbae pa pipota ayapo vaerã peve? —jei chupe reta.

³³—Nduipotã numae, oreYa —jei reta chupe.

³⁴ Jayave Jesús uiparareco reta jare uyaviqui jesa chugüi. Jare jupivoiño mocui reve ipuere umae, jare yugüiraa Jesús jaicue.

21

Jesús oo Jerusalén pe

(Mr 11.1-11; Lc 19.28-40; Jn 12.12-19)

¹ Jare coiño ma Jerusalén güi ñugüinoi yave, yugüiraa uvãe tenta guasu-rai Betfagé iyipi pe, ivitu guasu Olivos jovai. Jayave Jesús oyocui mocui jemimboe reta:

²—Pecua pea tenta guasu-rai yanderovai oĩ vae pe —jei—. Peo pevãe yave, pevãeta penti mburica uñeñapĩti oĩ, jare pevãeta vi mburica tairusu vae jae ndive. Piyora peru —jei—. ³ Jare ime yave quía mbae jei peve, pere chupe: ‘YandeYa uipotã uiporu, ãrei imambae güeruruca yeta cua pe’ —pere, jei.

⁴ Opaete cua uyeyapo, Tumpa iñee aracae umimbeu vae jei vae uyeyapo vaerã. Echa’ã jae jei cuarãi:

⁵ “Pemimbeu Jerusalén pegua reta pe:

‘Mase, peRuvicha Guasu ou peve.

Uñemimichi oĩ.

Echa’ã opo ou mburica tairusu vae re.’ ”

Jucuarãi jei.

⁶ Jayave Jesús jemimboe reta yugüiraa, jare uyapo Jesús jei chupe reta uyapo vaerã vae. ⁷ Jare

güeru mburica jare mburica tairusu vae Jesús oĩ vae pe. Jayave Jesús jemimboe reta oñono iyasoya maemimba reta icupe re, jare Jesús opo mburica tairusu vae re. ⁸ Jare jeta vae uipiso iyasoya tape rupi mburica tairusu vae jenonde, jare ñru vae reta uyasia ñanaroqui jare oñono tape rupi. ⁹ Jare Jesús jenonde yugüiraa vae reta jare jaicue rupi yugüiraa vae reta ñneeãta reve jei:

—¡Icavi co! Cua co jae David ñnemoñaãta reta pegua. Tuyembadoraca yandeYa jee re ou vae. Tei reta ‘icavi co’ ara pe —jei reta.

¹⁰ Jare Jesús oo ma uvãe yave Jerusalén pe, opaete Jerusalén pegua reta ipiacañi reve jei:

—¿Quía pa co jae?

¹¹ Jare jeta vae reta jei:

—Cua co jae Jesús. Jae co penti Tumpa ñnee umimbeu vae Nazaret pegua. Nazaret Galilea pegua co —jei reta.

Jesús Tumpa jo pe uyapo vae

(Mr 11.15-19; Lc 19.45-48; Jn 2.13-22)

¹² Jayave Jesús uique Tumpa jo pe, jare omoẽ joco güi opaete umaemee vae reta jare mbae ogua vae reta, jare umbiyapara corepoti uipepica vae reta imesa reta jare picasu reta umee vae reta jenda reta. ¹³ Jare jei chupe reta:

—Tumpa ñnee pe uyecuatía oĩ cuarãi: ‘Chero uyembijeeta o yerure pegua pe.’ Jucuarãi uyecuatía oĩ. Ñrei pe reta piyapo ma imonda vae reta ññemia rami —jei.

¹⁴ Jare yugüeru Jesús oĩ vae pe Tumpa jo pe jesa mbae vae reta jare icõcho vae reta, jare Jesús

umbigüera reta. ¹⁵ Jare sacerdote reta itenondegua reta jare mboroyocui re oporomboe vae reta uecha miacañi Jesús uyapo vae reta, jare uyandu vi sambiai Tumpa jo pe ñugüinoi vae reta iñeeãta reve jei:

—¡Icavi co! Cua co jae David iñemoñaãta reta pegua.

Jáeramo jae reta pochi. ¹⁶ Jayave jei reta Jesús pe:

—¿Ndiyandu pa cua reta jei vae?

Jayave Jesús jei chupe reta:

—Ayandu. ¿Pemingüeta'ã pa cua Tumpa iñee pe uyecuatía oĩ vae?

‘Nde neme sambiai reta jare imeño ucambu vae reta pe nemiadora vaerã.’

Jucuarãi uyecuatía oĩ —jei.

¹⁷ Jayave Jesús ueya reta. Oo Jerusalén güi Betania pe, jare joco pe ico.

Iva ía mbae vae

(Mr 11.12-14, 20-26)

¹⁸ Piareve pe neimbove yave Jesús oo ye Jerusalén coti, jare iyembai. ¹⁹ Jare uecha penti íva coiño tape güi. Jayave oo umae jese, ãrei uvãe'ã ía, jaeño joqui. Jayave jei íva pe:

—Ndarau etei ma ndeía.

Jare imambae íva yipi.

²⁰ Jare Jesús jemimboe reta uecha yave íva yipi vae, ipiacañi jese jare jei:

—Imambae yipi jocua íva.

²¹ Jayave Jesús jei chupe reta:

—Añete che jae peve, pepurugüirovia yave, pe reta vi pepuereta piyapo che ayapo íva pe vae rami. Ërei pepurugüirovia yave, pepuereta vi pere cua ívitu guasu pe: ‘Pecua cua güi piyemombo í

guasu pe', jare jucuarãita uyeyapo. Pere'ã yave pepia pe: 'Ndarau ndipo uyeyapo', uyeyapota co peve —jei—. ²² Jare ime yave mbae pipota vae, piyerure Tumpa pe jese. Jare perovia yave Tumpa umeeta co peve, penoita co —jei.

Jesús imbaepuere

(Mr 11.27-33; Lc 20.1-8)

²³ Jare Jesús uique ye yave Tumpa jo pe, sacerdote reta itenondegua reta jare tenta guasu pegua reta itenondegua reta yugüeru jae oï vae pe oporomboe rambueve, jare upirandu chupe:

—¿Mbae nunga mbaepuere pa nenoï cua mbaembae ndiyapo vaerã? ¿Quía pa umee ndeve mbaepuere cua ndiyapo vaerã? —jei reta.

²⁴ Jayave Jesús jei chupe reta:

—Che vi tapirandu peve mbae re. Pemimbeu yave cheve, che vi amimbeuta peve mbae nunga mbaepuere anoi cua mbaembae ayapo vaerã —jei—. ²⁵ ¿Quía pa ombou Juan upurumbibautiza vaerã? ¿Tumpa pa ombou? ani ¿ivi pegua reta pa ombou? —jei.

Jayave jae reta jei uyupe:

—Yae yave: 'Tumpa co ombou', jae jeita yandeve: 'Jucuarãi yave, ¿maera pa perovia'ã?' —jei reta uyupe—. ²⁶ Ërei yandepuere'ã yae: 'Ivi pegua reta co ombou.' Echa'ã yaquiye tenta guasu pegua reta güi. Echa'ã opaete vae güirovia Juan co jae penti Tumpa iñee umimbeu vae —jei reta uyupe.

²⁷ Jayave jei reta Jesús pe:

—Nduicuaa'ã.

—Che vi ndarau amimbeu peve mbae nunga mbaepuere anoi cua mbaembae ayapo vaerã —jei Jesús chupe reta—.

Mocui tai reta

²⁸ ¿Quirã pa pepia pe piyemingueta cua re? Penti cuimbae güinoi mocui tai reta. Ou jei penti tai pe: ‘Cheraí, cua ara ecua eparaviqui checo pe.’
²⁹ Tai jei chupe: ‘Aata’ã aparaviqui.’ Ërei taicue rupi iquirẽi oo. Jáeramo oo uparaviqui tu ico pe —jei—. ³⁰ Jare cuimbae jei ñru tai pe: ‘Cheraí, cua ara ecua eparaviqui checo pe.’ Tai jei chupe: ‘Aata aparaviqui, cheru.’ Ërei oo’ã —jei—. ³¹ ¿Quía nunga pa cua mocui vae güi uyapo tu jei vae? —jei.

Jayave jae reta jei chupe:

—Jocua tenonde tu oyocui vae.

Jayave Jesús jei chupe reta:

—Añete che jae peve, mburuvicha peguarã ocovara vae reta jare cuña aguasa rupi yugüireco vae reta uiqueta perenonde Tumpa iporoyocua pe. ³² Echa’ã Juan ou uicuaaca peve jupi vae, ãrei pe reta perovia’ã. Ërei mburuvicha peguarã ocovara vae reta jare cuña aguasa rupi yugüireco vae reta güirovia. Jare yepe tẽi cua picuaa, ãrei peeya’ã piyemingueta icavi mbae vae pepia pe oĩ vae. Jecuae peatẽi perovia Juan —jei—.

Co iporúa icavi mbae vae reta

(Mr 12.1-12; Lc 20.9-19)

³³ Tamimbeu ye peve amijaanga reve cua: Ico penti cuimbae icorã uiquẽse vae. Jayave oñoti pipe jeta uva. Jayave oyoo ivi, jare uyapo uva uitami pipe vaerã. Uyapo vi penti chapapa, umae vaerã

ivate güi opaete co re. Jayave uiporuca ico ñru vae reta pe, jae reta uyandareco vaerã jese. Jayave co iya oo mbiri ambie ivi pe —jei—. ³⁴ Jare uva yagüiye ma yave, co iya ombou amocue jembiocui reta co iporúa reta pe, jae reta umbiyao vaerã tēi uva reta, iya güinoi vaerã imbaerã —jei—. ³⁵ Ërei co iporúa reta uipisi co iya jembiocui reta, jare uinupa penti vae, jare uyuca ñru vae, jare uyapi ita pe ñru vae —jei—. ³⁶ Jayave co iya ombou ye jeta catu ete jembiocui reta tenonde ombou vae güi. Ërei co iporúa reta jecuae jucuarãi uyapo ye chupe reta —jei—. ³⁷ Jayave taicue rupi co iya ombou tai. Jei tēi iyupe: ‘Aramoi uipiuta cheraí’ —jei, jei—. ³⁸ Ërei co iporúa reta uecha yave co iya tai, jei reta uyupe: ‘Cua co jae iyarã vae. Yaa yayuca, jare yande yaicota co iyarã’ —jei reta, jei—. ³⁹ Jayave jae reta uipisi co iya tai omombo co güi jare uyuca —jei—.

⁴⁰ Jáeramo co iya ou ye yave, ¿mbae ra uyapota jocua co iporúa reta pe? —jei.

⁴¹ Jayave jae reta jei Jesús pe:

—Opata uyuca jocua cuimbae icavi mbae vae reta, jare uiporucata ico ambie vae reta pe. Jae reta umeeta co iya pe imbaerã uva yagüiye ma yave —jei reta.

⁴² Jayave Jesús jei chupe reta:

—¿Pemingueta'ã pa cua Tumpa ñnee pe uyecuatía oñ vae?

‘Ita tenta iyapoa reta omombo vae uyeyapo ma ita tenondegua vae.

YandeYa uyapo cua.

Yaecha ma, jare yandepiacañi jese.’

Jucuarãi uyecuatía oĩ —jei—.

⁴³ Jáeramo che jae peve, pe reta ndarau pico Tumpa iporoyocuia pe. Tumpa umeeta ñru reta pe yugüireco vaerã joco pe. Jae reta uyapota jupi vae —jei—. ⁴⁴ Ime yave quía jocua ita re uyepiaca vae, uñemopêta co. Jare ime yave quía jocua ita oa jese vae, opata umbiperasorasó —jei.

⁴⁵ Jare sacerdote reta itenondegua reta jare fariseo reta cua uyandu yave, uicuaa cua Jesús umijaanga reve jei vae uicuaaca quirãi jae reta teco güinoi. ⁴⁶ Jare jae reta uipota tẽi uipisi Jesús. Ërei ipuere'ã. Echa'ã uquiye jeta vae reta güi. Echa'ã jocua jeta vae reta güirovia Jesús co jae penti Tumpa iñee umimbeu vae.

22

Parea menda pegua

(Lc 14.15-24)

¹ Jare Jesús imiari ye joco pe ñugüinoi vae reta pe umijaanga reve. Jei chupe reta:

² —Mboroyocuia ara pegua penti mburuvicha guasu rami co. Jocua mburuvicha guasu tai umendata. Jáeramo mburuvicha guasu uyapo parea —jei—. ³ Uparea ma amocue vae pe yugüeru vaerã menda pe. Jayave omondo jembiocui reta ueni reta vaerã. Ërei jae reta ñatẽi yugüeru —jei—. ⁴ Jayave mburuvicha guasu oyocui ye ñru jembiocui reta. Jei chupe reta: 'Pecua pemimbeu aparea chupe vae reta pe: Mase, jáema oĩ peu vaerã. Ayucaca ma chegüeye reta jare ñru cherimba iquirá vae reta. Ayapicatu ma opaete. Pecua menda pe' —pere, jei, jei—. ⁵ Ërei jae

reta uipota'ã yugüiraa. Penti vae oo ico pe. Ìru vae oo umaemee. ⁶ Jare Ìru reta uipisi mburuvicha guasu jembiocui reta, uyapo icavi mbae vae chupe reta jare uyuca reta —jei—. ⁷ Èrei mburuvicha guasu uicuaa yave cua regua, pochi ete co. Jáeramo omondo isundaro reta opa vaerã uyuca jocua upuruyuca vae reta jare uapi vaerã jenta guasu —jei—. ⁸ Jayave mburuvicha guasu jei jembiocui reta pe: 'Opaete uyeyapicatu ma oĩ yayapo vaerã menda. Èrei aparea chupe vae reta uyapo'ã jupi vae' —jei, jei—. ⁹ 'Jáeramo pecua calle rupi jare pere opaete pevãe chupe vae reta pe yugüeru vaerã menda pe' —jei, jei—. ¹⁰ Jayave mburuvicha guasu jembiocui reta yugüiraa calle rupi jare umbati opaete uvãe chupe vae reta - icavi vae uyapo vae reta jare icavi mbae vae uyapo vae reta. Jare mburuvicha guasu jo tinee ma —jei—.

¹¹ Jare mburuvicha guasu ou uvãe yave umae vaerã yugüeru vae reta re, uecha joco pe penti cuimbae temimonde menda pegua mbaeti güinoi vae —jei—. ¹² Jayave jei chupe: 'Cheamigo, ¿quirã pa ndique cua pe temimonde menda pegua mbae reve?' Èrei cuimbae jei'ã mbae ave —jei—. ¹³ Jayave mburuvicha guasu jei jembiocui reta pe: 'Piñapiti ipo rupi jare ipi rupi, jare peraa cua güi pemombo oca pe pĩtumimbi oĩ vae pe. Joco pe uyaota jare jãi umbiquiririuta' —jei—. ¹⁴ Echa'ã Tumpa ueni jeta vae reta èrei mboviño uiparavo —jei.

*¿Jupi pa yambiepi vaerã César pe?
(Mr 12.13-17; Lc 20.20-26)*

15 Jayave fariseo reta uyembati, jare uyemboemboe quirãi ipuere uyavica Jesús pe jae uyemingueta yave. 16 Jayave jae reta omondo jemimboe reta Jesús oĩ vae pe herodiano reta ndive. Jae reta jei Jesús pe:

—Oporomboe vae, nduicuaa nde ndere vae añete co. Nde ndeporomboe cavi quirãi Tumpa uipota yaico vaerã vae re. Nde netae oyovaque opaete pãve re. Nembutuicha'ã penti ave ñru vae güi —jei reta—. 17 Jáeramo emimbeu oreve, ¿quirã pa ndepia pe ndiyemingueta cua re? César yandecui yambiepi vaerã chupe corepoti pe. ¿Jupi pa yambiepi vaerã chupe? aní ¿jupi'ã pa? —jei reta.

18 Ërei Jesús uicuaa jae reta uipota tẽi co uyapo icavi mbae vae chupe, jare jei chupe reta:

—¿Maera pa pipota piyavica cheve? Pe reta co jae upurumbitavi vae reta —jei—. 19 Peechaca cheve corepoti mburuvicha guasu ocovara peve vae —jei.

Jayave güeru reta chupe penti corepoti. 20 Jayave Jesús upirandu chupe reta:

—¿Quía jova íã pa cua? ¿Quía jee pa cua uyecuatía oĩ vae? —jei.

21 —Jocua César imbae co —jei reta.

Jayave Jesús jei chupe reta:

—Pemeé César pe Cesar pegua, jare pemee Tumpa pe Tumpa pegua.

22 Cua uyandu reta yave, ipiacañi reta jese. Jayave jae reta yugüiraa Jesús güi.

*¿Icove yeta pa umanocue vae reta?
(Mr 12.18-27; Lc 20.27-40)*

²³ Jare jocua ara etei amocue saduceo reta yugüeru Jesús oĩ vae pe. Opaete saduceo reta jei umanocue vae reta icove ye'ã co. Saduceo yugüeru vae reta jei Jesús pe:

²⁴ —Oporomboe vae, Moisés jei ueya yandeve cuarãi: ‘Penti tiquei vae umano yave, jembirecocie mbaeti imembĩ chupe yave, cuimbae amĩri tivĩ tumenda jocua cuña ndive. Jayave cuña imembĩ yave, cuimbae tumbĩjee sambiaĩ tiquei amĩri jee pe.’ Jucuarãi jei Moisés —jei reta chupe —. ²⁵ Ico orepite pe penti cuimbae seis tivĩ reta güĩnoi vae. Cua cuimbae umenda, jare umano umimembĩ mbae reve. Cuimbae amĩri jaicue rupigua umenda jembirecocie ndive —jei reta— . ²⁶ Ërei jae vi umano umimembĩ mbae reve. Jae ramiño vi uyeyapo jaicue rupigua ye pe. Opaete siete reve umenda jocua cuña ndive, jare opaete siete reve umano umimembĩ mbae reve —jei reta —. ²⁷ Taicue rupi cuña umano vi. ²⁸ Jayave umanocue vae reta icove ye yave, ¿quía nunga vae jembirecorã pa icota jocua cuña? Echa'ã opaete siete reve umenda jae ndive —jei reta.

²⁹ Ërei Jesús jei chupe reta:

—Pe reta piyavi co. Echa'ã picuaa'ã Tumpa iñee uyecuatía oĩ vae jare Tumpa imbaepuere —jei—. ³⁰ Umanocue vae reta icove ye yave, cuimbae reta jare cuña reta ndarau umenda. Yugüirecota ángel ara pe ñugüĩnoi vae reta yugüireco rami —jei— . ³¹ Tamimbeu peve umanocue vae reta regua. Icove yeta co. ¿Pemingüeta'ã pa Tumpa iñee pe uyecuatía oĩ vae? ³² Echa'ã uyecuatía oĩ cuarãi: ‘Che co jae Abraham, Isaac jare Jacob iTumpa’ —

jei Tumpa. Jucuarãi uyecuatía oĩ —jei—. Tumpa mbaeti co umanocue vae reta iTumpa. Jae co tecove güinoi vae reta iTumpa —jei.

³³ Jare yatĩ vae reta cua uyandu yave, ipiacañi Jesús iporomboe re.

Mboroyocui tenondegua vae
(Mr 12.28-34)

³⁴ Ërei fariseo reta uicuaa yave saduceo reta ipuere'ã ma co mbae jei Jesús pe, amocue jae reta uyembati Jesús oĩ vae pe. ³⁵ Jayave penti fariseo - jae co penti mboroyocui re oporomboe vae vi - upirandu Jesús pe mbae re. Uipota tẽi uyavica chupe. ³⁶ Jei chupe:

—Oporomboe vae, ¿mbae nunga mboroyocui pa co jae tenondegua vae?

³⁷ Jayave Jesús jei chupe:

—Mboroyocui tenondegua vae co cua: ‘Eau ndeYa Tumpa opaete ndepia reve, opaete nderecove reve, jare opaete ndepiyemingueta reve’ —jei—. ³⁸ Cua co jae mboroyocui tenondegua vae —jei—. ³⁹ Jare jaicue rupigua vae co cua: ‘Eau nderapicha nde ndiyerau rami’ —jei—. ⁴⁰ Cua mocui mboroyocui ndiyapo yave, ndiyapo ma co opaete Moisés iporoyocui jei vae jare Tumpa iñee aracae umimbeu vae reta jei vae —jei.

¿Quía iñemoñaeta reta pegua pa co Cristo?
(Mr 12.35-37; Lc 20.41-44)

⁴¹ Jare fariseo reta Jesús oĩ vae pe uyembati yave, Jesús upirandu chupe reta:

⁴² —¿Mbae pa pepia pe piyemingueta Cristo re? ¿Quía iñemoñaeta reta pegua pa co jae?

—Jae co David iñemoñaá reta pegua —jei reta chupe.

⁴³ —Jucuarãi yave, ¿maera pa David etei jei chupe: ‘CheYa’? Echa’ã Espíritu Santo uicuaaca David pe jucuarãi jei vaerã —jei chupe reta —.

⁴⁴ Echa’ã David jei cuarãi:

‘YandeYa jei cheYa pe:

Eguapi cheyipí pe cheacata coti,

nderovaicho reta opa amiamiri regua’ —jei yandeYa.

Jucuarãi jei David aracae —jei—. ⁴⁵ ¿Quirãi pa ipuere ico David iñemoñaá reta peguarã? Echa’ã David etei jei chupe: ‘CheYa’ —jei Jesús chupe reta.

⁴⁶ Jare mbaeti quía ipuere umimbeu chupe. Jare jocua ara güive mbaeti ye quía uipota upirandu Jesús pe mbae re.

23

Jesús umbijeco mboroyocui re oporomboe vae reta jare fariseo reta

(Mr 12.38-40; Lc 11.37-54; 20.45-47)

¹ Jayave Jesús jei jeta vae pe jare jemimboe reta pe:

² —Mboroyocui re oporomboe vae reta jare fariseo reta umimbeu peve Moisés iporoyocui reta.

³ Jáeramo jecuaeño piyapo jei reta peve piyapo vaerã vae. Ërei agüiye piyapo jae reta uyapo rami.

Echa’ã jae reta etei uyapo’ã jei peve piyapo vaerã vae —jei—. ⁴ Jae reta jei ñru vae reta pe uyapo vaerã yavai uyapo vaerã vae.

Yamijaanga penti tivita. Jae reta jei ñru vae reta pe ovoí vaerã penti tivita poi vae. Ërei jae reta

ombori'ã etei ovoï vaerã. Uyaviqui'ã etei reta jivita —jei—. ⁵ Mboroyocui re oporomboe vae reta jare fariseo reta mbae uyapo yave, uipota ñru vae reta uecha vaerã. Echa'ã jae reta oñono iyee Tumpa iñee jiru tuicha vae jare uyapo jemi-monde pucu —jei—. ⁶ Yugüiraa yave tupao pe jare para pe, jecuaeño uipota uguapi tenda tenondegua vae reta pe —jei—. ⁷ Jare uipota ñru vae reta pe uyembisaludaca vaerã calle reta rupi jare jei vaerã chupe reta: 'Oporomboe vae' —jei—. ⁸ Ërei agüiye pipota ñru vae reta jei vaerã peve: 'Oporomboe vae.' Echa'ã che co jae pomboe vae, jare opaete pe reta cherivi reta co —jei—. ⁹ Jare agüiye pere: 'Cheru', penti cuimbae ivi pegua pe. Echa'ã pentiño co jae peRu, jare jae ico ara pe —jei—. ¹⁰ Jare agüiye pipota ñru vae reta jei vaerã peve: 'Cheya.' Echa'ã pentiño co jae peYa. Jae co che. Echa'ã che co jae Cristo, Tumpa ombou vae —jei—. ¹¹ Ime yave quía uipota tenondeguarã ico vae, tuyeyocui opaete ñru reta pe —jei—. ¹² Echa'ã uyembutuicha vae uñemimichicata co. Jae ramiño vi uñemimichi vae uyembutuichacata co —jei.

¹³ Jayave Jesús jei mboroyocui re oporomboe vae reta jare fariseo reta pe:

—Pe reta co jae mboroyocui re oporomboe vae reta jare fariseo reta. Piporarata co. Pe reta co jae upurumbitavi vae reta. Echa'ã pe reta piyopia ñru vae reta agüiye vaerã uique mboroyocui ara pegua pe. Pe reta etei pique'ã. Ñru vae reta uipota tēi uique, ërei pe reta piyopia reta agüiye vaerã uique —jei—. ¹⁴ Pe reta co jae mboroyocui re oporomboe vae reta jare fariseo reta. Piporarata

co. Pe reta co jae upurumbitavi vae reta. Echa'ã pepĩro cuña ime umano vae reta güi opaete imbaembae, jare pucu piyerure Tumpa pe pepurumbitavi vaerã. Jáeramo piporara eteta co —jei— . ¹⁵ Pe reta co jae mboroyocui re oporomboe vae reta jare fariseo reta. Piporarata co. Pe reta co jae upurumbitavi vae reta. Echa'ã peo peeca opaete i guasu rupi jare ivi rupi pevãe vaerã penti pepuere pemiquirẽi peporomboe güirovia vaerã vae. Jare güirovia yave peporomboe, jecuae pemboe mbaembae re. Jocua jeco pegua jae uyeyapo icavi mbae vaerã. Pe reta peota tata guasu pe. Jare jae peporomboe re güirovia ramo, oota vi tata guasu pe —jei—. ¹⁶ Pe reta co jae jesa mbae vae uechaca ñugüinoi tape ĩru vae reta pe vae reta rami. Piporarata co. Echa'ã pe reta pere: 'Ime yave quía: Tumpa jo jee re ayapota, jei vae, jocua mbae'ã co. Ĕrei ime yave quía: Oro Tumpa jo pegua jee re ayapota, jei vae, uyapota co jocua jei uyapota vae' —pere, jei—. ¹⁷ Pe reta co jae jesa mbae vae reta rami. Pe reta pearacuaa'ã. Echa'ã jocua oro uñeñono tee Tumpa peguarã, Tumpa jo pegua co ramoño. Jáeramo Tumpa jo uyembujupica ete jocua oro Tumpa jo pegua güi —jei—. ¹⁸ Jae ramiño vi pe reta pere: 'Ime yave quía: Uñemeearenda jee re ayapota, jei vae, jocua mbae'ã co. Ĕrei ime yave quía: Ofrenda jee re uñemeearenda pe oĩ vae ayapota, jei vae, uyapota co jei uyapota vae' —pere, jei—. ¹⁹ Pe reta co jae jesa mbae vae reta rami. Pe reta pearacuaa'ã. Echa'ã jocua ofrenda uñeñono tee Tumpa peguarã, uñemeearenda pe oĩ ramoño. Jáeramo uñemeearenda

uyembujupica ete ofrenda uñemee vae güi —jei— .²⁰ Jáeramo ime yave quía: Uñemeearenda jee re ayapota, jei vae, opaete ofrenda uñemeearenda pe oĩ vae uñemiñru uñemeearenda ndive —jei—. ²¹ Jae ramiño vi ime yave: Tumpa jo jee re ayapota, jei vae, Tumpa jo pe ico vae uñemiñru Tumpa jo ndive —jei—. ²² Jae ramiño vi ime yave quía: Ara jee re ayapota, jei vae, Tumpa uñemiñru ara ndive. Echa'ã ara Tumpa iguapia co —jei—. ²³ Pe reta co jae mboroyocui re oporomboe vae reta jare fariseo reta. Piporarata co. Pe reta co jae upurumbitavi vae reta. Echa'ã pemee Tumpa pe diezmo temiti reta penoi vae güi. Ërei cua michi ete. Mboroyocui jei peve piyapo vaerã jeta ete cua güi. Echa'ã jei peve piyapo vaerã jupi vae jare pepuruparareco vaerã jare pepurugüirovia vaerã. Piyapo'ã opaete cua. Icavi co pemee vaerã Tumpa pe jocua nunga diezmo. Ërei piyapota tēi jupi vae jare pepurupararecota tēi jare pepurugüiroviata tēi —jei—. ²⁴ Pe reta co jae jesa mbae vae uechaca ñugüinoi tape ñru vae reta pe vae reta rami. Pe reta peatēi pemocui penti ñeti, Ërei pemocui penti camello —jei—. ²⁵ Pe reta co jae mboroyocui re oporomboe vae reta jare fariseo reta. Piporarata co. Pe reta co jae upurumbitavi vae reta. Pe reta co jae taza jare plato icupe rupiño uyeyoe vae rami. Ërei pepia iquia co. Echa'ã pipota ñru vae reta imbaembae jare piyapo icavi mbae vae —jei—. ²⁶ Pe reta co jae fariseo reta. Pe reta co jae jesa mbae vae reta rami. Piyoe rani pepia, taza jare plato japipe rupi piyoe rami. Jayave icupe rupi vi uyeyoeta —jei—. ²⁷ Pe reta co jae mboroy-

ocui re oporombœ vae reta jare fariseo reta. Piporarata co. Pe reta co jae upurumbitavi vae reta. Echa'ã pe reta co jae teõgüeriru uñemotĩ cavi vae reta rami. Jocua nunga teõgüeriru ipõra echa, ãrei japipe pe tinee umanocue vae reta icãgüecue reta pe jare iquia —jei—. ²⁸ Jae ramiño vi ñru vae reta ipia pe uyemingueta tẽi pe reta co jae jupi vae reta, ãrei pepia tinee tavi jare icavi mbae vae pe —jei—.

²⁹ Pe reta co jae mboroyocui re oporombœ vae reta jare fariseo reta. Piporarata co. Pe reta co jae upurumbitavi vae reta. Echa'ã pe reta piyapo Tumpa ñnee aracae umimbeu vae reta iteõgüeriru reta, jare pemopõra jupi vae reta iteõgüeriru reta —jei—. ³⁰ Jare pere: 'Yande yaico yave mona yandetondegua reta yugüireco yave, yande yamborita'ã tẽi jae reta uyuca yave Tumpa ñnee aracae umimbeu vae reta' —pere, jei—. ³¹ Jucuarãi pere ramo, picuaaca quirãi pe reta co jae Tumpa ñnee aracae umimbeu vae reta uyuca vae reta ññemoñaeta reta pegua —jei—. ³² Agüiyeta tẽi ma piyapo petenondegua reta uyapo rami —jei—. ³³ Pe reta mboi reta rami co. Añete co, pe reta mboi reta ññemoñaeta reta rami co. Ndarau etei piyerepi Tumpa perãa yave peo vaerã tata guasu pe —jei—. ³⁴ Amondota peve chiñee umimbeu vae reta jare iyaracuaa catu vae reta jare cheporoyocui re oporombœ vae reta. Picututa curusu re amocue vae piyuca, jare pinupata chicote pe amocue vae petupao reta pe jare peaicuemoñata reta penti tenta guasu güi ñru tenta guasu pe —jei—. ³⁵ Jare pe reta penoita teco opaete jupi vae reta imano re. Tenonde voi Abel uyeyucaca - jae co jupi vae - jare

taicue rupi Berequías tai Zacarías jee vae uyeyucaca. Echa'ã Zacarías umano maemimba uyeyucacue uñemearendá jare Tumpa jo ipãu pe —jei—. ³⁶ Añete che jae peve, cua reta jare opaete ñru vae reta imano re pe reta añave pico vae piyembijecota —jei—.

*Jesús ipiatiti Jerusalén pegua reta re
(Lc 13.34-35)*

³⁷ Jerusalén pegua reta, pe reta piyuca Tumpa ñnee aracae umimbeu vae reta. Pe reta piyapi ita pe piyuca Tumpa ombou peve vae reta. Jeta vese ma chequirẽi tẽi pumbati, uru umbati imembĩ reta ipepo igũi pe rami, ãrei pe reta pipota'ã —jei—. ³⁸ Mase, Tumpa usirita ma pegũi. ³⁹ Che jae peve, ndarau ma cherecha pere regua: 'Tuyembĩadoraca yandeYa jee re ou vae' —jei—.

24

*Tumpa jo uyeitita
(Mr 13.1-2; Lc 21.5-6)*

¹ Jayave Jesús oẽ Tumpa jo gũi. Jare jemimboe reta yugũeru uechaca Jesús pe opaete o Tumpa jo pe ñugũinoi vae reta. ² Jare Jesús jei chupe reta: —¿Pemaẽ pa peĩ opaete cua o reta re? Añete che jae peve, ndarau upita penti ave ita ñru ita iárambo. Opaete uyeitita co —jei—.

*Mbaesusere reta uyeyapota vae
(Mr 13.3-23; Lc 21.7-24; 17.22-24)*

³ Jare Jesús uguapi oĩ rambueve ivitu guasu Olivos re, jemimboe reta yugũeru jae oĩ vae pe jare jei chupe, jae retaño jae ndive ñugũinoi yave:

—Emimbeu oreve, ¿quirãî yave pa cua uyeyapota? Jare ndeyu yeta ma yave, ¿quirãîta pa nduicuaa? Jare cua ara reta opata ma yave, ¿quirãîta pa nduicuaa? —jei reta.

⁴Jayave Jesús jei chupe reta:

—Piñemoa ngatu agüiye vaerã petavi. ⁵Echa'ã yugüeruta jeta cheree pe uyembijeeta vae reta. Jae reta jeita: 'Che co jae Cristo.' Jare umbitavita jeta vae reta —jei—. ⁶Imeta co ñerãro reta coiño pegüi. Imeta vi ñerãro reta mbiri pegüi. Piyandu yave cua reta regua, agüiye pequiye. Cua susere reta uyeyapoñotai co. Ërei cua susere reta ndei ave co opa vaerã —jei—. ⁷Penti ivi pegua reta uñerãrota ambie ivi pegua reta ndive, jare mburuvicha reta uñerãrota ñru mburuvicha reta ndive. Jare imeta caruai reta jare ivicãta jeta que rupi —jei—. ⁸Ërei cua susere reta uyembipi ramo co oî —jei—.

⁹Jayave ñru vae reta pemeeta uiporaracata peve vae reta pe, jare piyeyucacata. Jare piñemitarëicata opaete vae pe chereco pegua —jei—. ¹⁰Jare jeta vae uñatima yeta Tumpa güi jare uñemeeta reta jare uñemitarëita —jei—. ¹¹Jare jeta upurumbitavi vae reta jeita: 'Che co jae penti Tumpa iñee umimbeu vae.' Jáeramo jae reta umbitavita jeta vae —jei—. ¹²Jare jeta vae uyapota icavi mbae vae. Jáeramo jeta tenonde yave upuruau vae reta ndarau ma upuruau —jei—. ¹³Ërei jõsata oo uvãe iyapi pe vae uyembiasacata co —jei—. ¹⁴Jare cua ñee icavi vae Tumpa iporoyocua pegua jerãcuata opaete ivi rupi opaete ivi pegua reta uyandu vaerã. Jayave cua ara reta opata co —jei—.

15 Jare peeçhata icavi mbae vae opaete urucumegua vae uyemboi oĩ o uñeñoño tee Tumpa peguarã vae pe. Tumpa iñee aracae umimbeu vae Daniel jei uyecuaata co. (Umingueta vae tucuaa) —jei—. 16 Jayave Judea pe ñugüinoi vae reta tosi ivitu guasu coti. 17 Jare o cupe re oĩ vae agüiye tuique jo pe güiraa vaerã imbaembae —jei—. 18 Jare ico pe oĩ vae agüiye tou ye jenta pe güiraa vaerã iyasoya —jei—. 19 Jare ipurúa vae reta jare umicambu vae reta uiporara eteta jocua ara reta pe —jei—. 20 Jare piyerure Tumpa pe agüiye vaerã pesi roi ma yave ani mbutuu ara pe —jei—. 21 Echa'ã jocua ara reta pe ivi pegua reta uiporara eteta. Jucuarã'i'ã uiporara reta ivi uyeyapo güive, jare ndarau ye jucuarã'i uiporara reta —jei—. 22 Jare yandeYa uipota'ã yave opa vaerã jocua ara reta, mbaetita tẽi quía ipuere ico. Ërei Tumpa uiparavo vae reta jeco pegua opata jocua ara reta —jei—.

23 Aramoi jocua ara reta pe quía jeita peve: 'Mase, co oĩ Cristo', ani jeita: 'Mase, pee oĩ Cristo.' Jucuarã'i jei yave, agüiye perovia —jei—. 24 Amocue upurumbitavi vae reta jeita: 'Che co jae Cristo', jare ñru upurumbitavi vae reta jeita: 'Che co jae Tumpa iñee umimbeu vae.' Jare jae reta uyapota miacañi reta, umbitavi vaerã tẽi Tumpa uiparavo vae reta —jei—. 25 Mase, amimbeu ma peve cua, ndei uyeyapo mbove —jei—.

26 Jayave ñru vae reta jei yave peve: 'Mase, ime co ñana pe oĩ', agüiye pecua. Jare ñru vae reta jei yave peve: 'Mase, ime co cua o pe oĩ', agüiye perovia —jei—. 27 Tamijaanga ama uvera vae. Echa'ã ama

uvera vae uyecuaa opaete ara re guarasi oẽ vae coti güi guarasi uique vae coti pe. Jae ramiño vi che cuimbaerã ayeyapo vae ayecuaata opaete vae pe ayu ye yave —jei—.

²⁸ Umano vae jetecue oĩ vae pe uyembatita uruvi reta —jei—.

Cuimbaerã uyeyapo vae ou yeta
(Mr 13.24-37; Lc 21.25-36; 17.26-36)

²⁹ Jayave opa uiporara reta jocua ara reta pe yave, guarasi uñemipĩtumimbita, jare yasi ndarau ma jembipe, jare yasitata reta oata ara güi, jare opaete ara re mbaepuere güinoi vae reta ucātata —jei—. ³⁰ Jayave mbae uyecuaata ara re. Jocua uicuaacata ivi pegua reta pe che cuimbaerã ayeyapo vae ayu yeta co. Jayave opaete ati Israel pegua reta ipiatitita jare cherechata ayu amapĩtu reve ara güi. Che cuimbaerã ayeyapo vae anoita mbaepuere tuicha vae, jare ayembiaadoracata opaete vae pe —jei—. ³¹ Jare amondota ángel cheve uyeyocui vae reta trompeta uñee reve, jae reta güeru vaerã aiparavo vae reta opaete ivi rupi güi —jei—.

³² Yandepuere yamijaanga iva. Piyemboe jese —jei—. Joqui yave, picuaa uyaro ma co ama oqui vaerã —jei—. ³³ Jae ramiño vi pe reta peecha yave opaete cua mbaembae uyeyapo ñugüinoi vae, picuaata che coiño ma co aĩ —jei—. ³⁴ Añete che jae peve, cua ivi pe añave yugüireco vae reta ndarau opa umano ndei opaete cua mbaembae uyeyapo mbove —jei—. ³⁵ Ara jare ivi opata, ãrei chiñee ndarau opa —jei—.

³⁶ Ërei mbaeti quía uicuaa mbae ara pe ani mbae ora pe yepe cua uyeyapota, jaeño cheRu. Ángel ara pe ñugüinoi vae reta uicuaa'ã. Che co jae Tumpa Tai. Ërei che ave aicuaa'ã —jei—. ³⁷ Noé ico rambueve, ivi pegua reta uyapo icavi mbae vae. Jae ramiño vi che cuimbaerã ayeyapo vae ayu ye yave, ivi pegua reta uyapota icavi mbae vae —jei—. ³⁸ Ndei iporu guasu ou mbove, ivi pegua reta ucaruñoi jare ucauñoi yugüireco, jare jecuaeño cuimbae reta umenda cuñatai reta ndive jare tu reta umee tayi reta cuimbae reta pe umenda jae ndive vaerã. Ërei penti ara Noé uique jocua chalana guasu pe —jei—. ³⁹ Jare uyepocouca reta, iporu guasu ou yave. Jáeramo iporu guasu opa uyuca reta. Jucuarãita vi uyeyapo che cuimbaerã ayeyapo vae ayu ye yave —jei—. ⁴⁰ Jocua ara mocui cuimbae imeta co pe ñugüinoi. Penti vae uyereraacata jare ñru vae upitata co pe —jei—. ⁴¹ Jae ramiño vi mocui cuña umbaesota ñugüinoi penti angúa pe. Penti vae uyereraacata jare ñru vae upitata —jei—. ⁴² Jáeramo jecuaeño peãro. Echa'ã picuaa'ã mbae ara pe ayu yeta. Che co jae peYa —jei—. ⁴³ Aipota picuaa vaerã cua: Penti tenta iya uicuaa yave mbae ora pe outa uvãe imonda vae oñomi vaerã imbaembae jenta güi, uñemicutãirota tãi jare ndarau tãi umaño imonda vae re güiraa vaerã imbaembae chugüi —jei—. ⁴⁴ Jae ramiño vi pe reta peãro, agüiye vaerã che cuimbaerã ayeyapo vae ayu ye avãe piyandareco'ã pãi yave —jei—.

*Uyeyocui vae uyapo'a ipatrón jei vae
(Lc 12.41-48)*

⁴⁵ Penti uyeyocui vae iyaracuaa vae uyapo ipatrón jei chupe uyapo vaerã vae. Jare ipatrón umee chupe ico vaerã ñru jembiocui reta juvicharã, jare umee vaerã chupe reta jembicurã opa ara —jei—. ⁴⁶ Ipatrón ou ye uvãe yave jenta pe, uecha yave jocua jembiocui uyapo oñ iparaviqui, jocua jembiocui uyeroviata co —jei—. ⁴⁷ Añete che jae peve, ipatrón umeeta chupe uyandareco vaerã opaete imbaembae re —jei—. ⁴⁸ Ërei aramoi uyeyocui vae uyapo icavi mbae vae jare jei iyupe ipia pe: ‘Chepatrón ndarau ou ye imambae.’ ⁴⁹ Jare umbipi uinupa ñru uyeyocui vae reta, jare ucaru jare ucau usavipo vae reta ndive —jei—. ⁵⁰ Jayave penti ara ipatrón ou yeta uvãe jembiocui uyandareco'ã oñ yave. Jocua ora pe etei ipatrón uipocouta —jei—. ⁵¹ Jayave ipatrón uiporarcata chupe jare omondota ico vaerã opaete ñru upurumbitavi vae reta ndive. Joco pe uyaota jare jãi umbiquiriruta —jei—.

25

Diez cuñatai cuimbae güireco'ã etei vae reta

¹ Mboroyocua ara pegua diez cuñatai cuimbae güireco'ã etei vae reta rami co. Penti penti cuñatai güiraa ilámpara oẽ oo uñeovãiti vaerã cuimbae umendata vae ndive —jei—. ² Jare pandepo jocua cuñatai reta iyaracuaa, jare ñru pandepo vae reta iyaracuaa mbae vae —jei—. ³ Jocua iyaracuaa mbae vae reta güiraa ilámpara, ãrei güiraa'ã aceite lámpara peguarã —jei—. ⁴ Ërei iyaracuaa vae reta güiraa vi aceite lámpara peguarã aceite jiru pe —jei—. ⁵ Jare ndeiño ou uvãe cuimbae umendata

vae. Jáeramo opaete cuñatai reta jopei jare oque — jei—.

⁶ Jare piare mbite yave uyendu ñee. ‘Mase, outa ma uvãe cuimbae umendata vae. Pecua peovãiti’ —jei, jei—. ⁷ Jayave opaete jocua cuñatai reta upũa jare uyapicatu ilámpara —jei—. ⁸ Jare cuñatai iyaracuaa mbae vae reta jei cuñatai iyaracuaa vae reta pe: ‘Pemee mi oreve michi peaceite. Echa'ã orelámpara ove ma’ —jei reta, jei—. ⁹ Ërei cuñatai iyaracuaa vae reta jei: ‘Numee yave peve, ndarau ndipo uepiti oreve. Icavi ndipo pe reta peo vaerã aceite umee vae reta pe pegua vaerã piyupe’ —jei reta, jei—. ¹⁰ Jare cuñatai iyaracuaa mbae vae reta yugüiraa aceite ueca rambueve, ou uvãe cuimbae umendata vae. Jare cuñatai iyaracuaa vae reta uique jae ndive menda uyeyapo oĩ vae pe. Jayave onque uyeyuquenda —jei—.

¹¹ Jare taicue rupi yugüeru uvãe jocua ñru cuñatai reta jare jei: ‘Oreya, oreya, ipea oreve onque.’ ¹² Ërei cuimbae jei chupe reta: ‘Añete che jae peve, pucuaa'ã.’

¹³ Jáeramo jecuaeño peãro. Echa'ã picuaa'ã mbae ara pe jare mbae ora pe che cuimbaerã ayeyapo vae ayu yeta —jei—.

Talento reta (Lc 19.11-27)

¹⁴ Tamijaanga penti cuimbae ivi güi ambie ivi mbiri oĩ vae pe oota vae. Ndei oo mbove, ueni jembiocui reta jare jei chupe reta uyandareco vaerã imbaembae re —jei—. ¹⁵ Jayave umee penti jembiocui pe pandepo corepoti talento jee vae. Jare umee ñru jembiocui pe mocui talento. Jare umee

ĩru jembiocui pe penti talento. Echa'ã umee chupe reta penti penti ipuereta uyapo vae rupi. Jayave cuimbae oo ambie ivi coti —jei—. ¹⁶ Jayave pandepo talento güinoi vae umbipi umimbaraviqui icorepoti, jare jucuarãi umĩru jocua pandepo talento ndive pandepo ye —jei—. ¹⁷ Jae ramiño vi mocui talento güinoi vae umbipi umimbaraviqui icorepoti, jare jucuarãi umĩru jocua mocui talento ndive mocui ye —jei—. ¹⁸ Ĕrei penti talento güinoi vae oo oyoo ivi jare oñomi ivigüi pe corepoti ipatrón umee chupe vae —jei—.

¹⁹ Jare ima ma yave jocua uyeyocui vae reta ipatrón ou ye uvãe ivi pe jare upirandu chupe reta mbae ra uyapo icorepoti umee chupe reta vae pe —jei—. ²⁰ Jare tenonde yave pandepo talento güinoi vae güeru jocua pandepo talento ĩru pandepo talento umĩru vae reve, jare jei ipatrón pe: 'Patrón, nde neme cheve pandepo talento. Mase, amĩru jae reta ndive pandepo talento ye' —jei, jei—. ²¹ Jayave ipatrón jei chupe: 'Icavi ndiyapo. Nde co jae cherembicui icavi vae. Ndiyeyocui cavi cheve cua mbovi vae re. Jáeramo tamee ndeve jeta mbaembae ndiyandareco jese vaerã. Iyerovia che ndive' —jei, jei—. ²² Jae ramiño vi tenonde yave mocui talento güinoi vae ou jei ipatrón pe: 'Patrón, nde neme cheve mocui talento. Mase, amĩru jae reta ndive mocui talento ye' —jei, jei—. ²³ Jayave ipatrón jei chupe: 'Icavi ndiyapo. Nde co jae cherembicui icavi vae. Ndiyeyocui cavi cheve cua mbovi vae re. Jáeramo tamee ndeve jeta mbaembae ndiyandareco jese vaerã. Iyerovia che ndive' —jei, jei—. ²⁴ Jayave tenonde yave penti

talento güinoi vae ou jei ipatrón pe: ‘Patrón, che nducuaa co. Aicuaa nde co jae penti cuimbae jecopochi vae. Nde nepĩro mbaembae ĩru vae reta güi, jare ndeaviro ĩru vae reta oñoti vae’ —jei, jei—. ²⁵ ‘Jáeramo aquiye ndegüi ramo, aa añomi ndecorepoti ivigüi pe. Mase, co oĩ nembae’ —jei, jei—. ²⁶ Jayave ipatrón jei chupe: ‘Nde co jae cherembiocui icavi mbae vae. Ndeaquĩ co. Nde ndicuaa quirãĩ apĩro mbaembae ĩru vae reta güi jare quirãĩ aaviro ĩru vae reta oñoti vae’ —jei, jei—. ²⁷ ‘Jáeramo nderaata tẽi checorepoti banco pe. Echa’ã jucuarãĩ ndiyapo yave, ayu ye yave nemeeta tẽi co cheve corepoti amee ndeve vae jare mbovi ye banco pegua reta umĩruta tẽi jae ndive vae’ —jei, jei—. ²⁸ Jayave ipatrón jei jembiocui reta pe: ‘Pepĩro chugüi jocua penti talento emee diez talento güinoi vae pe’ —jei, jei—. ²⁹ ‘Echa’ã güinoi vae pe uñemĩruta. Jeta eteta güinoi. Ërei mbaeti güinoi vae güi mbovi ete güinoi vae uyeequita’ —jei, jei—. ³⁰ ‘Ërei pemombo cua cherembiocui uyeyocui cavi’ã cheve vae oca pe pĩtumimbi oĩ vae pe. Joco pe uyaota jare jãĩ umbiquirĩuta’ —jei, jei—.

Opaete ivi pegua reta uñeaãcata

³¹ Che cuimbaerã ayeyapo vae ayu ye yave ayembiaadoraca vaerã, opaete ángel uñeñono tee Tumpa peguarã vae reta yugüeruta che ndive. Jayave aguapita cheguapia yembiaadora pegua pe —jei—. ³² Jare uyembatita cherovai opaete ivi pegua reta. Jare ambiyaota amocue vae ĩru vae reta güi, penti cuimbae umbiyao iovecha reta icapura reta güi rami —jei—. ³³ Jare añonocata

ovecha reta cheacata coti jare capura reta cheaso coti —jei—. ³⁴ Che co jae Mburuvicha Guasu. Jaeta cheacata coti ñugüinoi vae reta pe: ‘Peyu pico mboroyocua ivi uyeyapo güive uñemicuatĩro peve vae pe. CheRu pemivendise ma’ —jaeta, jei—. ³⁵ ‘Echa’ã chiyembaï yave, pemee acarü. Cheúe aico yave, pemee jau i. Yepe tẽi che co jae ambie ivi pegua, ãrei pemaẽño vite cheré aico vaerã perenta pe’ —jaeta, jei—. ³⁶ ‘Chenani yave, pemee cheve cheremimonderã. Chembaerasi yave, pepou chepi. Peresoriru pe aĩ yave, peyu pepou chepi’ —jaeta, jei—. ³⁷ Jayave jupĩ vae reta jeita cheve: ‘OreYa, ¿quirãï yave pa nduecha ndiyembaï yave jare numee ndecaru? ¿Quirãï yave pa nduecha ndeúe yave jare numee ndeu i?’ —jeita, jei—. ³⁸ ‘¿Quirãï yave pa nduecha penti ambie ivi peguarã ndico yave, jare numaeño nderé ndico vaerã orerenta pe? ¿Quirãï yave pa nduecha nenani jare numee ndeve nderemimonderã?’ —jeita, jei—. ³⁹ ‘¿Quirãï yave pa nduecha nembraerasi ani peresoriru pe jare ndopou ndepi?’ —jeita, jei—. ⁴⁰ Jayave che jaeta chupe reta: ‘Añete che jae peve, jucuarãï piyapo cherivi reta pe, yepe tẽi uñererĩroca. Jare jucuarãï piyapo yave, piyapo co cheve vi’ —jaeta, jei—.

⁴¹ Jayave jaeta cheaso coti ñugüinoi vae reta pe: ‘Pesiri chegüi pecua tata opa mbae vae pe. Jocua tata uñemicuatĩro ma oĩ aña guasu jare opaete ángel chupe uyeyocui vae reta pe. Tumpa uiporacata peve’ —jaeta, jei—. ⁴² ‘Echa’ã chiyembaï yave, pemee’ã acarü. Cheúe yave, pemee’ã i jau’ —jaeta, jei—. ⁴³ ‘Che co jae ambie ivi pegua jare

pemaño'ã cheré aico vaerã perenta pe. Chenani yave, pemee'ã cheve cheremimonderã. Chembaerasi yave jare peresoriru pe añ yave, pepou'ã chepi' —jaeta, jei—. ⁴⁴ Jayave jae reta vi jeita cheve: 'OreYa, ¿quirã i yave pa nduecha ndiyemba i yave, ani ndeúe yave, ani ambie ivi peguarã ndico yave, ani nenani yave, ani nembraerasi yave, ani peresoriru pe neí yave, jare nombori'ã?' —jeita, jei—. ⁴⁵ Jayave che jaeta chupe reta: 'Añete che jae peve, pembori'ã cherivi ññereriroca vae reta. Jare jucuarã i co chembora i'ã' —jaeta, jei—. ⁴⁶ Jare cua reta yugüiraata tata guasu pe. Joco pe uiporarata reta jaeño mai pegua. Ërei jupi vae reta güinoita tecove opa mbae vae —jei.

26

Uipota reta uyucaca Jesús

(Mr 14.1-2; Lc 22.1-2; Jn 11.45-53)

¹ Jare opaete cua jei ma yave, Jesús jei jemimboe reta pe:

² —Picuaa mocui araño ma co uata pascua iara uvãe vaerã, jare che cuimbaerã ayeyapo vae añemecata co ayecutuca vaerã —jei.

³ Jare sacerdote reta itenondegua reta jare tenta guasu pegua reta itenondegua reta uyembati sacerdote tenondegua joca pe. Sacerdote tenondegua jee co Caifás. ⁴ Jare uyemboemboe reta quirã i ipuere uipisi viari Jesús uyucaca vaerã. ⁵ Ërei jei reta:

—Agüiye yaipisi pascua ara rupi, agüiye vaerã tenta guasu pegua reta uyapo tecorai.

*Cuña upiyere mbae ipiche cavi vae Jesús re
(Mr 14.3-9; Jn 12.1-8)*

⁶ Jare Jesús oĩ rambueve tenta guasu-rai Betania pe Simón ipire ocuise vae jenta pe, ⁷ uique penti cuña. Jae güeru iru-rai ita alabastro jee vae pegua. Cua iru-rai tinee mbae ipiche cavi vae jepi vae pe. Jare cuña upiyere mbae ipiche cavi vae Jesús inãca re, Jesús mesa pe uguapi oĩ rambueve. ⁸ Jare Jesús jemimboe reta cua uecha yave, pochi cuña pe. Jei reta:

—¿Maera pa umicañitei? ⁹ Echa'ã umee yave corepoti re, guinoita tēi jeta corepoti umee vaerã iparavete vae reta pe —j ei reta.

¹⁰ Ërei Jesús uicuaa jei reta vae, jare jei chupe reta:

—¿Maera pa pemambeco cuña? Icavi vae co uyapo cheve —j ei—. ¹¹ Echa'ã yugüirecoñotai co iparavete vae reta pe reta ndive, ãrei che ndarau aicoño pe reta ndive —j ei—. ¹² Cua mbae ipiche cavi vae upiyere cheré vae pe chembipiche cavi ma, ndei añeñotica mbove —j ei—. ¹³ Añete che jae peve, opaete ivi rupi ñee icavi vae jerãcua vae rupi, cua uyapo vae vi jerãcuata, ñru vae reta imandúa vaerã jese —j ei.

*Judas umeeta Jesús
(Mr 14.10-11; Lc 22.3-6)*

¹⁴ Jayave jocua doce jemimboe reta güi penti Judas Iscariote jee vae oo sacerdote reta itenondegua reta ñugüinoi vae pe, ¹⁵ jare jei chupe reta:

—¿Mbae pa pemeeta cheve, amee yave Jesús peve?

Jayave jae reta jei umeeta co chupe treinta corepoti. ¹⁶ Jayave jocua güive Judas ueca quirãi ipuere umee Jesús chupe reta.

Jesús ucaru jemimboe reta ndive

(Mr 14.12-25; Lc 22.7-23; Jn 13.21-30; 1 Cor 11.23-26)

¹⁷ Jare jocua ara judío reta umbipi jou mbiyape ovu mbae vae yave, Jesús jemimboe reta yugüeru jei chupe:

—¿Quíape pa ndipota nduyapícatu vaerã, tembúu pascua pegua ndeu vaerã?

¹⁸ Jayave Jesús jei chupe reta:

—Pecua tenta guasu pe pere cuimbae amimbeu peve vae pe: ‘Oporomboe vae jei: Ora uvãe ma. Jauta tembúu pascua pegua nerenta pe cheremimboe reta ndive’ —jei, pere chupe, jei.

¹⁹ Jayave jemimboe reta uyapo Jesús jei chupe reta uyapo vaerã vae. Jare uyapo reta tembúu pascua pegua jou reta vaerã.

²⁰ Jare pítu ma yave Jesús uguapi ucaru vaerã jocua doce jemimboe reta ndive. ²¹ Jare ucaru ñugüinoi rambueve, Jesús jei chupe reta:

—Añete che jae peve, penti pepite pe oĩ vae chemeeta cherovaicho reta pe.

²² Jayave jae reta ipiatiti, jare jei Jesús pe penti penti rupi:

—CheYa, ¿che pa co jae?

²³ Jayave Jesús jei chupe reta:

—Mbiyape umãqui oĩ che ndive plato pe vae co jae. ²⁴ Che cuimbaerã ayeyapo vae aañotai amano vaerã, uyecuatía oĩ cheregua rami. Ërei jocua

cuimbae chemeeta vae uiporarata co. Icavi tēi mona jocua cuimbae mbaeti ico yave —jei.

²⁵ Jayave Judas (Jesús umee vae) jei chupe:

—Oporomboe vae, ¿che pa co jae?

—Ndere ma co —jei Jesús chupe.

²⁶ Jare ucaru ñugüinoi rambueve, Jesús uipisi mbiyape, jare umee yasurupai Tumpa pe. Jayave upisãa mbiyape jare umee jemimboe reta pe.

—Peu —jei chupe reta—. Cua co jae cherete —jei.

²⁷ Jayave Jesús uipisi vi penti copa, jare yasurupai umee ye yave Tumpa pe, umee jemimboe reta pe.

—Peu opaete pe reta —jei—. ²⁸ Cua co jae cherugüi. Cherugüi uyepiyereta, Tumpa jei piaui ye vae uyeyapo vaerã, jare Tumpa umbiasa vaerã jeta vae pe imbaeyoa reta —jei—. ²⁹ Ërei che jae peve, ndarau ma jau uva ticuecue, cheRu iporoyocuia pe uva ticuecue ipiaui vae pe reta ndive jau regua —jei.

Pedro uicuacuta Jesús

(Mr 14.26-31; Lc 22.31-34; Jn 13.36-38)

³⁰ Jare opa yave ucanta reta Tumpa pe, oẽ reta yugüiraa ivitu guasu Olivos coti. ³¹ Jayave Jesús jei chupe reta:

—Opaete pe reta chereyata cua pĩtu. Echa'ã Tumpa ñnee pe uyecuatía oĩ cuarãi: 'Ayucata ovecha reta iyandarecoa, jare ovecha reta opata uñemiai.' Jucuarãi uyecuatía oĩ —jei—. ³² Ërei aicove ye ayu yave umanocue vae reta ipite güi, aata perenonde Galilea pe —jei.

³³ Jayave Pedro jei Jesús pe:

—Yepe tēi opaete ĩru reta tandereya, ěrei che ndarau ndueya.

³⁴—Añete che jae ndeve —jei Jesús chupe—, cua pĩtu etei, ndei uru cuimbae uñee mbove, mbapi vese ma checuacuta —jei.

³⁵ Ęrei Pedro jei chupe:

—Yepe tēi tamano nde ndive, ěrei ndarau nducua.

Jare jucuarāi vi jei opaete Jesús jemimboe reta.

Jesús uyerure Getsemaní pe
(Mr 14.32-42; Lc 22.39-46)

³⁶ Jayave Jesús oo jae reta jupíe uvāe Getsemaní pe. Jare Jesús jei jemimboe reta pe:

—Peguapi cua pe, che aa pea pe ayerure Tumpa pe rambueve.

³⁷ Jayave güiraa Pedro jare jocua mocui Zebedeo tai reta, jare umbipi ipiatiti jare uiporara. ³⁸ Jayave jei jocua mbapi jemimboe reta pe:

—Tuicha chepiatiti, jare amano pota echa. Pepita cua pe, jare agüiye peque —jei.

³⁹ Jayave Jesús usiri catu chugüi reta, jare uyeatica ivi re jare uyerure Tumpa pe.

—CheRu, nde ndipota yave, embiasa chegüi cua aiporarata vae. Ęrei tuyeyapo cheve nde ndere vae. Agüiye tuyeyapo che jae vae —jei.

⁴⁰ Jayave Jesús ou ye jemimboe reta ñugüinoi vae pe, jare uecha oque ñugüinoi. Jayave jei Pedro pe:

—¿Pepuere'ã pa penti ora yepe peque mbae peĩ chembori vaerã? ⁴¹ Agüiye peque. Piyerure Tumpa pe, agüiye vaerã peyoa. Pepia pe peratangātu co, ěrei perete iyaqui co —jei.

⁴² Jayave Jesús usiri ye uyerure Tumpa pe.

—CheRu, nde ndipota yave aiporara vaerã, tuyeyapo cheve nde ndere vae —jei.

⁴³ Jayave ou ye jemimboe reta ñugüinoi vae pe, jare uecha oque ye ñugüinoi. Echa'ã jae reta jopei ete ma.

⁴⁴ Jayave Jesús usiri ye chugüi reta uyerure Tumpa pe. Uyerure ye tenonde yave uyerure rami. ⁴⁵ Jayave ou ye jemimboe reta ñugüinoi vae pe jare jei chupe reta:

—Peque jare peputuuño ma. Mase, ora uvãe ma. Che cuimbaerã ayeyapo vae penti vae chemeeta cuimbae jeco pochi vae reta pe —jei—. ⁴⁶ Pepña. Yaaño ma. Mase, chemeeta vae coiño ma ou —jei.

Uipisi reta Jesús

(Mr 14.43-50; Lc 22.47-53; Jn 18.2-11)

⁴⁷ Jare uyemingueta oĩ rambueve, ou Judas - jae co jocua doce vae güi penti. Jeta vae yugüeru jae ndive iquisepecu reve jare iivira reve reve. Sacerdote reta itenondegua reta jare tenta guasu pegua reta itenondegua reta ombou Jesús pe cua reta. ⁴⁸ Jare umeeta vae umimbeu ma ñru reta pe mbae uyapota vae. Jei ma chupe reta:

—Jocua ayurupiteta vae co jae. Pipisi curi —jei.

⁴⁹ Judas ou voi Jesús oĩ vae pe.

—Pĩtu ma, oporomboe vae —jei chupe.

Jayave uyurupite.

⁵⁰ Jayave Jesús jei chupe:

—Cheamigo, ¿maera pa ndiyapo jucuarãi?

Jayave ñru reta yugüeru uipisi Jesús. ⁵¹ Jare penti Jesús ndive oĩ vae uipisi iquisepecu jare uequi jiru güi, jare uiporu sacerdote tenondegua jembiocui

inambi re, jare uyasia inambi chugüi. ⁵² Jayave Jesús jei chupe:

—Iñono ye quisepucu jiru pe. Echa'ã opaete quisepucu uiporu vae reta uyeyucacata quisepucu pe —jei—. ⁵³ Aipota yave, chepuere ayerure cheRu pe ombou voi vaerã jeta ángel reta cherepi vaerã. ¿Ndicuaa'ã pa cua? —jei—. ⁵⁴ Ërei jucuarãi yave, ¿quirãita pa uyeyapo Tumpa iñee pe uyecuatía oĩ vae? Echa'ã jei jucuarãita co uyeyapo cheve —jei.

⁵⁵ Jayave Jesús jei yugüeru vae reta pe:

—¿Maera pa peru quisepucu reta jare ivira reta chepisi vaerã, imonda vae pipisi vae rami? Opa ara aguapi pe reta ndive Tumpa jo pe. Joco pe aporomboe, jare chepisi'ã —jei—. ⁵⁶ Ërei opaete cua uyeyapo oĩ Tumpa iñee aracae umimbeu vae reta uicuatía vae uyeyapo vaerã —jei.

Jayave opaete jemimboe reta ueya Jesús, jare opa osi.

Jesús uyemboi jovaicho reta jovai

(Mr 14.53-65; Lc 22.54, 63-71; Jn 18.12-14, 19-24)

⁵⁷ Jayave Jesús uipisi vae reta güiraa sacerdote tenondegua Caifás jenta pe. Jare joco pe uyembati ma mboroyocui re oporomboe vae reta jare tenta guasu pegua reta itenondegua reta.

⁵⁸ Jare Pedro oo vi Jesús jaicue. Ërei mbiriño oo chugüi. Jae uique sacerdote tenondegua joca pe, jare uguapi sacerdote tenondegua jembiocui reta ndive, uecha vaerã mbae uyeyapota vae. ⁵⁹ Jare sacerdote reta itenondegua reta jare opaete ñru mburuvicha reta ueca quía uñeapo vaerã Jesús re iyapu reve, uyucaca vaerã. ⁶⁰ Ërei uvãe'ã reta

teco jese, yepe tēi jeta vae iyapu reve uñeapo jese. Taiꝑue rupi mocui vae iyapu reve uñeapo jese.

⁶¹ Jae reta jei:

—Cua cuimbae jei: ‘Chepuere ambusururu Tumpa jo jare ayapo ye mbap̄i ara pe’ —jei, jei reta.

⁶² Jayave sacerdote tenondegua up̄ua uyemboi jare up̄irandu Jesús pe:

—¿Maera pa niñee nemoẽ'ã? ¿Mbae re pa cua reta uñeapo nderé? —jei.

⁶³ Ërei Jesús quĩño. Jayave sacerdote tenondegua up̄irandu ye chupe:

—¿Nde pa co jae Cristo, Tumpa ombou vae? ¿Nde pa co jae Tumpa Tai? Che ndoyocui Tumpa jecuaeño ico vae jee re nemimbeu vaerã oreve —jei.

⁶⁴ Jayave Jesús jei chupe:

—Nde ndere rami jae co che. Ërei che jae peve, che cuimbaerã ayeyapo vae cherechata co aguap̄i añ Tumpa mbaepuere güinoi vae iyip̄i pe iyacata coti. Cherechata vi ayu amap̄itu reve ara güi —jei.

⁶⁵ Jayave sacerdote tenondegua cua uyandu yave, poch̄i ramo omondoro jemimondei, jare jei:

—Jei ma icavi mbae vae Tumpa coti. ¿Maera ma pa yaeca yeta ñru vae reta uñeapo vaerã jese? Mase, pe reta piyandu ma icavi mbae vae jei Tumpa coti —jei—. ⁶⁶ ¿Mbae pa pere añave? —jei.

Ñru reta jei chupe:

—Icavi'ã co. Icavi co yayucaca vaerã —jei reta.

⁶⁷ Jayave amocue vae undiv̄i Jesús jova re, jare uinupa. Jare ñru vae reta ocua jese, ⁶⁸ jare jei chupe:

—Nde co jae Cristo, Tumpa ombou vae yave, emimbeu oreve quía ra ocua oĩ nderé.

Pedro uicuacu Jesús

(Mr 14.66-72; Lc 22.56-62; Jn 18.15-18, 25-27)

⁶⁹ Jare Pedro uguapi oĩ oca pe. Jare penti cuñatai ou jei chupe:

—Nde vi co jae Jesús Galilea pegua iĩru.

⁷⁰ —Che jae iĩru'ã co —jei Pedro opaete vae jovaque—. Aicuaa'ã mbae ndere vae —jei.

⁷¹ Jayave Pedro oo onque tuicha vae coti. Jare iĩru cuñatai uecha jare jei joco pe ñugüinoi vae reta pe:

—Cua cuimbae co jae penti Jesús Nazaret pegua iĩru.

⁷² Ërei Pedro jei ye:

—Che jae iĩru'ã co. Tumpa jee re aicuaa'ã jocua cuimbae —jei.

⁷³ Jare ndei ima mbove joco pe ñugüinoi vae reta yugüeru jei Pedro pe:

—Añete co, nde co jae penti Jesús iĩru. Echa'ã nde ndiyemingueta Jesús iĩru reta uyemingueta vae rami —jei reta.

⁷⁴ Jayave Pedro jei Tumpa jee re:

—Tumpa tuiporaraca cheve cua jae vae añetete'ã yave. Aicuaa'ã jocua cuimbae.

Jare jupivoi uru cuimbae uñee. ⁷⁵ Jare Pedro imandúa Jesús jei chupe vae re: “Ndei uru cuimbae uñee mbove, mbapi vese ma checuacuta.” Jayave Pedro oẽ joco güi, jare tanta ipiatiti reve uyao.

27

Jesús uyemboi Pilato jovai

(Mr 15.1; Lc 23.1-2; Jn 18.28-32)

¹ Jare cõe ma yave, opaete sacerdote reta itenondegua reta jare tenta guasu pegua reta itenondegua reta uyemboemboe Jesús re, uyucaca vaerã. ² Jayave uipocua Jesús jare güiraa mburuvicha guasu Poncio Pilato pe umee.

Judas imano

³ Jayave Judas (Jesús umee vae) ipiatiti uyapo vae re. Echa'ã uicuaa ma quirãi Jesús jovaicho reta umbijeco ma Jesús. Jayave güiraa ye jocua treinta corepoti sacerdote reta itenondegua reta jare tenta guasu pegua reta itenondegua reta ñügüinoi vae pe. ⁴ Jare jei chupe reta:

—Ayapo mbaeyoa. Echa'ã amee peve jocua cuimbae teco güinoi mbae vae piyucaca vaerã — jei.

Jayave jae reta jei Judas pe:

—Jocua mbae'ã co oreve. Nde co neno teco.

⁵ Jayave Judas omombo corepoti Tumpa jo pe. Jayave oẽ Tumpa jo güi oo uyeyuvi. ⁶ Jayave sacerdote reta itenondegua reta omonoo jocua corepoti jare jei:

—Jupi'ã co ñañono ye vaerã cua corepoti jiru Tumpa jo pe oĩ vae pe. Echa'ã ñamee Judas pe yandepuere vaerã yayucaca Jesús —jei reta.

⁷ Jayave uyemingueta reta uicuaa vaerã mbae ra uyapota corepoti pe. Jayave ogua ñaeu iyapoa iivi, uñeñotica vaerã joco pe ambie ivi pegua reta.

⁸ Jáeramo umbijee jocua ivi: Ivi tugüi jepicue.

⁹ Jare jucuarãi uyeyapo Tumpa iñee aracae umimbeu vae Jeremías jei vae. Echa'ã jae jei cuarãi: “Jare jae reta omonoo jocua treinta corepoti. Echa'ã Israel pegua reta umbiepi treinta corepoti jocua cuimbae re. Jepi co treinta corepoti. ¹⁰ Jayave ogua pipe ñaeu iyapoa ico, yandeYa jei cheve rami.” Jucuarãi jei.

Pilato uyemingueta Jesús ndive
(Mr 15.2-5; Lc 23.3-5; Jn 18.33-38)

¹¹ Jare Jesús uyemboi mburuvicha guasu jovai. Jayave mburuvicha guasu upirandu chupe:

—¿Nde pa co jae judío reta juvicha guasu? —jei.

—Nde ndere rami jae co che —jei Jesús chupe.

¹² Jare sacerdote reta itenondegua reta jare tenta guasu pegua reta itenondegua reta uñeapo Jesús re yave, Jesús jei'ã mbae ave. ¹³ Jayave Pilato jei chupe:

—¿Ndiyandu'ã pa quirãi jeta mbaembae re uñeapo reta nderé?

¹⁴ Ërei Jesús jei'ã mbae ave chupe. Jáeramo mburuvicha guasu ipiacañi jese.

Pilato jei Jesús umanota co
(Mr 15.6-20; Lc 23.13-25; Jn 18.38–19.16)

¹⁵ Jare pascua ara rupi Pilato oyoracañoi penti pereso tenta guasu pegua reta uipota vae. ¹⁶ Jare peresoriru pe oĩ penti cuimbae jerãcua vae. Jee co Barrabás. ¹⁷ Jayave Pilato upirandu yati vae reta pe:

—¿Pipota pa ayoraca vaerã peve Barrabás ani Jesús, Cristo jee vae?

¹⁸ Echa'ã jae uicuaa judío reta umee Jesús chupe ñacatãa jese ramo.

19 Jare Pilato uguapí oĩ yave uña vaerã Jesús, jembireco ombou quía jei vaerã chupe:

—Agüiye iyapo mbae jocua cuimbae jupi vae pe. Echa'ã aiporara ma piare chepau pe jae jeco pegua.

20 Ërei sacerdote reta itenondegua reta jare tenta guasu pegua reta itenondegua reta omboemboe yatí vae reta uyerure vaerã Pilato pe oyoraca vaerã Barrabás jare uyucaca vaerã Jesús.

21 Jayave Pilato upirandu chupe reta:

—¿Quía nunga pa cua mocui cuimbae güi pipota ayoraca vaerã peve?

—Barrabás —jei reta chupe.

22 Jayave Pilato upirandu chupe reta:

—Jucuarãi yave, ¿mbae pa pipota ayapo vaerã Jesús, Cristo jee vae pe?

Jayave opaete vae jei:

—Tuyecutuca curusu re.

23 Ërei Pilato upirandu chupe reta:

—¿Mbae icavi mbae vae pa uyapo?

Ërei jae reta iñeeãta reve jei:

—Tuyecutuca curusu re.

24 Jare Pilato uicuaa yave ipuere'ã mbae uyapo oyoraca vaerã Jesús - echa'ã judío reta umbipi uyapo tecorai - jei güeru vaerã chupe i jare uyepoe yatí vae reta jovai. Jayave jei chupe reta:

—Che anoi'ã teco cua cuimbae jupi vae imano re. Pe reta penoi teco —jei.

25 Jayave opaete yatí vae reta jei:

—Ore jare oriñemoñaeta turugüinoi teco imano re.

²⁶ Jayave Pilato oyoraca chupe reta Barrabás. Jare uinupaca ma yave Jesús chicote pe, umee sundaro reta pe, uicutu vaerã curusu re.

²⁷ Jayave mburuvicha guasu isundaro reta güiraa Jesús palacio pe, jare umbati opaete ñru sundaro reta joco pe. ²⁸ Jayave sundaro reta omboi Jesús güi jemimonde jare omondeca chupe temimonde pïta vae. ²⁹ Jayave oñope reta yurãti catuii vae jare umbapúa oñono Jesús ññãca re. Umee reta vi chupe penti tacuarãsi uipïsi vaerã ipo iyacata pe. Jayave uyeatica reta jae jovai jare oyoyai.

—¡Viva, judío reta juvicha guasu! —jei reta.

³⁰ Jare undivï reta jese. Jayave uipïsi reta tacuarãsi uiporu ññãca re. ³¹ Jare opa oyoyai reta yave, sundaro reta omboi chugüi temimonde pïta vae, jare omondeca ye chupe jemimondei. Jayave güiraa reta mburuvicha guasu joca güi, uicutu vaerã curusu re.

Jesús uyecutuca curusu re

(Mr 15.21-32; Lc 23.26-43; Jn 19.17-27)

³² Jare yugüiraa reta rambueve, uecha penti cuimbae Simón jee vae. (Cua Simón tenta guasu Cirene pegua co.) Jayave sundaro reta güiraaca Simón pe Jesús icurusu. ³³ Jare sundaro reta güiraa Jesús Gólgata jee vae pe. (Cua uipota jei: “Ācacuerenda”.) ³⁴ Jayave umee reta Jesús pe vino uyea mbae iro vae ndive vae. Ērei Jesús uicuaa yave mbae jocua, jou'ã.

³⁵ Jayave sundaro reta uicutu curusu re. Jayave uyuguari reta Jesús jemimonde re, uicuaa vaerã

mbae nunga penti penti güiraa iyupe vaerã. Jucuarãi uyapo reta uyeyapo vaerã Tumpa inee aracae umimbeu vae jei vae. Echa'ã jei cuarã: “Uyuguari reta cheremimonde re, uicuaa vaerã mbae nunga penti penti güiraa iyupe vaerã.” Jucuarãi jei. ³⁶ Jayave sundaro reta uguapi joco pe uyandareco vaerã Jesús re. ³⁷ Jare oñono reta curusu re Jesús inãca iárambo uyecuatía mbae umbijeco jesequa vae: “Cua co Jesús, judío reta juvicha guasu.” ³⁸ Jare sundaro reta uicutu vi mocui imonda vae reta, jare oñono penti Jesús iyacata coti jare ñru iyaso coti.

³⁹ Jare uasa vae reta uñeãcambivava reve jei icavi mbae vae Jesús pe.

⁴⁰ —Nde ndere nembusururuta co Tumpa jo jare ndiyapo yeta mbapi ara pe —jei reta chupe—. Iyerepi. Nde co jae Tumpa Tai yave, egüeyi curusu güi —jei reta.

⁴¹ Jae ramiño vi sacerdote reta itenondegua reta jare mboroyocui re oporomboe vae reta jare tenta guasu pegua reta itenondegua reta oyoyai.

⁴² —Jae uepi ñru vae reta —jei reta—. Ërei ipuere'ã jae uyerepi. Jae co Israel pegua reta juvicha guasu yave, tugüeyi añave curusu güi, yarovia vaerã jese —jei reta—. ⁴³ Güirovia Tumpa re; Tumpa tuepi añave, uipota yave. Echa'ã jae jei: ‘Che co jae Tumpa Tai’ —jei, jei reta.

⁴⁴ Jare imonda vae Jesús ndive uyecutuca vae reta jei icavi mbae vae chupe.

Jesús umano

(Mr 15.33-41; Lc 23.44-49; Jn 19.28-30)

⁴⁵ Jare guarasi ara mbite güive mbapi ora rupi uñemipĩtumimbi opaete ivi pe. ⁴⁶ Jayave mbapi ora ma caaru yave Jesús iñeeāta reve jei:

—Elí, Elí, ¿lama sabactani? (Cua uipota jei: “CheTumpa, cheTumpa, ¿maera pa chereya?”)

⁴⁷ Amocue joco pe ñugüinoi vae reta uyandu jare jei tēi:

—Mase, Elías ueni.

⁴⁸ Jare jupivoi penti vae osi oo umãqui esponja vinagre pe, jare oñono tacuarāsi re, jare omondo Jesús iyuru coti. ⁴⁹ Ērei ñru reta jei:

—Eāro. Yaecha ou Elías umbigüeyi vaerã.

⁵⁰ Jayave Jesús tanta usapicai, jare umano.

⁵¹ Jayave Tumpa jo umbiyao vae osoro mbite rupi ivate güi ivi coti. Jare ivi ucāta jare itape reta ovo. ⁵² Jare teõgüeriru reta uyepea, jare jeta uñeñono tee Tumpa peguarã umanocue vae reta icove ye, ⁵³ jare oẽ teõgüeriru reta güi Jesús icove ye yave ou umanocue vae reta ipite güi. Jae reta yugüiraa Jerusalén pe jare uyecuaa jeta vae pe.

⁵⁴ Jare sundaro reta juvicha Jesús re uyandareco oĩ vae jare jae ndive ñugüinoi vae reta uecha yave quirāi ivi ucāta jare opaete uyeyapo vae, uquiye ete jare jei:

—Añeteñoi yepe, cua cuimbae co jae Tumpa Tai.

⁵⁵ Jare jeta cuña reta umae ñugüinoi mbiri güi. Cua cuña reta yugüeru Jesús ndive Galilea güi uyeyocui vaerã chupe. ⁵⁶ Cua reta ipite pe ñugüinoi María Magdalena, jare Jacobo jare José ichi María jee vae, jare Zebedeo tai reta ichi.

*José oñono Jesús jetecue teõgüeriru pe
(Mr 15.42-47; Lc 23.50-56; Jn 19.38-42)*

⁵⁷ Jare guarasi uique ma yave, penti cuimbae icocatu vae tenta guasu Arimatea pegua José jee vae - jae vi co penti Jesús jemimboe - ⁵⁸ oo Pilato pe, jare uyerure chupe Jesús jeticue re. Jayave Pilato oyocui ñemee vaerã chupe Jesús jeticue. ⁵⁹ Jayave José umbigüeyi Jesús jeticue, jare oñoma penti nieso iquia mbae vae pe. ⁶⁰ Jayave oñono penti teõgüeriru ipiaü vae itape uyeyoo vae pe, (José imbae co jocua teõgüeriru) jare umbiyapayere ita tuicha vae teõgüeriru jonque re. Jayave José oo ye teõgüeriru güi. ⁶¹ Jare María Magdalena jare ñru cuña María jee vae uguapi ñugüinoi teõgüeriru jovai.

Sundaro reta uyandareco teõgüeriru re

⁶² Jare jocua ara opaete judío reta uyeyapicatu ñugüinoi piareve peguarã. Jayave piareve pe sacerdote reta itenondegua reta jare fariseo reta yugüiraa Pilato pe, ⁶³ jare jei chupe:

—Oreruvicha, oremandúa ma quirãi jocua cuimbae upurumbitavise vae ndei umano mbove jei mbapi ara rupi icove yeta ou umanocue vae reta ipite güi. ⁶⁴ Iyocui ndesundaro reta uyandareco vaerã teõgüeriru re mbapi ara pegua, agüiye vaerã jemimboe reta yugüiraa joco pe pïtu yave oñomi vaerã jeticue. Echa'ã jucuarãi yave, jeita reta opaete vae pe icove ye ma co ou umanocue vae reta ipite güi. Jare jucuarãi yave, jae reta umbitavita jeta Jesús umbitavi vae reta güi —jei reta.

⁶⁵ Jayave Pilato jei chupe reta:

—Joco pe penoi chesundaro reta. Pecua pembiyandarecoca cavi jese pepuere rupi —jei.

⁶⁶ Jayave jae reta yugüiraa jare uyuquenda cavi teōgüeriru jonque. Echa'ã oñono mbae ita tuicha vae re agüiye vaerã quía uipea, jare ueya joco pe sundaro reta uyandareco vaerã teōgüeriru re.

28

Jesús icove ye

(Mr 16.1-8; Lc 24.1-12; Jn 20.1-10)

¹ Mbutuu ara uasa ma yave, neimbove asi domingo ara pe María Magdalena jare ñru cuña María jee vae yugüiraa teōgüeriru coti. ² Jare ivi tanta ucãta. Echa'ã penti ángel yandeYa pe uyeyocui vae ugüeyi ara güi jare umbisiri ita tuicha vae teōgüeriru jonque güi. Jayave ángel uguapi oñ ita re. ³ Jare jova uyecuaa ama uvera vae rami. Jare jemimonde tĩ asi roi tĩ asi vae rami. ⁴ Jare teōgüeriru re uyandareco ñugüinoi vae reta uriri uquiye ramo, jare umano vae echa upita reta.

⁵ Jayave ángel jei cuña reta pe:

—Agüiye pequiye. Echa'ã aicuaa peeca peñ Jesús curusu re uyecutuca vae. ⁶ Mbaeti ma cua pe oñ. Icove ye ma ou umanocue vae reta ipite güi, jae jei rami. Peyu pemae jendacue re —jei—. ⁷ Jare pecua voi pere jemimboe reta pe: 'Jae icove ye ma ou umanocue vae reta ipite güi. Jae oota perenonde Galilea pe. Joco pe peechata.' Amimbeu ma co peve —jei chupe reta.

⁸ Jayave cuña reta oñ voi teōgüeriru güi. Uquiye reta jare uyerovia tuicha reta. Jare osi yugüiraa umimbeu vaerã Jesús jemimboe reta pe.

⁹ Jare Jesús uñeovãiti jae reta ndive jare jei chupe reta:

—Piyerovia catu.

Jayave cuña reta uyeatica ivi pe uicuãva ipi rupi jare umbiadora. ¹⁰ Jayave Jesús jei chupe reta:

—Agüiye pequiye. Pecua pemimbeu cherivi reta pe yugüiraa vaerã Galilea pe. Joco pe cherechata —jei.

Sundaro reta umimbeu vae

¹¹ Jare cuña reta yugüiraa ye rambueve teõgüeriru güi, amocue sundaro tenonde yave teõgüeriru re uyandareco vae reta yugüiraa vi tenta guasu pe, jare umimbeu sacerdote reta itenondegua reta pe opaete uyeyapo vae re.

¹² Jare sacerdote reta itenondegua reta uyembati tenta guasu pegua reta itenondegua reta ndive. Jare uyemboemboe ma yave, umee jeta corepoti sundaro reta pe. ¹³ Jare jei chupe reta:

—Pere: ‘Jesús jemimboe reta yugüiraa teõgüeriru pe pïtu yave, jare oñomi Jesús jetecue ore ndoque noĩ rambueve’ —pere, jei reta —

. ¹⁴ Jare mburuvicha guasu cua uicuaa yave, numimbeuta chupe pe reta mbaeti co teco penoi —jei reta.

¹⁵ Jayave sundaro reta uipisi corepoti jare uyapo sacerdote reta itenondegua reta jare tenta guasu pegua reta itenondegua reta jei chupe reta uyapo vaerã vae. Jare jecuaeño opaete judío reta jei jucuarãi co uyeyapo.

Jesús oyocui jocua once jemimboe reta
(Mr 16.14-18; Lc 24.36-49; Jn 20.19-23)

¹⁶ Jayave jocua once Jesús jemimboe reta yugüiraa Galilea pe penti ivitu guasu re Jesús umimbeu chupe reta vae rami. ¹⁷ Jare jemimboe reta uecha yave Jesús, umbiadora. Ërei amocue

vae ipuere'ã güirovia jae co Jesús vae. ¹⁸ Jare Jesús ou jei chupe reta:

—Opaete mbaepuere uñemee ma cheve ara pe jare ivi pe. ¹⁹ Jáeramo pecua peporomboe opaete que rupi rupi jare pembibautiza cheRu jee re jare cheree re jare Espíritu Santo jee re —jei—. ²⁰ Jare pemboe reta opaete che poyocui vae re. Jare che aña pe reta ndive jaño mai pegua cua ara reta opa regua —jei.

Nuevo Testamento Guaraní Pe
New Testament in Guaraní, Western Bolivian
(BL:gnw:Guaraní, Western Bolivian)

copyright © 2012 Wycliffe Bible Translators, Inc.

Language: Guaraní, Western Bolivian

Translation by: Wycliffe Bible Translators, Inc.

Guaraní, Western Bolivian [gnw], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guaraní, Western Bolivian

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files
dated 29 Jan 2022

09a8356f-416c-5877-91cf-40f681db481e